

TNÚHU NÍ CHÍDÓ TNÙNÍ TÉ JUÀÁ

Déhe Yá Ndiöxí ní cuu-gá ñⁿ ñáyi

¹ Cùmání-gă ngáva ñuyú, te sa ndècu ndihi Yá Ndiöxí Déhe-gá. Te ñⁿ-ni x̄ccu-gá. Te Déhe-gá-áⁿ ñⁿ cuu-gá dàtná ñⁿ tnúhu, chi ní cachí tnúhu-gá nàcuáa cà Tátá-gă Dútú Ndiöxí. ² Te sa ndècu-gá ndihi Dútú Ndiöxí te ní ngáva ñuyú. ³ Te ñⁿ-ni tnúhu mee Dútú Ndiöxí ní cuu ní cadúha Déhe-gá ncha sá ló ñuyú. Te núu ñá túú Dēhe-gá ñá, te ñá túú ñă coo ñuyú-a ni cùu. ⁴ Te ñⁿ-ni Déhe-gá quídé-gă ndécú-ó, te ní dáyèhé-gá iní-ó nàcuáa cundecu-o. ⁵ Te tnúhu-gá ní xíté nuu-xi núú ndécú nchàa ñáyi ñùhu ichi cuehé ichi duha. Te ñáyi-áⁿ cúu-yu dàtná cue ñáyi ndècu ñⁿ núú néé, te ñⁿ-ni-yu cachí iní-yu xocàní-yu tnúhu-gá dico vá ndácū-yu.

⁶⁻⁷ Te ní x̄ndecu ñⁿ téé ní x̄nani-dě Juàá, te téé-áⁿ ñⁿ táuchíúⁿ Yă Ndiöxí sá càháⁿ-dé tnúhu-gá núú ñáyi. Te ní x̄háⁿ-dě xií-yu sá v̄xi Déhe-gá ñuyú-a, te dandixi túu-gá iní-yu cuendá cutnùní iní-yu nàcuáa ndùu cuendá Yă Ndiöxí cuendá quíndáá iní-yu tnúhu-gá. ⁸ Te ñá díú mèe té Juàá ní dandixi túu-dé iní-yu cuendá cutnùní iní-yu nàcuáa ndùu cuendá Yă Ndiöxí, chi cuendá-ni ní xica cuu-dé ní cáháⁿ-dé sá Dēhe Yá Ndiöxí véxi-gá dandixi túu-gá iní-yu. ⁹ Te ndáá ndisa sá méé-gă dandixi túu-gá iní ñáyi ñuyú-a cuendá cutnùní iní-yu nàcuáa ndùu cuendá Yă Ndiöxí.

¹⁰ Te ní x̄ndecu-gá ñuyú-a, te ñáyi ñuyú-a ñá ní cùtnuní iní-yu yoo cùu-gá, te ñⁿ-ni mee-gă ní cadúha-gá ñuyú-a ní quide-gá ch̄uⁿ ní táhú Dútú Ndiöxí. ¹¹ Te ní quixi-gá ñuyú ñă cadúha mee-gă, dico cue ñáyi ñuyú-a ñá ní cùu váha iní-yu núu-gă. ¹² Dico davá-yu ní sándáá iní

ñáhă-yu xii-gá, te ní nduu táhŭ-yu ní nduu déhe ñaha Yă Ndiöxí xii-yu. ¹³ Te ñá túú ní nduu déhe ñaha-gă xii-yu sá cúŭ-yu déhe ñáyiú ñuyíú-a, àdi sá ndécú tătă-yu, nănă-yu chi mee Yă Ndiöxí ducaⁿ nĩ cuiní-gá cunduu sá ndúú dēhe ñaha-gă xii-yu.

¹⁴ Te Déhe-gá ní quixi túu-gá ñuyíú-a, te ní cuu-gá ñⁿ yiqui cùñú ní xíndecu ndihi ñaha-gă xii nchoo cuè ñáyiú ní xica cuu túu ndihi-gá. Te ní xiní-ó să ŷo càhnu cuu-gá cuendá sá ñⁿ dii díi-ni-gă cúú-gă Déhe Yá Ndiöxí, te ío cundahú iní ñáhă-gă chíndèe ñaha-gá xii nchoo ñáyiú ndècu ñuyíú-a, te ío ndáá càháⁿ-gá. ¹⁵ Te duha ní càháⁿ tē Juàá cuendá Déhe Yá Ndiöxí ní xáhaⁿ-dē xii ñáyiú:

—Cuendá tée iha ni càháⁿ-í ndéé cãni-gá ní cachí-í sá quixí ñⁿ tée quixi. Te tée-áⁿ cúnùu-gá-dé, chi díhna-gá-dé sa ndècu-dé dàcúúxí yŭhú —duha ní xáhaⁿ-dē xii-yu.

¹⁶ Te ío váha iní Yaá-áⁿ chi xito ñaha-gá xii-o nchàa-o ñⁿ nduu ñⁿ nduu. ¹⁷ Te ndii Moisés ní cachí tnúhu ndii tnúhu Yá Ndiöxí tnúhu sá sánú ìchi ñaha xii-o nacuáa cundecu-o, dico Déhe-gá Xítohó Jesucristú ní cachí-gá sá ŷo cùu iní ñáhă Yă Ndiöxí xii-o. Te ní càháⁿ-gá nchaa dava-gá tnúhu ndáá. ¹⁸ Te ñá ñⁿ ñáyiú xini túu-yu Yá Ndiöxí. Dico ñⁿ dii díi-ni Déhe-gá Yaá ndécú ndihi-gá càhí tnúhu-gá nàcuáa càa-gá.

Té Juàá tée dàcuandute ñaha xii ñáyiú càháⁿ váha-dé cuendá Xítohó Jesucristú

(Mt. 3:11-12; Mr. 1:7-8; Lc. 3:15-17)

¹⁹ Te cue tée isràél ndécú ñúú Jerusàlén ní tendaha-güedě cue dútú ndihi cue tée cùu levitá cuáhăⁿ-güedé núú ndécú tē Juàá ndúcú tnúhu-güedé núú-dē nŭu ná tée cùu-dé. ²⁰ Te ní càháⁿ ndáá-dé ní xáhaⁿ-dē xii-güedé:

—Yúhú, ñá díú Crìstú Yaá ní tendaha Yă Ndiöxí véxi ñuyúú-a cùu-í —càchí-dé xăhaⁿ-dě.

²¹ Te ní xáhaⁿ tùcu-güedé:

—¿Te yoo cùu yohó váíⁿ? ¿Á yòhó cúú-n tĕ Èliás? —
càchí-güedé xăhaⁿ-güedĕ xii-dé.

Te ní xáhaⁿ tĕ Juàá:

—Yúhú, ñá díú tĕ Èliás cúu-í —càchí-dé xăhaⁿ-dě.

Te xăhaⁿ tùcu-güedé:

—¿Te yòhó cúú-n tĕe ní cachí cue tĕe ndéé sanaha quixi cáháⁿ tnúhu Yá Ndiöxí-ăⁿ? —càchí-güedé xăhaⁿ-güedĕ xii-dé.

Te ní xáhaⁿ-dě:

—Ni ñà díú tĕe-áⁿ cúu-í —càchí-dé xăhaⁿ-dě xii-güedé.

²² Te ní xáhaⁿ tùcu-güedé:

—¿Te ná tĕe cùu yohó váíⁿ?, cuëndá ducaⁿ nà-cani tnúhu-ndí núú cuè tĕe ní tendaha ñàha xii-ndí véxi-ndí, te cáháⁿ duuⁿ-n nŭu ná tĕe cùu-n —cachí-güedé xăhaⁿ-güedĕ xii-dé.

²³ Te ní xáhaⁿ tĕ Juàá:

—Yúhú cúu-í tĕe xìca cáháⁿ xití yucu nàcuáa ní cáháⁿ ndíi Chàíá, chi ndíi-áⁿ ñí cachí ndíi: “Chí dáñá ìchi cuehé ìchi duha ndècu-ndo te tñii-ndo ìchi váha, chi véxi Yaá ío cùnuu”, duha ní cachí ndíi —càchí tĕ Juàá xăhaⁿ-dě xii-güedé.

²⁴ Te cue tĕe ndùcu tnúhu núú tĕ Juàá nŭu ná tĕe cùu-dé, cue tĕe-áⁿ ñí tendaha ñàha cue tĕe cùu fariséú xii-güedé. ²⁵ Te ní xáhaⁿ tùcu-güedé xii tĕ Juàá:

—¿Ná cuëndá dácuàndute-n ñáyiú te núú ñá díú Crìstú cúu-n, te ni ñà díú tĕ Èliás, te ni ñà díú tĕe véxi cáháⁿ tnúhu Yá Ndiöxí cúu-n váíⁿ? —càchí-güedé xăhaⁿ-güedĕ xii-dé.

²⁶⁻²⁷ Te ní xáhaⁿ tĕ Juàá:

—Yúhú ní ngódó núù-í dácùandute-í ñáyiú. Dico nchícúⁿ ñⁿ téé véxi, te téé-áⁿ cúnùu-gá-dé dácúúxí yǔhú, chí yúhú cúù-í ñⁿ téé duuⁿ duuⁿ ñá túú tàú nandaxi cuèdicó ñii chàú-dé dico quède-í chiùⁿ-dé. Te téé-áⁿ sa ñùhu tnahá-dé tnuú-ndó dicó-ni sá ñă túú xìní-ndó-dě — cächí-dé xǎhaⁿ-dě.

²⁸ Duha ní cuu ñuu Bètábará ñuu cáá ndàa ingá xio yúte Jòrdán, yacáⁿ ní xíndecu té Juàá ní dácùandute-dé ñáyiú.

Jèsús quidé càhnu iní-gá nchaa yíca cuèchi ñáyiú

²⁹ Te nduu tněé ní xiní té Juàá Jèsús véxi yatni-gá núú ndécú-dě ndihi ñáyiú. Te ní xǎhaⁿ-dě xií-yu:

—Chí cùndèhe téé-ǎⁿ, chí téé-ǎⁿ cúú-dě Crístú Yaá ní tendaha Yǎ Ndiǒxí véxi ñuyíú-a, te véxi-dé cada càhnu iní-dé nchaa yíca cuèchi ñáyiú ñuyíú. Te cùu-dé dàtná ñⁿ mběé quiti ío váha iní-xi. ³⁰ Te ñiu téé-ǎⁿ ní cachí-í sá cánchezícúⁿ-dé quixi. Te cùnuu-gá-dé dácúúxí yǔhú, chí díhna-gá-dé sa ndècu ní cachí-í xii-ndo. ³¹ Te ni yǔhú ñá túú xìní-í-dé ní cùu, dico xìca cuu-í dácùandute-í ñáyiú cuendá nchaa ñáyiú isràél quini ñáhă-yu xii-dé — cächí-dé xǎhaⁿ-dě xií-yu.

³² Te ní xǎhaⁿ tùcu-dé:

—Ní xiní-í Espíritú Yǎ Ndiǒxí ní quee-xi andiu vèxi cuuⁿ-xi ngúndecu ndihi ñaha-xi xii-dé, te dàtná cáá lõmá cáá Espíritú-án vèxi cuuⁿ-xi. ³³ Te yúhú ñá túú xìní-í-dé ní cùu, dico Yá Ndiǒxí Yaá ní tendaha ñaha xii-í xíca cùu-í dácùandute-í ñáyiú, Yaá-án ñí cachí tnúhu-gá sá tée na quini-í ngúndecu ndihi Espíritú-gá sá vèxi cuuⁿ andiu, te téé-án taxi-dé Espíritú-gá cundecu ndihi-o. ³⁴ Te yúhú ní xiní-í-dé te xìní ndáá-í sá Dèhe Dútú Ndiǒxí cúú-dě. Te xíǎⁿ cächí tnúhu-í xii-ndo — cächí té Juàá xǎhaⁿ-dě xií-yu.

Cue téé díhna nuu xìca cuu ndihi Jesús

35 Te nduu tněé-án diu-ni xíaⁿ ndécú tě Juàá ndihi úú cue téé xica cuu ndihi-dé. 36 Te ní xiní-dé Jèsús ñúhú-gǎ ichi, te ní xáhaⁿ-dě xii cue téé xica cuu ndihi-dé-án:

—Chí cúndèhe téé-ǎⁿ, chí téé-ǎⁿ cúú-dě Crístú Yaá ní tendaha Yǎ Ndiǒxí véxi ñuyúú-a. Te cùu-dé dàtná ìⁿ mběé quitì ío váha iní-xi —càchí-dé xáhaⁿ-dě.

37 Te sá dúcáⁿ ñí cáháⁿ té Juàá núú cuè téé úú ndihi-dé-án nǔu ní chinchícúⁿ-güedé Jèsús. 38 Te ní nchócótó-gǎ ndàa sátá-gǎ, te ní xiní-gá sá nchìcúⁿ ñáhá-güedě xii-gá. Te ní xáhaⁿ-gǎ xii-güedé:

—¿Ná nánducu-ndo? —cachí-gá xáhaⁿ-gǎ xii-güedé.

Te ní xáhaⁿ-güedé:

—¿Ndèé ndécú-n, Ràbíí? —càchí-güedé xáhaⁿ-güedě xii-gá.

Te Ràbíí-án quéé-xí Mèstrú tnúhu mee-güedě. 39 Te ní xáhaⁿ Jèsús xii-güedé:

—Chí nèhé te quiní-ndó —càchí-gá xáhaⁿ-gǎ.

Te ní xica-güedé cuáháⁿ-güedé, te ní quexìo-güedé núú quídé vèhe-gá. Te ndècu-ni-güedé ndihi-gá ní cuaa, chí dàtná òré caa cúmí sacuaa ní sáá-güedé.

40 Te úú cue téé-án ñí tñii-güedé tnúhu ní cáháⁿ té Juàá, te ní chinchícúⁿ-güedé Jèsús. Te núú úú cue téé-án, ìⁿ-dé nání-dě Ndrìxí, te ñaní-dé cúú tě Xímú, àdi Pelú chí úú òú-dé. 41 Te té Ndrìxí-án ñí nanducu-ni-dě ñaní-dé te ní xáhaⁿ-dě:

—Ní naníhí-ndǐ téé cùu Mesiás —càchí-dé xáhaⁿ-dě.

Te Mesiás-án quéé-xí Crístú tnúhu mee-güedě, Yaá ní tendaha Yǎ Ndiǒxí véxi ñuyúú-a. 42 Te ndèca té Ndrìxí ñaní-dé cuáháⁿ núú ndécú Jèsús. Te òré ní xiní ñáhá Jèsús xii té Xímú, te ní xáhaⁿ-gǎ:

—Yòhó cúú-n tě Xímú déhe té Jònás, te vitna danàni ñaha-í Cèfás xii-n —càchí-gá xáhaⁿ-gǎ.

Te Cèfás-ǎⁿ quéé-xí Pèlú tnúhu mee-güedě.

Jèsús ní cáháⁿ-gá té Lìpé ndìhi té Natanàél

⁴³ Te nduu tněé ní sani iní-gá quíhíⁿ-gá distritú Galileá. Te ní naníhí-gă ĩⁿ tée nàni Lipé, te ní xáhaⁿ-gă xii-dé:

—Néhé ná quíhíⁿ-ó nǔú quíhíⁿ-í-a —càchí-gá xáhaⁿ-gă.

⁴⁴ Te té Lìpé-áⁿ cúú-dě tée ñuú Bètsaidá. Te ñuú ní ñuú yàcáⁿ cúú ñuú té Ndríxí ndìhi té Pèlú. ⁴⁵ Te té Lìpé ní naníhí tnáhá-dě ndìhi té Natanàél, te ní xáhaⁿ-dě:

—Ní naníhí-ndǐ tée dii cuendú-xi ní chídó tnùnì ndí Moisés ndìhi dava-gá cue tée ní xóo cáháⁿ tnúhu Yá Ndiǒxí ndéé sanaha. Te tée-áⁿ nání-dě Jèsús déhe té Chèé, tée ñuú Nazàrét —càchí-dé xáhaⁿ-dě.

⁴⁶ Te ní xáhaⁿ tǐ Natanàél xii té Lìpé:

—¿Te náa ío váha càa ñuú Nazàrét nǔu da yàcáⁿ quee tée cáháⁿ tnúhu Yá Ndiǒxí? —càchí-dé xáhaⁿ-dě.

Te ní xáhaⁿ tǐ Lìpé:

—Néhé ná quíhíⁿ-ó te quini-n —càchí-dé xáhaⁿ-dě.

⁴⁷ Te òré ní xiní Jèsús té Natanàél tá cùyatni-dé cuáháⁿ, te ní cáháⁿ-gá cuendá-dé te ní cachí-gá:

—Tée véxi-ǎⁿ cúú-dě mei tǐe isràél, te ñá ĩⁿ nduú dandahú-dé ñáyiú —càchí-gá xáhaⁿ-gă.

⁴⁸ Te ní xáhaⁿ tǐ Natanàél xii Jèsús:

—¿Te nása náquiní ñáhá-n? —càchí-dé xáhaⁿ-dě.

Te ní xáhaⁿ Jèsús:

—Yúhú sa ní xiní ñáhà-í xii-n òré ndécú-gă-n càha yutnu ngúxí-ǎⁿ te ni tǐ Lìpé vátá cáná ñàha-gá-dé xii-n òré-áⁿ —càchí-gá xáhaⁿ-gă xii-dé.

⁴⁹ Te sá dúcáⁿ ñí cáháⁿ-gá, núu ní xáhaⁿ tǐ Natanàél xii-gá:

—Mèstrú, yòhó cúú-n Dǐhe Dútú Ndiǒxí yíndàha-n ñáyiú isràél —càchí-dé xáhaⁿ-dě xii-gá.

⁵⁰ Te Jèsús ní xáhaⁿ-gă:

—Cuèndá sá nǐ xiní ñáhà-í xii-n caha yutnu ngúxí xiǎⁿ iní ñáhá-n, dico cuéhé-gǎ núú sǎ quíní-n —càchí-gá xáhaⁿ-gǎ xii-dé.

⁵¹ Te ní xáhaⁿ tùcu-gá:

—Na càchí tnúhu ndáá-í sá sàá nduu, te quíní-ndó nàcaáⁿ andiu. Te quíní-ndó cuè espíritú xínú cuèchi núú Yǎ Ndiǒxí sá ndàa nuu-xi quide-xi núú cùndècu yúhú Tée cùu ñaní tnáhá-ndó nchàa-ndo —cachí-gá xáhaⁿ-gǎ xii-güedé.

2

Vico tnǎndaha lò ñuú Cànaá

¹ Te nduu úní sá dúcáⁿ nǐ cuu te ní xóo ìⁿ vico tnǎndaha ñuú Cànaá, ìⁿ ñuú yíndèhu distritú Galileá. Te yàcáⁿ ní xíndecu nǎná Jèsús. ² Te tnàhá Jèsús ndìhi cue tée xica cuu ndìhi-gá ní cáháⁿ-yu cuáháⁿ-gá ndìhi-güedé vico-áⁿ.

³ Te òré ní ndìhi vínú, te ní xáhaⁿ nǎná Jèsús xii-gá:

—Ñá túú-gǎ vínú ndécú ndìhí-yu —càchí-aⁿ xáhaⁿ-aⁿ.

⁴ Te ní xáhaⁿ Jèsús xii-aⁿ:

—Nǎá, ñá túú xini ñuhu-xi da yúhú cúñaha-n cuèndá vínú-áⁿ, chi vátá tnàhá-gá òré quíní-yu yoo cùu yúhú —càchí-gá xáhaⁿ-gǎ xii-aⁿ.

⁵ Te ní xáhaⁿ-aⁿ xì ñáyiú xínu cuechi:

—Cada-ndo nchàa nacuáa na càháⁿ Jèsús —càchí-aⁿ xáhaⁿ-aⁿ.

⁶ Te yàcáⁿ nútnǐ ìⁿú quídi yúú te queé dàtná ìⁿ cièndú lǐtrú ndute ìⁿ ìⁿ quídi-áⁿ. Te ndute-áⁿ nándǐhi ñáyiú isràèl ndáhǎ-yu te nàqueté-yu cóhǒ-yu chi ducaⁿ tnàhí quidé-yu nàcuáa sàndáá iní-yu Yá Ndiǒxí. ⁷ Te ní xáhaⁿ Jèsús xii nchaa cue tée xínu cuechi:

—Nadachítú-ndó ndüte ndi nchaa quídi-áⁿ —càchí-gá xáhaⁿ-gǎ xii-güedé.

Te ní nadachítú-güedé. ⁸ Te ní xáhaⁿ-gǎ:

—Vitna te tava-ndo lùha, te canehé-ndo quǐhíⁿ cuáha-ndo tée quide vico —cachí-gá xáhaⁿ-gǎ xii-güedé.

Te ducaⁿ nǐ quide-güedé ní tava-güedé luha nèhe-güedé cuáháⁿ ní sáha-güedé tée quide vico. ⁹ Te ní xito ndéé tée quide vico-áⁿ, te sa ní nduu-xi vínú, te ñá túú ní xíní-dé ndèé véxi-xi, dico mee cuè tée xínu cuechi sa naha-güedé núú nǐ tava-güedé. Ducaⁿ te tée quide vico-áⁿ nǐ cana-dé tée tnǎndaha. ¹⁰ Te ní xáhaⁿ-dě:

—Nchaa ñáyiú quide vico queñuhú-yu díhna-gá vínú váha. Te sa vai vínú váha xihí-yu, te dǎtnúní queñuhú-yu vínú ndàhú. Te yòhó díhna-gá vínú ndàhú ní queñuhu-n, te ndéé núú nǐ ndíhi-ná ní queñuhu-n vínú váha —càchí tée quide vico-áⁿ xáhaⁿ-dě xii tée tnǎndaha-áⁿ.

¹¹ Te sá nǐ nadatiú Jesús ndute-áⁿ nǐ nduu-xi vínú cúú-xí ìⁿ chiuⁿ díhna nuu sǎ vǎ yò tnàhí ndàcu cada ní quide-gá ñuú Cànaá, ìⁿ ñuú yíndèhu distritú Galileá, te chiuⁿ ní quide-gá-áⁿ cúú-xí ìⁿ chiuⁿ cahnu vihi, núú xíǎⁿ ní cutnúní iní-yu sá ïo càhnu cuu-gá, te ní sándáá iní ñáhá nchàa cue tée xica cuu ndíhi-gá.

¹² Te sátá nǐ yáha vico, te ní xica Jèsús ndíhi nǎná-gǎ, ndíhi cue ñaní-gá, ndíhi nchaa cue tée xica cuu ndíhi-gá cuáháⁿ-yu ñuú Capèrnaúm. Te yàcáⁿ ní xíndecú-yu ìⁿ úú nduu ndíhi-gá.

Jèsús ñá túú tnàhá iní-gá nàcuáa quide ñáyiú xití veñúhu (Mt. 21:12-13; Mr. 11:15-18; Lc. 19:45-46)

¹³ Te ta cùyatni cada ñáyiú isràél vico pàscuá, te ní xica Jèsús cuáháⁿ-gá ñuú Jerusàlén. ¹⁴ Te sátá nǐ sáa-gá yàcáⁿ, te ní xica-gá cuáháⁿ-gá veñúhu càhnu sá ïo cùnuu, te xití veñúhu-áⁿ nǐ xíní-gá ndécú ñáyiú dicó-yu ndicutu, mbéé ndíhi lõmá, te tnàhá ñáyiú dàma díhúⁿ núcõo-yu ní xíní-gá. ¹⁵ Te ní queheⁿ-gá ìⁿ úú yoho, te ní cáunuu tnàha-gá, te ní dáyùhu-gá ñáyiú ní queé-yu quehé

veñúhu, ndihi ndicutú-yu ndihi mběě-yu. Te cue ñáyiú dàma díhúⁿ-ǎⁿ ní dǎngóyo-gá díhúⁿ-yu, te ní dándùà-gá mèsá-yu. ¹⁶ Te ní xáhaⁿ-gǎ xii cue ñáyiú dico lómá:

—¡Queñuhu-ndo nchàa quití-a xití veñúhu-a! ¡Vá cáda-ndó vèhe núú yǎhu núú cúú vèhe Tǎtà-í Dútú Ndiǒxi!
—càchí-gá xáhaⁿ-gǎ xii-yu.

¹⁷ Te xǎⁿ ní ndacu iní cue téé xica cuu ndihi-gá sá dúcáⁿ yòdo tnuní núú tütú-gá, te càchí-xi: “Ío cùyica iní-í chi ñá cuiní-yu canehe ñ-yu vèhe Tǎtà-í”, duha càchí-xi núú tütú-gá.

¹⁸ Te ní xáhaⁿ cuè téé isràél xii-gá:

—¿Ná cúú sǎ vǎ yǒo tnàhí ndàcu cada, cada-n cuèndá cutnùní iní-ndí sá cúú dùha taxi tnuní ñáhá-n xii-ndí-i?
—càchí-güedé xǎhaⁿ-güedě xii-gá.

¹⁹ Te ní xáhaⁿ Jèsús:

—Chí dǎngóyo veñúhu-a, te není xití úní nduu te sa nadaxínu-í —càchí-gá xáhaⁿ-gǎ xii-güedé.

²⁰ Te ní xáhaⁿ tùcu cue téé isràél:

—Údico ínú cuía ní xindecuu-güedé ní sáá veñúhu-a, te yòhó cuiní-n nàdaxínu-n xití úní-ni nduu —càchí-güedé xǎhaⁿ-güedě xii-gá.

²¹ Dico sá ní cáháⁿ-gá chi ñá díú cuèndá veñúhu ni cáháⁿ-gá chi cuèndá yiqui cùñú-gá ní cáháⁿ-gá. ²² Núú sátá ní xíhí-gá, te ní ndoto-gá, te òré-áⁿ ní ndacu iní cue téé ní xica cuu ndihi-gá nàcuáa ní cáháⁿ-gá, núú xǎⁿ ní sándáá iní-güedé tnúhu yòdo tnuní núú tütú-gá. Te ducaⁿ te ní sándáá iní-güedé tnúhu ní cáháⁿ-gá.

Jèsús xini-gá nàcuáa càa iní nchaa ñáyiú

²³ Te òré ndécú Jèsús vico pàsua, te ío vai ñáyiú ní sándáá iní ñáhá xii-gá cuèndá ío titní sá vǎ yǒo tnàhí ndàcu cada ní quide-gá ní xiní-yu. ²⁴ Dico Jèsús ñá ní cáháⁿ-gá nchaa tnúhu ñuhu iní-gá, chi sa ní cutnùní iní-gá

sá ñà túú cùu váha iní-yu. ²⁵ Te ñá túú xini ñuhu-gá ìíⁿ ñáiyu cúñaha nàcuáa càa iní nchaa tñaha ñáiyú-yu, chi mee-gă sa ñaha ndáá-gá nàcuáa càa iní-yu ncháá-yu.

3

Jèsús ndìhi té Nicòdemú

¹ Ní xíndecu ìíⁿ tée cùu fariséú ní xínani-dě Nicòdemú, te ní cuu-dé ìíⁿ tée cùnuu núú ñáiyu isrâél. ² Te tée-án ñí sáháⁿ-dé niú ní cáháⁿ ndìhi-dé Jèsús, te ní xáhaⁿ-dě:

—Mèstrú, yúhú ndìhi dava-gá-güedé sa ñaha-ndí sá Yă Ndiöxí ní tendaha ñaha-gá xii-n vëxi-n dânehé ñáhá-n xì-ndí, chi núu ñá túú Yă Ndiöxí ndécú ndìhi-n, te vá ndácú-n càda-n nchaa sá vâ yöö tñahí ndâcu cada quide-n —cachí-dé xăhaⁿ-dě.

³ Te ní xáhaⁿ Jèsús:

—Na càchí tñúhu ndáá-í xii-n să ncháá ñáiyu vá ná càcu saa tucu, te vá ndìhu ndaha ñaha Yá Ndiöxí xií-yu —càchí-gá xáhaⁿ-gă xii-dé.

⁴ Te ní xáhaⁿ tể Nicòdemú:

—¿Te nása cada ìíⁿ ñáiyu sa ní yîi te cacu-ni tucú-yu? ¿Náa ndíhu tucú-yu xití ñănă-yu te cacu tucú-yu xito cùu uú-ăⁿ? —càchí-dé xăhaⁿ-dě xii-gá.

⁵ Te ní xáhaⁿ Jèsús:

—Na càchí tñúhu ndáá-í xii-n să nchàa ñáiyu na ndùu ndoo nduu nine iní-xi cuú-yu ñáiyu ní na càcu saa ndìhi ndute ndìhi Espíritú Yă Ndiöxí, ñáiyu-án ndìhu ndaha ñaha-gá xií-yu. ⁶ Te nchaa ñáiyu càcu ñuyúú-a, chi déhe ñáiyu ñuyúú-a cùú-yu. Te ñáiyu ní nduu ndoo ní nduu nine iní-xi, ñáiyu-án ñí nduu táhũ-yu Espíritú Yă Ndiöxí te tàxi tñuní ñáhá-nă Espíritú-gá xií-yu. ⁷ Te vá cúñũhu-n tñũhu ní cáháⁿ-í-a, chi nchaa ñáiyu ní sándáá iní ñáhá xì-í ní nduu ndoo ní nduu nine iní-yu, te ñáiyu-án cúũ-yu dâtná ñáiyu ní nacacu saa. ⁸ Táchí ndëni xíáⁿ tècú dóho-o

xìco-xi, dico ñá túú xìní-ó ndèé ichi véxi-xi, te ni ñà túú xìní-ó ndèé ichi cuáháⁿ-xi. Ducaⁿ sãtnahá-xi cùu Espiritú-gá ndécú ndìhi ñáyiu ní nduu ndoo ní nduu nine iní-xi —càchí-gá xáhaⁿ-gã xii-dé.

⁹ Te dãtnùnì ní xícáⁿ tnúhú tùcu té Nicòdemú núú-gã, te xáhaⁿ-dë xii-gá:

—¿Te nása ndùu tnúhu càháⁿ-n dùcaⁿ caháⁿ-n? —
càchí-dé xáhaⁿ-dë xii-gá.

¹⁰ Te ní xáhaⁿ Jèsús:

—Yòhó cúu-n ìⁿ tée cùtnuní iní-xi, chi dàcuaha-n ñáyiu isràèl, ¿te ñá tècú tnùnì-n tnúhu càháⁿ-í-u? ¹¹ Te na càchí tnúhu ndáá-í xii-n sã nchũhú càháⁿ-ndí ìⁿ sá nĩ tecú tnùnì-ndí, te càháⁿ ndáá-ndí cuèndá ìⁿ sá nĩ xiní-ndí. Dico nchòhó ñá tècú tnùnì-ndó tnúhu càháⁿ-ndí. ¹² Te ñá sàndáá iní-ndó tnúhu càháⁿ-í cuèndá nchaa nàcuáa cùu ñuyúú-a, te uuⁿ-gá cada-ndo nũu cáháⁿ-í cuèndá nchaa nàcuáa cùu andiu.

¹³ 'Vá yõo ìⁿ sàá andiu, te cani-xi cuèndú nàcuáa càa. Chi ìⁿdìi díi-ni yúhú véxi cuuⁿ-í andiu, te cùu-í ñanì tnáhá-ndó nchaa-ndo. Te diu-ni yàcáⁿ ndaa-í cundecu-í. ¹⁴ Te dàtná ní ndanehe ndí Moisés cóo nĩ sata caa ndíi-dí xití yucu, ducaⁿ càda ñaha-güedé cata caa ñaha-güedé núú cùrúxí xii yúhú Tée cùu ñanì tnáhá-ndó nchaa-ndo ìⁿ nduu, ¹⁵ te ducaⁿ yãha-í cuèndá nchaa ñáyiu na quìndáá iní ñáhá xii-í te nduu táhũ-yu cundecú-yu ndìhi Yá Ndiõxí ni caa ni quíhíⁿ —càchí-gá xáhaⁿ-gã xii-dé.

Yá Ndiõxí ío cùu iní-gá ñáyiu ñuyúú-a

¹⁶ Te Yá Ndiõxí ío cùu iní-gá ñáyiu ñuyúú-a. Te ìⁿdìi-ni Déhe-gá ndécú, te ní tendaha ñàha-gá ní quixi-gá ñuyúú-a, te núu na quìndáá iní ñáhá ñáyiu, te vá cuíta nihnú-yu, chi nduu táhũ-yu cundecú-yu ndìhi-gá ni caa ni quíhíⁿ. ¹⁷ Te Yá Ndiõxí ñá túú ní tëndaha-gá Déhe-gá quixi-gá ñuyúú-a

dacuíta nihnu-gá ñáyiú, chi ní tendaha-gă Déhe-gá ní quixi-gá sá dácacu nihnu-gá ñáyiú ñuyíú-a núú ùhú núú ndàhú.

¹⁸ Nchaa ñáyiú sàndáá iní ñáhá xii Déhe-gá, te vá cuíta nihnú-yu. Te nchaa ñáyiú ñá túú sàndáá iní ñáhá xii Déhe-gá ñùhú-yu ichi cuáháⁿ-yu núú ùhú núú ndàhú, chi ñá túú sàndáá iní-yu Déhe Dútú Ndiöxí. ¹⁹ Chi ní quixi Déhe-gá ñuyíú-a ní dándíxí tũu-gá iní-yu cuèndá cutnùní iní-yu nàcuáa ndùu cuendá Yă Ndiöxí te tñíⁿ-yu ìⁿ ichi váha ni cùu, te ñá ní tñàhá iní-yu, chi ní cudíí-gă iní-yu nchaa sá cuèhé sá dúhá dácúúxí să vâha, núú xíăⁿ tá xíta nihnú-yu cuáháⁿ. ²⁰ Te nchaa ñáyiú quide nchaa sá cuèhé sá dúhá ñă tñàhá iní-yu cutnùní iní-yu nàcuáa ndùu cuendá Yă Ndiöxí, te ñá tñíⁿ-yu tñúhu-gá cuèndá yùhú-yu nduu tñùní nchaa sá quidě-yu. ²¹ Te nchaa ñáyiú ñùhu ichi ndáá cuíní-yu cutnùní iní-yu nàcuáa ndùu cuendá Yă Ndiöxí, te cùtnuní sá chíndèe ñaha-gá xíí-yu, chi quide váha-yu.

Té Juàá tée dàcuandute ñaha xii ñáyiú càháⁿ váha tucu-dé cuèndá Jèsús

²² Te sátá dúcáⁿ ñí cuu, te ní quee Jèsús cuáháⁿ-gá ndihi cue tée xica cuu ndihi-gá distritú Jùdeá. Te yàcáⁿ ní xíndecu tnaa-gá ndihi-güedé ní xóo dacuandute-güedé ñáyiú. ²³ Te ndècu té Juàá ìⁿ xichi núú nání Ènón yatni ñuu Sàlém dácuañdute-dé ñáyiú, chi yàcáⁿ ío váha ñùhu ndute, núú xíăⁿ ní xóo quíhíⁿ ñáyiú yàcáⁿ ní xóo cuanduté-yu. ²⁴ Duha ní cuu cùtnàhá vátá ngává-gă té Juàá vecaá.

²⁵ Te ní cacu ìⁿ cuèndú ní cáháⁿ cue tée xica cuu ndihi té Juàá ndihi ìⁿ ũú cue tée israél, núú ndédacàa sá vâha-gá cada ñáyiú cuèndá nduu ñí-yu. ²⁶ Te ní sáháⁿ-güedé núú ndécú tē Juàá ní xáhaⁿ-güedě:

—Mèstrú, téé ní quixi núú nǐ xíndecu-n ndàa ingá xio yúte Jòrdán, téé dii cuèndú-xi ní cáháⁿ-n, téé-ǎⁿ dácuañdute-dé tnàhá-dé ñáiyu. Te ío vǎi ñáiyu ní chinchícúⁿ ñáhá xii-dé —càchí-güedé xǎhaⁿ-güedé xii-dé.

²⁷ Te ní xáhaⁿ tǎ Juáa:

—Te vá yǒo ñⁿ ndàcu cada ñⁿ chiuⁿ nacuaa cuu váha iní Yǎ Ndiǒxí, te núú ñá túú mèe-gá chindèe ñaha-gá xií-yu.

²⁸ Te nchòhó sa nàha-ndo sá yǔhú ní cáháⁿ ndáa-í sá ñà díú Crístú cúu-í, dico mee Yǎ Ndiǒxí ní tendaha ñaha-gá yódó nùu-í véxi núú Yáa-áⁿ. ²⁹ Te nchòhó xini-ndó sǎ ñⁿ téé tnǎndaha te xíchí tnǎndaha ndìhi-ná-dé cùndìhi-dé. Te téé ní xica ndáhú ño cùdíí iní-dé ndèdóho-dé nchaa tnúhu càháⁿ téé tnǎndaha-áⁿ. Te ducaⁿ sǎtnahá-xi cùu yúhú, chi ío cùdíí iní-í sá vái ñáiyu ta chinchícúⁿ ñáhá xii Jesús cuáháⁿ. ³⁰ Te uuⁿ-gá cuita cuu vǎi ñáiyu cutnùní iní-xi sá ño cùnuu-gá, te yúhú cuita ndóo ndee-í quíhíⁿ —càchí-dé xǎhaⁿ-dǎ xii-güedé.

Crístú véxi cuuⁿ-gá andiu

³¹ Te ñⁿdìi díí-ni Crístú Yaá véxi cuuⁿ andiu cùnuu-gá núú ñùyíu-a. Te nchaa ñáiyu ndècu ñuyíu-a cùu-yu ñáiyu ñuyíu iha, te càháⁿ-yu sá cúu-xí ñùyíu-a. Dico Crístú Yaá véxi cuuⁿ andiu ³² càháⁿ-gá ñⁿ sá nǐ xini-gá, te càháⁿ-gá ñⁿ sá nǐ tecú dóho-gá. Te ñá túú cuini-yu quindáa iní-yu tnúhu càháⁿ-gá. ³³ Te nchaa ñáiyu tnèi tnúhu càháⁿ Yaá véxi cuuⁿ andiu-áⁿ càháⁿ-yu sá tnúhu Yá Ndiǒxí cúu-xí ñⁿ sá ndáa. ³⁴ Te Déhe-gá Yaá véxi cuuⁿ andiu càháⁿ-gá mee-ni tnúhu-gá. Te ñá ùhú iní-gá ní sáñaha-gǎ Espíritú-gá ndécú ndìhi Déhe-gá. ³⁵ Te Dútú Ndiǒxí ío cùu iní-gá Déhe-gá, núú ní xáhaⁿ-gǎ sá méé-gǎ taxi tnùní-gá nchaandi túhú sá ño. ³⁶ Te nchaa ñáiyu na quindáa iní ñáhá xii Déhe-gá, ñáiyu-áⁿ cundecú-yu

ndihí-gá ni caa ni quíhíⁿ. Te nchaa ñáyiú vá quíndáá iní ñáhá xii Déhe Yá Ndiöxí ío dandòho ñaha-gá xií-yu.

4

Jèsús ndihí ìⁿ ñaha Sàmariá

¹ Te ní níhí cue téé cùu fariséú tnúhu sá vai-gá ñáyiú ta chinchícúⁿ ñáhá xii Jesús. Te ducaⁿ vai-gá-yu ta dàcuandute-gá cuáháⁿ dàcúúxí tẽ Juáá. ² Te cuèi ñá díú mèe-gá dácuaⁿndute ñaha-gá xií-yu, dico cue téé xica cuu ndihí-gá dácuaⁿndute ñaha-güedé xií-yu. ³ Te ní níhí Jèsús tnúhu nàcuáa càháⁿ cue téé cùu fariséú, núu ní ndee-gá distritú Jùdeá cuánuhú tucu-gá distritú Galiléa.

⁴ Te ichi ñùhu-gá ní nayáha-gá distritú Sàmariá. ⁵ Te ní sáa-gá ìⁿ ñúú nání Sìcár te ñúú-áⁿ yíndèhu-xi distritú Sàmariá. Te xíaⁿ cáá yàtni ñuhu núú nĩ sáha táhú ndíi Jàcób déhe ndíi ndíi Chèé. ⁶ Te yàcáⁿ cáá dòco ní cuu cuendá ndíi Jàcób. Te cùu-xi datná cuádava nduu ñùhu Jesús ichi, te ío ní xàú-gá ñùu ní sáa-gá yuhu dòco-áⁿ nĩ ngóo-gá ndétátú-gá. ⁷⁻⁸ Te ní xica cue téé xica cuu ndihí-gá cuáháⁿ-güedé xití ñúú Sìcár cuánguaaⁿ-güedé sá cáxí-güedě. Te yuhu dòco-áⁿ núcòo-gá ní sáa ìⁿ ñadìhí ñaha distritú Sàmariá véxi quéhnu-aⁿ ndute, te ní xáhaⁿ Jèsús:

—Taxi táhú luha ndute na còho-í —càchí-gá xáhaⁿ-gã.

⁹ Te ní xáhaⁿ ñàdìhí-áⁿ:

—¿Ná cuendá da núú-í xicáⁿ-n ndute coho-n? Te yòhó cúú-n tẽe isràèl, te yúhú cúú-í ñaha Sàmariá —càchí-aⁿ xáhaⁿ-aⁿ xii-gá.

Te ducaⁿ nĩ xáhaⁿ-aⁿ, chi ñá túú ndècu váha ñáyiú isràèl ndihí ñáyiú distritú Sàmariá. ¹⁰ Te ní xáhaⁿ Jèsús xii-aⁿ:

—Ñá cútnùní iní-n nã taxi Yá Ndiöxí xii-n, te ni ñã cútnùní iní-n yòo xicáⁿ ndute núú-n. Te núu dícó xini-n

yòo cuu yúhú á, te da mee-n cǎcáⁿ-n ndùte núù-í coho-n, te yúhú taxi-í ndute cundecu ndìhi-n núú cuàháⁿ núú vèxi —càchí-gá xáhaⁿ-gǎ.

¹¹ Te ní xáhaⁿ tùcu ñadihí-áⁿ:

—Tǎtá, nì sá quèhnu-n ndùte ñá túú nèhe-n, te doco-a cùnú víhí, te ñá túú ndèè quíngueheⁿ-n ndùte taxi-n coho-í. ¹² Ndíi Jàcób ñaní tnáhá-ndí ní xíndecu ndèé sanaha ñí cadúha ndíi doco-a ñí tóo ndute ní xihí ndíi, ndìhi nchaa déhe ndíi, ndìhi nchaa quítì ndíi, te ní ndóo cùu cuendá-ndí. ¿Te násai, te yòhó cúnùu-gá-n dàcúúxí ndíi-ǎⁿ? —càchí-aⁿ xáhaⁿ-aⁿ xì-gá.

¹³ Te ní xáhaⁿ Jèsús:

—Nchaa ñáyíu xihí ndute doco-a, te vá cúú vètú dúcáⁿ ìní-yu chí dayìchí ñáhá-ní tùcu-xi ndute-a. ¹⁴ Dico nchaa ñáyíu na còho ndute na cuáñaha-í, te vá ííⁿ ndùu-gá dayìchí ñáhá-xí ndùte-áⁿ xí-yu, chí ndute cuáñaha-í cúú-xí ndùte váha-gá. Te dàtná quée ñihni ndute xítì doco-a, nchaa-ni nduu ñùhu ñá túú yìchí, ducaⁿ sǎt-nahá-xi cada-xi chí candeca-xi ìní-yu ní caa ní quíhíⁿ, te núu na còhó-yu ndute cuáñaha yǔhú —càchí-gá xáhaⁿ-gǎ xii-aⁿ.

¹⁵ Te ní xáhaⁿ-aⁿ:

—Tǎtá, taxi ndute-áⁿ ná còho-í cuendá sá vǎ dáyìchí ñáhá tnáhí-gá-xi ndute. Te vá quíxí-gǎ-í quixi quèhnu-í ndute doco-a —càchí-aⁿ xáhaⁿ-aⁿ xì-gá.

¹⁶ Te ní xáhaⁿ Jèsús:

—Cuàháⁿ cuángàna yíi-n, te quixi-ndo ìha —cachí-gá xáhaⁿ-gǎ xii-aⁿ.

¹⁷ Te ní xáhaⁿ-aⁿ:

—Ñá túú yíi-í —càchí-aⁿ xáhaⁿ-aⁿ xì-gá.

Te ní xáhaⁿ tùcu Jesús:

—Ndáá càháⁿ-n sǎ ñà túú yìⁿ-n. ¹⁸ Dico ní cuu úhúⁿ téé cǎndeca-n, te téé ndèca-n vitna chi ñá díú yìⁿ-n cuu-dé, te ndáá càháⁿ-n sǎ ñà túú yìⁿ-n —cachí-gá xáhaⁿ-gǎ xii-aⁿ.

¹⁹ Te sá dúcáⁿ ñí xáhaⁿ-gǎ ñúu ní xáhaⁿ tùcu-aⁿ:

—Tǎtá, yúhú sání ìní-í sá yòhó cúú-n ìⁿ téé càháⁿ tnúhu Yá Ndiǒxí. ²⁰ Te cue ñaní tnáhá-ndí ní xíndecu ndéé sanaha ñí xóo cada càhnú-yu Yá Ndiǒxí tìndúú-a, dico nchòhó ñáyíu isràél cǎchí-ndó sǎ ndéé ñúú Jerusàlén cada càhnu-o-gá —cǎchí-aⁿ xáhaⁿ-aⁿ xii-gá.

²¹ Te ní xáhaⁿ Jèsús xii-aⁿ:

—Ìⁿ tnúhu na càháⁿ-í-a, te quindáá ìní-n. Sa ta cùyatni sáá nduu sá ñà díú-gǎ mee-ni tìndúú-a, te ni ñà díú-gǎ mee-ni ñúú Jerusàlén cada càhnu-ndo Tátá-ó Dǔtú Ndiǒxí, chi ndèni ní cuu cada càhnu-ndo-gá. ²² Te nchòhó cue ñáyíu Sàmariá chi ñá cùtnùní ìní-ndó ñá cúú sǎ quidé càhnu-ndo, dico nchúhú ñáyíu isràél, chi cùtnuní ìní-ndí ná cúú sǎ quidé càhnu-ndí. Chi ìⁿ téé isràél véxi-dé dàcácu nihnu-dé ñáyíu cuèndá vá quìhíⁿ-yu núú ùhú núú ndàhú. ²³ Te není vitna ngúíta-yu cada càhnu ndisá-yu Tǎtá-ó Dǔtú Ndiǒxí, te cadá-yu ni yùhu ni ìní-yu sá cúú-xí-gǎ, chi mee-gǎ ducaⁿ cuìní-gá cadá-yu cada càhnú-yu-gá. ²⁴ Te Yá Ndiǒxí chi ìⁿ espíritú cúú-gǎ. Te nchaa ñáyíu na càda càhnu ñaha, te cadá-yu ni yùhu ni ìní-yu sá cúú-xí-gǎ te cadá-yu dàtná càháⁿ tnúhu-gá —cǎchí-gá xáhaⁿ-gǎ xii-aⁿ.

²⁵ Te ní xáhaⁿ ñàdìhí-áⁿ:

—Xìní-í sá quíxí tèe cùu Mesías, téé cǎchí-güedé nání Crístú. Te téé-ǎⁿ ná sàá-dé, te cachí tnúhu ndáá-dé nàcuáa cuu —cǎchí-aⁿ xáhaⁿ-aⁿ xii-gá.

²⁶ Te ní xáhaⁿ Jèsús:

—Dìu téé-áⁿ cúú yùhú téé ndàtnúhu ndìhi-n —cǎchí-gá xáhaⁿ-gǎ xii-aⁿ.

²⁷ Te òré-án nǐ ndexìo cue téé xìca cuu ndìhi-gá, te ní cuñúhu-güedé sá ndátnǔhu-gá ndìhi ñadìhí-án. Dico ni ìn-güedé ñá ní xìcáⁿ tnúhú-güedé núú-gǎ nǔu ná cuèndú ndátnǔhu-gá ndìhi ñadìhí-án. ²⁸ Ducaⁿ te ní dándõo ñadìhí-án yoó ndute-aⁿ xíáⁿ, te ní xica-aⁿ cuánuhú-aⁿ ñuú cútnǔhu-aⁿ ñáyiú cuèndá Jèsús. ²⁹ Te ní xáhaⁿ-aⁿ:

—Chí nèhé ná quìhíⁿ-ó, chí quíní-ndó nǎ cúú ìnⁿ téé nùcòo yuhu dòco-án nǔu ñá díú Crístú Yáá ní tendaha Yǎ Ndiõxí véxi ñuyúú-a cùu-dé nǔu ní cáháⁿ ndáá-dé nàcuáa cùu ndecu-í —càchí-aⁿ xǎhaⁿ-aⁿ xíí-yu.

³⁰ Te sá nǐ níhí ñǎyiú ñuú-án tnǔhu, xǎⁿ ní xicá-yu cuáháⁿ-yu. ³¹ Te òré vátá sàá-gá-yu xíáⁿ nǐ xáhaⁿ cuè téé xìca cuu ndìhi-gá xii-gá:

—Mèstrú, cudèhñu na cudehñu-o —cachí-güedé xǎhaⁿ-güedé xii-gá.

³² Te ní xáhaⁿ-gǎ:

—Ndècu ìnⁿ sá caxí-í, ìnⁿ sá ñà túú xìní nchòhó —càchí-gá xáhaⁿ-gǎ xii-güedé.

³³ Te cue téé xìca cuu ndìhi-gá xǐtnàha-güedé:

—Váa lò ñáyiú ní quixi nehe sá nǐ xexi-gá nǔu duha càháⁿ-gá —càchí-güedé xǐtnàha-güedé.

³⁴ Te ní xáhaⁿ-gǎ:

—Dàtná cuíní-ndó cùu vétú ínì-ó òré xéxí-ó, ducaⁿ cùu vétú ínì-í quidè-í nchaa nàcuáa ní cáháⁿ Yǎ Ndiõxí Yáá ní tendaha ñàha xii-í véxi-í ñuyúú-a, te chiuⁿ-gá ío cùdíhí ínì-í dandìhi-í. ³⁵ Te nchòhó càchí-ndó sǎ cùmání cǔmí-gǎ yóo te cuu itú. Dico yúhú càchí-í sá cundehe-ndo ñáyiú-ǎⁿ, chí sa ndècu túha-yu, dàtná cúú-nǎ itú sá sà ní cuu-ná natahu-o cùú-yu, chí sa ndècu túha-ná-yu cundedóho-yu tnúhu-í. ³⁶ Te dàtná cúú ñǎyiú nàtahu itú chí sa cúhuⁿ yáhu-yu, ducaⁿ sǎtnahá-xi cùu ñáyiú na càháⁿ tnúhu-í, chí cuáñaha-í sá ndúú tǎhǔ-yu na sàá nduu. Te nchaa

ñáyiú na tñií tnúhu-í te nduu táhũ-yu cundecu-í ndihí-yu ní caa ní quíhíⁿ. Te dàtná cúú ñáyiú ní chihi tatá-xi, ndihí ñáyiú ní natahu ítú-xi cùdíí-nă iní-yu. Ducaⁿ sãtnahá-xi cùú ñáyiú na càháⁿ tnúhu-í. ³⁷ Chi ndáá quée-xí nàcuáa cuáháⁿ ìⁿ cuèndú sá càchí-xi: “Tucu téé ní chihi tatá, te tucu téé ní natahu”, duha cuáháⁿ cuèndú-áⁿ. ³⁸ Te yúhú tendaha ñaha-ĩ xii-ndo quíhíⁿ-ndó cãháⁿ-ndó tnúhu-í núú sà ní yáha-güedé ní cáháⁿ-güedé tnúhu-í. Te nchòhó quíhíⁿ-ndó dìcò-nă nduu cuèndá-ndó chiúⁿ-áⁿ —càchí-gá xáhaⁿ-gă xii-güedé.

³⁹ Te ío cuéhé ñáyiú ñuú-áⁿ nĩ xíndèdóho-yu cuèndú ní cani ñadìhí-áⁿ nũ-yu sá Jèsús ní xáhaⁿ-gă nchaa nàcuáa quide-aⁿ, te xǎⁿ ío vǎi-yu ní sándáá iní-yu Jèsús. ⁴⁰ Te ní quexió-yu núú ndécú-gă, te ní cáháⁿ ndàhú-yu núú-gă sá quéndò-gá ñuú-yu, núú xǎⁿ ní xíndecu-gá ndihí-yu úú nduu. ⁴¹ Te ío cuéhé-gă-yu ní sándáá iní-yu tnúhu ní cáháⁿ méé-gă. ⁴² Te ní xáhăⁿ-yu xii ñadìhí-áⁿ:

—Vitna te ñá díú mèe-ni tnúhu ní cáháⁿ-n ní sándáá iní-ndí-gá, chi ní cáháⁿ méé-gă ní xíndedóho-ndí vitna núú ní sándáá ndisa iní-ndí sá díú-gă cúú-gă Crìstú Yaá ní tendaha Yă Ndiǒxí véxi ñuyíú-a dàcácu nihnu-gá ñáyiú núú ùhú núú ndàhú —càchí-yu xáhăⁿ-yu xii-aⁿ.

Jèsús quidé tãtna-gá déhe ìⁿ téé ndèé chíúⁿ nũú gob-ièrnú

⁴³ Te nduu úní ní nucúhuⁿ Jèsús ichi cuáháⁿ-gá distritú Galileá. ⁴⁴ Te cuáháⁿ-gá yàcáⁿ, chi mee-gă ní cachí-gá sá nũú ìⁿ téé na càháⁿ-dé tnúhu Yá Ndiǒxí ñuú núú nĩ cacu-dé, te ñá túú nèhé-yu sá yíñũhu núú-dě. ⁴⁵ Te òré ní sáá-gá distritú Galileá, te ío váha ní cuu iní ñáhă-yu xii-gá, chi cuèndá tnhá-yu ní xíndecu ndihí-gá vico pàscuá ñuú Jerusàlén. Te yàcáⁿ ní xiní-yu nchaa sá nĩ quide-gá.

SAN JUAN 4:46 19 SAN JUAN 4:54

⁴⁶ Te ní sáháⁿ tucu-gá ñuú Cànaá ìⁿ ñuú yíndèhu distritú Galileá, núú nǐ nadatiù-gá ndute ní nduu-xi vínú. Te ñuú Capèrnaúm ndécú ìⁿ téé ndèé chíúⁿ núú tée cùu gobiernú, te téé-áⁿ cùhú ìⁿ déhe-dé. ⁴⁷ Te ní níhí-dě tnúhu sá nǐ ndee Jèsús distritú Jùdeá ní ndexìo-gá distritú Galileá, núú ní sáháⁿ-dé núú ndécú-gă, te ní cáháⁿ ndàhú-dé núú-gă sá quìhíⁿ-gá cada tátna-gá déhe-dé, chi sa ndècu-na-dé sá cùú-dé. ⁴⁸ Te ní xáhaⁿ Jèsús xii-dé:

—Nchòhó, chi vá quíndáá iní ñáhá-ndó xii-í te núú vá cáda-í ìⁿ sá vǎ yòo tnàhí ndàcu cada quiní-ndó —càchí-gá xáhaⁿ-gă xii-dé.

⁴⁹ Te ní xáhaⁿ tùcu téé cùhú déhe-xi-áⁿ xii-gá:

—Tátá, cundee iní-n ná quìhíⁿ-ni-o cáda tátna-n dèhe-í ná cuu-dé, chi càhú víhí tnàhá-dé —càchí-dé xáhaⁿ-dě xii-gá.

⁵⁰ Te ní xáhaⁿ Jèsús:

—Cuanùhú te quiní-n nǎ ní ndúha déhe-n —càchí-gá xáhaⁿ-gă xii-dé.

Te ní sándáá iní-dé tnúhu ní cáháⁿ Jèsús, te cuánuhú-dé. ⁵¹ Te ñuhu-dé ichi cuánuhú-dé ní sánú tnàhá ñáhá cuè téé xìnu cuechi núú-dě. Te ní xáhaⁿ-güedě sá sà ta ndúha déhe-dé cuáháⁿ.

⁵² Te ní xícáⁿ tnúhú-dě núú-güedě ná òré cúú-xí nǐ ngúíta-xi ta quètaú cuéhé-dě. Te ní xáhaⁿ-güedě:

—Icu dàtná òré caá ìⁿ sacuaa ní nchíco-dé cahni —càchí-güedé xáhaⁿ-güedě xii-dé.

⁵³ Te tátá tée cùhú-áⁿ nǐ ndacu iní-dé sá díú òré ní quètaú cuéhé-dě ní cáháⁿ ndíhí-dé Jèsús ní xáhaⁿ-gă sá ndúha déhe-dé. Te xíáⁿ núu ndí nchàa téé-áⁿ vehe-dé ní sándáá iní-yu Jèsús.

⁵⁴ Te sá nǐ quide-gá-áⁿ cúú ùú xito quide-gá sá vǎ yòo tnàhí ndàcu cada. Te sá nǐ quide-gá xito cùu uú-áⁿ

cúu-xí sǎ nǐ quide-gá cútnàhá ní ndee-gá distritú Jùdeá cuánuhú-gá distritú Galileá.

5

Jèsús quidé tǎtna-gá ìⁿ téé cùhú ìⁿ xichi núú nání Bètesdá

¹ Te sáta dúcáⁿ nǐ cuu, te ní tnahá nduu nǐ quide ñáyiú israél ìⁿ vico. Te ní sáháⁿ Jèsús ñuú Jerusàlén. ² Te ní càa xico yuhu ñuú-áⁿ ñúhú dòco, te titní yèhe-xi ndecu. Te ìⁿ yèhe-xi-áⁿ nání Yùyehe Mbéé, te yatni xiáⁿ cáá ìⁿ tanquí ndute dàna-ní-yu Bètesdá tnúhu mèe-yu tnúhu hèbreú, te yuhu tànquí-áⁿ cáá ùhúⁿ corrèdór. ³ Te xití corrèdór-áⁿ xǐndecu cuéhé ñáyiú cùhú, ñáyiú cuàá, ñáyiú yacua, ñáyiú ñá cúu-gǎ candá nihnu, ndètú-yu candá ndute-áⁿ. ⁴ Chi nihí-yu tnúhu sá àma nihnu cùuⁿ ìⁿ espíritú xínú cuèchi núú Yǎ Ndiòxi, te dàcandá-xi ndute ñùhu tanquí-áⁿ. Te ñáyiú díhna nuu nà quée xití ndute-áⁿ, te òré-ni ndúha-yu. ⁵ Te yàcáⁿ ñútnàhá ìⁿ téé ní cuu ócò sáhúⁿ úní cuíá sǎ cùhú-dé. ⁶ Te ní xiní Jèsús cáá-dé, te ní cutnùní iní-gá sá nǐ cuu cuéhé cuíá cùhú-dé, te ní xáhaⁿ-gǎ:

—¿Cuíní-n ndùha-n-ǎⁿ? —càchí-gá xáhaⁿ-gǎ xii-dé.

⁷ Te ní xáhaⁿ tǎe cùhú-áⁿ:

—Tǎta, vá yǎo nihí-í dàquée ñaha xì-í xití tànquí-a òré càndá ndute, chi òré cuíní-í quée-í, te ìngá-ni tucú-yu quènduú-yu núu-í cuángueé-yu —càchí-dé xáhaⁿ-dǎ xii-gá.

⁸ Te ní xáhaⁿ Jèsús:

—Ndacuíñí, te ndaca-ni-n yùu-n, te caca-n —càchí-gá xáhaⁿ-gǎ xii-dé.

⁹ Te òré-ni-áⁿ nǐ ndúha téé cùhú-áⁿ, te ní ndaca-ni-dé yuu-dé, te ní xica-dé cuáháⁿ-dé. Te nduu-ǎⁿ cúu-xí ndùu

ndetatú ñáyiú, ¹⁰ núu ní xáhaⁿ cuè téé isràél xii téé ní cuhu-áⁿ:

—Vitna cùu-xi nduu ndetatú-ó nũu vá cúú cuìdo-n yuu-n —cachí-güedé xǎhaⁿ-güedě xii-dé.

¹¹ Te ní xáhaⁿ-dě:

—Mee tēē ní quide tátna ñaha xìi-í ní cachí-dé sá ndácàni-í yuu-í, te caca-í —càchí-dé xǎhaⁿ-dě xii-güedé.

¹² Te ní xáhaⁿ-güedě:

—¿Te ná cúú tēē ducaⁿ nĩ cachí sá ndácàni-n yuu-n te caca-n-i? —càchí-güedé xǎhaⁿ-güedě xii-dé.

¹³ Dico téé ní cuhú-áⁿ ñà túú ní cùtnuní iní-dé ná cúú tēē ní quide tátna ñaha xii-dé, chi Jèsús òrè-ni ní xica-gá cuáháⁿ-gá tnuú nchaa ñáyiú chitu xĩndecu xíaⁿ. ¹⁴ Te sátá dúcáⁿ te ní naníhí tnáhá Jèsús ndihi téé ní quide tátna-gá-áⁿ xití veñúhu càhnu sá ÿo cùnuu, te ní xáhaⁿ-gǎ xii-dé:

—Ní xiní-n nǎ ní ndúha-n-va. Te vitna vá cáda-gǎ-n nǎndi sá cuèhé sá dúhá, chi núu na càda-ni-n ña, te quixi ingá cuèhé, te vihi-gá ndoho-n —càchí-gá xáhaⁿ-gǎ xii-dé.

¹⁵ Ducaⁿ te ní xica téé ní cuhú-áⁿ cuǎngúñaha-dě xii cue téé isràél sá Jèsús ní quide tátna ñaha-gǎ xii-dé. ¹⁶ Núu sátá nĩ níhí cue téé isràél tnúhu, te ní cuu úhú iní-güedé Jèsús. Te ní cuiní-güedé cahni ñaha-güedě xii-gá cuendá sá dúcáⁿ nĩ quide tátna-gá nduu ndetatú-güedé. ¹⁷ Te ní xáhaⁿ Jèsús xii-güedé:

—Tǎtá-í Dútú Ndiǒxí quidé chiúⁿ-ni-gá nũu xǎⁿ quidé chiúⁿ-í tnáhá-í —càchí-gá xáhaⁿ-gǎ xii-güedé.

¹⁸ Te ní cudééⁿ-güedě sá ñǎ ní cǎnehe íi-gǎ nduu ndetatú-güedé, te ní cuiní-güedé cahni ñaha-güedě, te uuⁿ-gá ní cuiní-güedé cahni ñaha-güedě xii-gá sá nĩ cachí-gá sá Tǎtá-gǎ cúú Dútú Ndiǒxí, chi ní sani iní-güedé sá cuiní-gá nútnahá-gá Yǎ Ndiǒxí nũu xǎⁿ ío ní cudééⁿ-güedě.

Jèsús Déhe Yá Ndiǒxí táxi tnùní-gá

¹⁹ Te ní xáhaⁿ tùcu Jesús xii-güedé:

—Na càchí tnúhu ndáá-í xii-ndo sǎ yǎhú chi ni ìⁿ sá ñǎ ndácù-í cada mee-í nǔu ñá túú mèe Tàtá-í dánèhé ñáhá-gǎ xii-í nàcuáa cada-í, chi nchaa sá quidé Tàtá-í quidé-í tnàhá-í. ²⁰ Te Tàtá-í ío cùu iní ñáhá-gǎ xii-í nǔu dànèhé ñáhá-gǎ nchaa nàcuáa quide-gá. Te vitna ndècu vai-gá chiⁿ tahu-gá cada-í, chiⁿ sá vǎtá quini-gá-ndó càda-í nàcuáa cuñúhu vìhi-ndo. ²¹ Chi Tàtá-í dandòto-gá ñáyiu ní xíhí. Te yúhú cada-í te nduu táhú nchaa ñáyiu càchí iní-í cundecu ndíhi ñáhá-yu xii-í ni caa ni quíhíⁿ. ²² Te na sáa nduu te ñá díú Tàtá-í cada ndáá-gá cuéchi ñáyiu, chi ní cachí-gá sá yǎhú cada ndáá-í ²³ cuendá nchaa ñáyiu canehé-yu sá yíñùhu núu-í dàtná nehé-yu sá yíñùhu núu Tàtá-í Yaá ní tendaha ñàha xii-í véxi-í ñuyíú-a. Te nchaa ñáyiu ñá túú nèhe sá yíñùhu núu yǎhú, te ni nǔu Tàtá-í ñá túú nèhé-yu sá yíñùhu.

²⁴ Te na càchí tnúhu ndáá-í xii-ndo sǎ nchaa ñáyiu na cùndedóho tnúhu na càháⁿ-í, te núu na quindáa iní-yu Dútú Ndiǒxí Yaá ní tendaha ñàha xii-í véxi-í ñuyíú-a ña, te vá cuíta nihnú-yu chi nduu táhǔ-yu cundecú-yu ndíhi-gá ni caa ni quíhíⁿ. ²⁵ Te vitna na càchí tnúhu ndáá-í xii-ndo sǎ nchaa ñáyiu ndècu ichi cuehé ichi duha cùu-yu dàtná ìⁿ ñáyiu ní xíhí, te vitna ní sáa nduu cùndedóho-yu tnúhu càháⁿ yúhú Déhe Dútú Ndiǒxí, te nchaa ñáyiu na quindáa iní-xi, te naníhí tǎhú-yu. ²⁶ Te dàtná quidé mèe Tàtá-í dácácu nihnu-gá ñáyiu, ducaⁿ ñí cachí-gá cada-í dácácu nihnu-í-yu. ²⁷ Te ní cachí tucu-gá sá sáa ìⁿ nduu, te cada ndáá-í cuéchi nchaa ñáyiu ñá túú quide ndáa, chi yúhú táxí tnùn-í, te cùu-í ñaní tnáhá-ndó nchaa-ndo. ²⁸ Te ni vǎ cúñùhu-ndo tnúhu càháⁿ-í, chi sáa nduu te nchaa ñáyiu ní xíhí tecú dóho-yu tnúhu càháⁿ-í. ²⁹ Te ndoto nchaa

ñáyiú ní quide váha cundecu ndihi-í-yu ni caa ni quíhíⁿ,
te ndoto tnahá nchaa ñáyiú ní quide cuèhé ní quide duha,
te ñáyiú-áⁿ quíhíⁿ-yu núú ùhú núú ndàhú.

Yá Ndiöxí chindèe tñúhu-gá Jèsús

³⁰ Te yúhú, chi ni ìⁿ sá ñă ndácù-í cada mee-í nũu ñă díú mée Yá Ndiöxí táúchìuⁿ-gá nàcuáa cada-í. Te quide ndáá-í cuèchi ñáyiú nàcuáa tàxi tñuní-gá cada-í, te yúhú ñă túú quide-í sá cúú ìní mée-í chi Tàtá-í ní táúchíúⁿ-gă nàcuáa cada-í. ³¹ Te núu na càháⁿ-í sá mée-í táxi tñuní-í, te vá quíndáá iní-ndó. ³² Chi Yá Ndiöxí chindèe tñúhu ñaha-gă xii-í, te yúhú xìní-í sá tñúhu càháⁿ-gá cuendá-í cúú-xí ìⁿ sá ndàá. ³³ Te nchòhó ní téchíúⁿ-ndó cuè téé ní sáháⁿ ní ndúcú tñúhu-güedé núú tẽ Juáá nũu ná tñúhu cáháⁿ-dé cuendá-í, te téé-ăⁿ ní cáháⁿ ndáá-dé nàcuáa ndùu cuendá-í. ³⁴ Dico yúhú, chi ñă túú xìni ñuhu-í ìⁿ ñáyiú ñuyúú-a chindee tñúhu ñàhá-yu xii-í, dico té Juáá ní cáháⁿ váha-dé cuendá-í, te xíăⁿ càchí tñúhu tucu-í cuendá quíndáá iní-ndó, te naníhí tàhú-ndó. ³⁵ Te dàtná cuìní-ndó cùu ìⁿ iti ndéñuhú te dáyehé-xi, ducaⁿ sãtnahá-xi ní cuu té Juáá, chi sacú-ni nduu ío ní cudíí iní-ndó tñúhu ní cáháⁿ-dé. ³⁶ Te váha-ni ní cáháⁿ té Juáá, dico yúhú chi ndècu nchaa sá tá quide-í véxi nàcuáa ní táúchíúⁿ Yă Ndiöxí cada-í, te nchaa xíăⁿ cúú-xí ìⁿ sá cútñuní iní-ndó sã mée Yă Ndiöxí ní tendaha ñàhá-gá xii-í véxi-í ñuyúú-a. ³⁷ Te ñiú-ni-gá chindèe tñúhu ñaha-gă xii-í, dicó-ni sá mée-ndó ñà túú cuìní-ndó càda cuendá-ndó tñúhu càháⁿ-gá, te ni ñà túú xìní-ndó nàcuáa càa-gá. ³⁸ Te ñă túú quèe iní nchòhó tñúhu càháⁿ-gá, chi ñă túú sàndáá iní ñàhá-ndó xìi yúhú Déhe-gá. ³⁹ Te dàcuaha vihi-ndo tutú ndèe tñúhu-gá, chi sàni iní-ndó sã xíăⁿ-ni dacuàha-ndo te naníhí tàhú-ndó. Te váha-ni quide-ndo, chi ñiú tutú-áⁿ càháⁿ-xi cuendá-í. ⁴⁰ Te nchòhó

ñá túú cuení-ndó quèndáá iní ñáhá-ndó xii-í cuèndá naníhí tǎhú-ndó.

⁴¹ Te yúhú, ñá túú xini ñuhu-í sá cáda càhnu ñaha-ndo xii-í. ⁴² Dico sa xini-í nàcuáa sàni iní-ndó chi ñá túú cùu iní-ndó Yǎ Ndiǒxí. ⁴³ Te yúhú véxi-í ñuyú-a chi Tǎtà-í ní tendaha ñàha-gá, te nchòhó ñá túú cuení-ndó tnèi-ndo tnúhu càháⁿ-í, dico núu quixi ìⁿ tée cáháⁿ cuèndá mée-xí, chi quèndáá iní-ndó. ⁴⁴ Te ná váha nchòhó ná tnèi-ndó tnúhu càháⁿ-í, te xio xio-ni quide cahnu tnaha-ndo, te ñá túú quide cuèndá-ndó sǎ tnúhu váha càháⁿ Yǎ Ndiǒxí cuu xii-ndo. ⁴⁵ Te vá cání iní-ndó sǎ yúhú ndàcáⁿ cuèchi-í núú Tǎtà-í nàcuáa quide-ndo, chi ndí Moisés ní chídó tnùní ndíi núú tütú Yǎ Ndiǒxí nàcuáa quide-ndo sá ñà túú quide váha-ndo, te mee-ndo sàni iní-ndó sǎ naníhí tǎhú-ndó cuèndá tnúhu ní cáháⁿ ndíi. ⁴⁶ Chi núu nchòhó sàndáá ndisa iní-ndó tnúhu ní cáháⁿ ndíi Moisés ñá, te ducaⁿ te quèndáá iní-ndó yúhú ní cùu, chi ndí-ǎⁿ ní chídó tnùní ndíi nàcuáa cada-í ñuyú-a vitna. ⁴⁷ Te núu ñá túú sàndáá iní-ndó tnúhu ní chídó tnùní ndíi, te ñu-ni ducaⁿ càda ñaha-ndo xii-í vá quèndáá iní-ndó tnúhu càháⁿ-í — càchí-gá xáhaⁿ-gǎ xii-güedé.

6

Jèsús dácàxi-gá úhúⁿ mǐl ñáyiu

(Mt. 14:13-21; Mr. 6:30-44; Lc. 9:10-17)

¹ Te sátá dúcáⁿ ñí cuu, te ní quee Jèsús cuáháⁿ-gá ingá xio yuhu làgúná Galileá, àdi Tiberiás chi úú ñu-xi. ² Te ío cuéhé ñáyiu nchícúⁿ ñáhá xii-gá cuáháⁿ cuèndá sá ñí xini-yu nchaa sá vǎ yǒo tnàhí ndàcu cada ní quide-gá, chi ní quide tátna-gá nchaa ñáyiu cùhú. ³ Te ní sáá Jèsús ndíhi cue tée xica cuu ndíhi-gá ìⁿ núú tìndúú, te xíaⁿ ñí ngóo-gá ndíhi-güedé. ⁴ Te ta cùyatni coo vico pascuá, vico quide

ñáyiú isràél. ⁵ Te ní xiní-gá sá ïo vài ñáyiú nchìcúⁿ ñáhá xii-gá cuáháⁿ, te ní xáhaⁿ-gǎ xii té Lìpé:

—¿Ndèè quíhíⁿ-ó quǐnguaaⁿ-o sǎ cǎxí nchàa ñáyiú-a? —
càchí-gá xáhaⁿ-gǎ xii-dé.

⁶ Te ducaⁿ ní xáhaⁿ-gǎ xii-dé cuèndá sá cuíní-gá quíní-gá nása cunduu tnúhu cáháⁿ-dé, dico mee-gǎ sa xiní-gá nàcuáa cada-gá. ⁷ Te ní xáhaⁿ tǎ Lìpé xii-gá:

—Te cuèi úú cièndú díhúⁿ denàriú ná dàndonúhu-o cuaaⁿ-o paá, te ni vǎ tnàhá caxí-yu luha luha —càchí-dé xáhaⁿ-dǎ xii-gá.

⁸ Te té Ndríxí ingá téé xìca cuu ndíhi-gá, ñaní té Xímú, àdi Pelú chi úú dǐu-dé, ní xáhaⁿ-dǎ:

⁹ —Iha ndècu ìⁿ té líhli nèhe-dé úhúⁿ pàá cebàdá te úú chácá, dico ndǎe tnahá xéhé, te cuéhé víhí ñáyiú —
càchí-dé xáhaⁿ-dǎ xii-gá.

¹⁰ Te ní xáhaⁿ Jèsús xii-güedé:

—Chí cǔñaha nà ngóo-yu nchaá-yu —càchí-gá xáhaⁿ-gǎ.

Te ñáyiú-áⁿ ní ngóo-yu, te càa vihi ité núú ní ngóo-yu-áⁿ, te xínu dàtná úhúⁿ mǐl mee-ni cuè téé, te dǐiⁿ ñáyiú dǐhí ndíhi landú. ¹¹ Te ní queheⁿ Jèsús pàá, te ní ndacáⁿ táhú-gǎ núú Yǎ Ndiǒxí, te ní sáñaha-gǎ pàá-áⁿ xii cue téé xìca cuu ndíhi-gá, te cue téé-áⁿ ní dácǎhñu-güedé ní xexi nchaa ñáyiú xǐxúcu-áⁿ. Te dǐu-ni ducaⁿ ní quide-gá chácá, te ní dácǎhñu tucu-güedé-dǐ ní xexi ñáyiú ní ndahá xití-yu. ¹² Te òré ní túhú cóhǒ-yu, te ní xáhaⁿ Jèsús xii cue téé xìca cuu ndíhi-gá sá ná nàqueheⁿ-güedé nchaa sá ní quendóo cuèndá sá vǎ quíhíⁿ-xi núú míhí.

¹³ Te cue téé-ǎⁿ ní naqueheⁿ-güedé nchaa sá ní quendóo, te ní chítú ùxúú tídihi núú ùhúⁿ-ni pàá cebàdá.

¹⁴ Te sá ní xiní-yu ní nadacàyá-gá sá ní xexí-yu, xǐáⁿ ní ngúíta-yu ní xítnàhá-yu:

—Ndáá sá t̄e-a sa ió cuendú sá quíxí-dě ñuyíú-a cáháⁿ-dé tñúhu Yá Ndiöxí —càchí-yu x̄itnàhá-yu.

¹⁵ Te ní cutnùnì iní Jèsús sá cádá yìcá-yu can-deca ñàhá-yu xii-gá quíhíⁿ cuendá cundecu-gá quindaha ñàha-gá xii-yu ni cùu, núu xǎⁿ ní xica tucu-gá cuáháⁿ-gá xití yucu mee òi chícuú-gá.

Jèsús xícá-gǎ núu ndute

(Mt. 14:22-27; Mr. 6:45-52)

¹⁶ Te òré ní cuu ndiquiⁿ, te cuáháⁿ cue tée xica cuu ndihi-gá yuhu làgúná. ¹⁷ Te ní quée-güedé bàrcú cuáháⁿ-güedé ñúu Capèrnaúm cáá ndàa ingá xio yuhu làgúná, te sa ní cuu ndiquiⁿ, te ñà túú Jèsús quexìo quée-gá bàrcú ñúhú-güedé-áⁿ. ¹⁸ Te ní ngüíta-xi quène táchí ñíhi, te níhi dácandau ndéé tñáhá ndùte làgúná-áⁿ. ¹⁹ Te sa ní cuu dàtná úhúⁿ kilómetrú cuáháⁿ-güedé, te ní xiní-güedé Jèsús tá cùyatni-gá bàrcú ñúhú-güedé véxi-gá núu ndúté, te ní yùhú-güedé. ²⁰ Te ní xáhaⁿ Jèsús xii-güedé:

—Yúhú véxi-í, vá yùhú-ndó —càchí-gá xáhaⁿ-gǎ xii-güedé.

²¹ Te ío ní cudíí ìní-güedé sá ñǎ quexìo-gá cuánguee-gá bàrcú, te òré-ni ní quexìo-güedé ndihi-gá ndéé ingá xio yuhu làgúná núu cuáháⁿ-güedé.

Ñáyiu nànducu ñaha xii Jesús

²² Te ingá nduu-ǎⁿ x̄indecu-ni nchaa ñáyiu ní quendóo yuhu làgúná. Te ní quide cuendá-yu sá ííⁿ òi-ná bàrcú nútñí-áⁿ ní cùu ñà túú-gǎ, chi cue tée xica cuu ndihi Jesús ní quée-güedé bàrcú-áⁿ cuáháⁿ-güedé. Te ní níhí-yu tñúhu sá ñà túú ní quée tñàhá Jèsús. ²³ Te òi-ni nduu-ǎⁿ ñǎ quée ííⁿ úú bàrcú ñúu Tìberías ní sáá-xi yatni núu ñǎ xexí-yu pàá sá ñǎ ndacáⁿ táhú Jèsús núu Yá Ndiöxí.

²⁴ Te ní xiní-yu sá ñà túú Jèsús ndihi cue tée xica cuu

ndihi-gá, núu ní quée-yu bàrcú-án cuáhán-yu ñúú Capèrnaúm cuánúndúcú ñàhá-yu xii-gá.

Jèsús cúú-gă dàtná ìíⁿ sá nchító-ó

²⁵ Te ní sáá-yu ìngá xio yuhu làgúná, xíáⁿ ñí naníhí-yu Jèsús, te ní xáhăⁿ-yu xii-gá:

—Mèstrú, ¿ná òré ní sáá-n ìha? —cachí-yu xăhăⁿ-yu xii-gá.

²⁶ Te ní xáhaⁿ Jèsús:

—Na cəchí tnúhu ndáá-í sá nchòhó nándùcu ñaha-ndo xii-í cuendá-ni sá ñí xexi-ndo ñí ndahá xití-ndó, dico ñá díú cuendá sá ñí quide-í sá vă yôo tnàhí ndàcu cada nanducu ñaha-ndo. ²⁷ Te vá cádá cuendá-ndó să méé-ní să caxí-ndó càda chiuⁿ-ndo chi xíăⁿ vá cúdđi-xi. Chi ío-gá xíní ñùhu-xi cada cuendá-ndó tñùhu Yá Ndiöxí te tñii-ndo, te naníhí tàhú-ndó. Te tnúhu-áⁿ cachí tnúhu yúhú Tée cùu ñaní tnáhá-ndó nchàa-ndo, te xíăⁿ candeca-xi iní-ndó ñí caa ñí quíhíⁿ, chi mee Dütú Ndiöxí ní cachí-gá sá dúcáⁿ càda-í —cəchí-gá xáhaⁿ-gă xii-yu.

²⁸ Te ní xáhăⁿ-yu:

—¿Nása cada-ndí cuendá ngúnu ichi-ndí nàcuáa cuìní Yă Ndiöxí cunduu-í? —cəchí-yu xăhăⁿ-yu xii-gá.

²⁹ Te ní xáhaⁿ Jèsús xii-yu:

—Yá Ndiöxí cuìní-gá sá quíndáá iní ñáhá-ndó xii yúhú, tée ní tendaha-gă véxi ñuyúú-a —cəchí-gá xáhaⁿ-gă xii-yu.

³⁰ Te ní xáhaⁿ tùcú-yu xii-gá:

—¿Ná cúú să vă yôo tnàhí ndàcu cada, cada-n cùn-dehe-ndí cuendá quíndáá iní ñáhá-ndí xii-n-í? ¿Àdi nágá cúú să cádá-n cuendá cutnùní iní-ndí sá ndáá cəháⁿ-n-í?

³¹ Chi cue ñaní tnáhá-ó ñí xíndecu ndéé sanaha ñí xexí-yu pàá nání mànáá xití yucu dàtná yódó tñùní núú tütú Yă Ndiöxí núú cəchí-xi: “Yá Ndiöxí ní sáñaha-gă sá ñí

xexí-yu, te ní cuuⁿ túu-xi andiu”, duha càchí-xi núú tütú-gá —càchí-yu xǎhǎⁿ-yu xii-gá.

³² Te ní xáhaⁿ Jèsús:

—Na càchí tnúhu ndáá-í xii-ndo sǎ ñà díú ndii Moisés ní sǎñaha ndii pàá ní cuuⁿ andiu ñí xexí-yu, chi mee Tǎtà-í ní sǎñaha-gǎ sá ñí xexí-yu. Te sá táxí-gǎ vitna cùu-xi ³³ datná pàá véxi cuuⁿ andiu càndeca-xi iní-ndó ñí caa ñí quíhíⁿ —càchí-gá xáhaⁿ-gǎ xií-yu.

³⁴ Te ní xáhǎⁿ-yu xii-gá:

—Tǎtá, mee-ni pàá-áⁿ taxi-n càxi-ndí —càchí-yu xǎhǎⁿ-yu xii-gá.

³⁵ Te ní xáhaⁿ Jèsús:

—Yúhú cúu-í dàtná ìⁿ sá xéxí-ndó cǎndeca-xi iní-ndó. Te duha ndùu tnúhu càháⁿ-í, chi nchaa ñáyiu na quíndáá iní ñáhá xii-í, te vá ndóhó-gǎ-yu docó te vá ndóhó-gǎ-yu ndute. ³⁶ Dìcò-ni sá nchòhó ñá túú sàndáá iní ñáhá-ndó cuèi xini ñáhá-ndó xii-í. ³⁷ Te nchaa ñáyiu na càchí Tǎtà-í nduu cuèndá-í nasaá-yu núu-í, te ñáyiu-áⁿ vǎ dáquèè tíhù-í-yu. ³⁸ Te ñá díú yúhú sá véxi cuuⁿ-í andiu te quide-í nchaa sá cúú iní mée-í, chi véxi cuuⁿ-í sá cáda-í nchaa nàcuáa ní táúchíúⁿ mée Tǎtà-í Dútú Ndiòxí Yaá ní tendaha ñàha xii-í véxi-í ñuyíú-a. ³⁹ Te cuini-gá sá ncháá ñáyiu ní cachí-gá nduu cuèndá-í vá dáñà-í-yu cuíta nihnú-yu, te na sàá nduu te diu-ni-í dandòto-í-yu. ⁴⁰ Chi ducaⁿ ñí cachí Dútú Ndiòxí cunduu sá ncháá ñáyiu na tñi tnúhu càháⁿ-í, te quíndáá ndisa iní ñáhǎ-yu xii yúhú Déhe-gá, te nduu táhǎ-yu cundecú-yu ndihi Yá Ndiòxí ni caa ñí quíhíⁿ, te yúhú dandòto-í-yu na sàá nduu —càchí-gá xáhaⁿ-gǎ xií-yu.

⁴¹ Te ñá ní tñàhá iní ñáyiu isràél tnúhu ní cáháⁿ Jèsús nùu ní nguíta-yu ní cáháⁿ cuèhé-yu cuèndá-gá cuèndá sá ñí xáhaⁿ-gǎ sá mée-gǎ cúú-gǎ dàtná sá xéxí-ó véxi cuuⁿ andiu. ⁴² Te ní xítñàhá-yu:

—¿Náa ñá díú tǝe-a cùu-dé Jèsús déhe té Chèé? Nchoo xìní-ó tǎtá-dě, te xìní-ó nǎná-dě, ñá cachí-tu tée-a sá andiu vǝxi cuuⁿ-dé! —càchí-yu xǐtnàhá-yu.

⁴³ Te ní xáhaⁿ Jèsús xíi-yu:

—Vá càháⁿ cuèhé-gá-ndó cuendá-í, chí dáñá. ⁴⁴ Vá yǝo quindáá iní ñáhá xii yúhú ñuu ñá túú mèe Tátà-í táxi cuendá ñáhá-gǎ xíi-yu. Te ñiu-gá ní tendaha ñàha-gá xii-í véxi-í, te yúhú dandòto-í-yu na sàá nduu. ⁴⁵ Te núú tütú cue tée ní xóo cáháⁿ tnúhu Yá Ndiǝxí ndéé sanaha càchí-xi: “Yá Ndiǝxí danèhé ñáhá-gǎ xíi-yu tnúhu-gá”, duha càchí-xi. Te nchaa ñáyiú na cùndedóho nchaa tnúhu càháⁿ Dútú Ndiǝxí, te cutúha-yu nàcuáa càháⁿ-gá, te ñáyiú-áⁿ quindáá iní ñáhǎ-yu xii yúhú.

⁴⁶ Te vá yǝo xìní ñáhá xii Dútú Ndiǝxí chi ñndìi-ni yúhú xìní-í-gá, chi núú ndécú-gǎ ní quee-í véxi cuuⁿ-í —càchí-gá xáhaⁿ-gǎ xíi-yu.

⁴⁷ Te xǎhaⁿ tùcu-gá:

—Na càchí tnúhu ndáá-í xii-ndo sǎ nchaa ñáyiú na quindáá iní ñáhá xii-í, te naníhí tǎhú-yu. ⁴⁸ Te yúhú cúu-í dàtná ñⁿ sá xéxi-ndó càndeca-xi iní-ndó, te ducaⁿ sǎtnahá-xi cùu-í chí yúhú cada-í te nduu táhú-ndó cùndecu-ndo ndihi Yá Ndiǝxí ni caa ni quíhíⁿ. ⁴⁹ Te cue ñání tnáhá-ó ñí xíndecu ndéé sanaha ñí xéxi-yu pàá nání mànáá xití yucu, dico ní sáá nduu te dacuití ñí xíhí-yu. ⁵⁰⁻⁵¹ Te yúhú càháⁿ-í cuendá mèe-í, chí véxi cuuⁿ-í andiu. Te cùu-í dàtná ñⁿ sá nchító-ndó, te nchaa ñáyiú na cǎxi te candeca-xi iní-yu ni caa ni quíhíⁿ te vá cuíta nihnu-gá-yu. Te sá táxi-í xii-ndo xíǎⁿ cúu-xí yìqui cuñú-í, te cùu-xi cuendá nchaa ñáyiú ñihí ñuyíú cuendá nduu táhú-yu cundecú-yu ndihi Yá Ndiǝxí ni caa ni quíhíⁿ —càchí-gá xáhaⁿ-gǎ xíi-yu.

⁵² Te ní nguíta ñáyiú isràél xǐtnàhá-yu:

—¿Nása cada-tu téa-a núu càchí-tu-dé sá yìqui cuñú-dé taxi-dé caxi-o-i? —càchí-yu xìtnàhá-yu.

⁵³ Te ní xáhaⁿ Jèsús:

—Na càchí tnúhu ndáá-í xii-ndo sã nõu na càda iní-ndó sã dàtná sá caxí-ndó yìqui cuñú yúhú Tée cùu ñaní tnáhá-ndó nchàa-ndo, te cada tucu iní-ndó sã dàtná sá cóhó-ndó ñíñì-í ñá, te xíãⁿ queé-xí sã quìndáá iní ñáhá-ndó ñì yuhu ñì iní-ndó te naníhí tàhú-ndó, te núu ñáhá te cuíta nihnu-ndo. ⁵⁴ Nchaa ñáyiu na càda iní-xi sá dàtná sá caxí-yu yìqui cùñú-í te cohó-yu ñíñì-í, ñáyiu-áⁿ naníhí tàhú-yu te yúhú dandòto-í-yu na sàà nduu. ⁵⁵ Chi yìqui cùñú-í ndihí ñíñì-í cúu-xí mèe-í. ⁵⁶ Te nchaa ñáyiu na càda iní-xi sá dàtná sá caxí-yu yìqui cùñú-í te cohó-yu ñíñì-í, te ñáyiu-áⁿ ìⁿ-nã cuu-í ndihí-yu chi cundecu ndihí-í-yu. ⁵⁷ Te yúhú nchìto-í chi ducaⁿ nchìto Tátà-í Yaá ní tendaha ñàha xii-í véxi-í ñuyúú-a. Te ñiu-ni ducaⁿ nchàa ñáyiu na quìndáá iní ñáhá xii-í te cundecu ndihí-í-yu ñì caa ñì quíhíⁿ. ⁵⁸ Te yúhú cúu-í dàtná ìⁿ sá nchító-ndó vèxi cuuⁿ andiu, dico ñá díú pàá sá nání mànáá ní xèxi cue ñaní tnáhá-ó ñì xíndecu ndéé sanaha, chí ní xexí-yu pàá te dacuèí ní xíhí-yu. Te nchaa ñáyiu na quìndáá iní ñáhá xii yúhú Yaá véxi cuuⁿ andiu, te cundecu ndihí-í-yu ñì caa ñì quíhíⁿ —càchí-gá xáhaⁿ-gã xii-yu.

⁵⁹ Nchaa tnúhu-a ní cáháⁿ-gá xití veñúhu ñáyiu ñuu Capèrnaúm.

Jèsús càchí tnúhu-gá nàcuáa naníhí tàhú-ó

⁶⁰ Te sá dúcáⁿ ñì cáháⁿ-gá nõu vai ñáyiu nchìcúⁿ ñáhá xii-gá ní xìtnàhá-yu:

—Vá tníí cuiti-o tnúhu càháⁿ-dé chí ñá díú tnúhu sá cúu vâha iní-ó càháⁿ-dé —càchí-yu xìtnàhá-yu.

⁶¹ Te ní cutnùní iní Jèsús sá ñà túú càháⁿ váha-yu cuendá tnúhu ní cáháⁿ-gá, núu ní xáhaⁿ-gă xií-yu:

—¿Náa ñá tnàhá iní-ndó nàcuáa càháⁿ-í-a? ⁶² Te uuⁿ-gá cada nchòhó nũu quiní-ndó yǔhú Tée cùu ñaní tnàhá-ndó nchàa-ndo ndaa-í núú ñí xíndecu-í díhna. ⁶³ Te espíritú ndécú ndìhi yiqui cuñú-ó, xǎⁿ ndécá ñaha-xi xii-o, te núu ñá túú xǎⁿ, te yiqui cùñú-ó ñà túú nàndíhi-xi. Dico núu nchaa tnúhu càháⁿ-í-a quée-xi iní-ndó ñá, te quiní-ndó ñá xéhé candeca ñaha-xi xii-ndo núú cuaháⁿ núú vǔxi. ⁶⁴ Te dava nchòhó chi ñá túú sàndáá iní-ndó —càchí-gá xáhaⁿ-gă xií-yu.

Te ducaⁿ ñí xáhaⁿ-gă chi sa nàha-gá nándi cùu ñáyiú vá quìndáá iní ñáhá xii-gá. Te ducaⁿ sà naha-gá ndèdacàa tée cuáha cuendá ñáhá xii-gá núú cuè tée cùu úhú iní ñáhá. ⁶⁵ Te ní xáhaⁿ tùcu Jesús xií-yu:

—Te duha càháⁿ-í chi sa ní cachí tnúhu-í xii-ndo sǎ vǎ yǒo ñíⁿ cuíní tñí tnúhu-í te núu ñá túú Tàtà-í Dútú Ndiǒxí sánú ìchi ñaha-gá xií-yu —càchí-gá xáhaⁿ-gă xií-yu.

⁶⁶ Te òré-áⁿ ïo vài ñáyiú nchìcúⁿ ñáhá xii-gá ní xócǒo-yu ñá ní xìca cuu-gá-yu ndìhi-gá. ⁶⁷ Te xǎⁿ ní xáhaⁿ Jèsús xii ndi ùxúú cue tée xìca cuu ndìhi-gá:

—¿Cuíní-ndó dàndóo ñaha-ndo tnàhá-ndó-ǎⁿ? —càchí-gá xáhaⁿ-gă xii-güedé.

⁶⁸ Te ní xáhaⁿ tǔ Xímú, àdi Pelú chi úú dǔu-dé:

—Mèstrú, ñá túú-gă ndèé quíhíⁿ-ndí, chi nchúhú náhá-ndí sá tnũhu mee-n cùu-xi sá vǎha candeca-xi iní-ndí ñí caa ñí quíhíⁿ. ⁶⁹ Chi nchúhú sa ní sàndáá iní ñáhá-ndí xii-n chi nàha-ndí sá yòhó cúú-n Crìstú Déhe Dútú Ndiǒxí yaá ndécú àndiu —cachí-dé xáhaⁿ-dǔ xii-gá.

⁷⁰ Te ní xáhaⁿ Jèsús:

—Nàha-ndo sá yǎhú ní cáháⁿ ñáhà-í xii ndi ùxúú-ndó xìca cuu ndihì ñaha-í xii-ndo, dico ììⁿ-ndo quǎhu ñaha yùcu ñávàha xii-ndo —càchí-gá xáhaⁿ-gǎ xii-güedé.

⁷¹ Duha ní cáháⁿ Jèsús cuèndá té Jùdás déhe té Xímú Iscàrioté ììⁿ téé ñùtnahá núú ùxí ììⁿ cue téé xìca cuu ndihì-gá, chi sa nàha-gá sá tǎe-ǎⁿ cuǎha cuèndá ñáhá-dě xii-gá ììⁿ nduu núú cuè téé cùu úhú iní ñáhá.

7

Cue ñaní Jèsús ñá túú sàndáá iní-güedé nàcuáa ndùu tnúhu càháⁿ-gá

¹ Te sátá dúcáⁿ ñǎ cuu, te ní xica cuu Jèsús distritú Galileá, te ñá ní sǎháⁿ-gá distritú Jùdeá, chi yàcáⁿ cuìní cue téé isràél cahni ñaha-güedě xii-gá ní cùu. ² Te ní cuyatni nduu càdá-yu vico, vico sá dánàní-yu Vico Vehe Tnuvixiⁿ. ³ Te ní xáhaⁿ cuè ñaní Jèsús xii-gá:

—Váha-gá quǎhíⁿ-n dístiritú Jùdeá te vá cùndècu-n iha, chi yàcáⁿ cada-n nchàa sá quídé-n iha cuèndá quini nchaa ñáyiu cùndihì ñaha xii-n ndecu yacáⁿ. ⁴ Chi núú cuìní-ó quini nchaa ñáyiu ná chùuⁿ cada-o te vá càdá dáyuhu-o. Te yòhó cuéhé nǎú sǎ quídé-n, te cada-n na quini nchaa ñáyiu —càchí-güedé xǎhaⁿ-güedě xii-gá.

⁵ Ducaⁿ ñǎ cáháⁿ cue ñaní-gá, chi ni mèe-güedé ñá túú sàndáá iní-güedé nàcuáa ndùu tnúhu càháⁿ-gá. ⁶ Te ní xáhaⁿ Jèsús xii-güedé:

—Vátá tnàhá-gá òré quǎhíⁿ-í dico nchòhó ndǎdani càa oré cuu quǎhíⁿ-ndó. ⁷ Chi nchaa ñáyiu ñùhu ichi cuehé ichi duha chi ñá túú cùu úhú iní ñáhǎ-yu xii nchòhó. Dico yúhú chi cùu úhú iní ñáhǎ-yu xii-í cuèndá sá càháⁿ-í sá quídě-yu nchaa sá cuéhé sá dúhá. ⁸ Te chí cuàháⁿ nchòhó vico chi yúhú vá quǎhíⁿ-ni-í chi vátá tnàhá-gá òré quǎhíⁿ-í —càchí-gá xáhaⁿ-gǎ xii-güedé.

⁹ Te ducaⁿ nĩ xáhaⁿ-gã te ní ndóo-gá Galileá, te cue tée-áⁿ cuáháⁿ-güedé.

Jèsús ndécú-gã ñⁿ vico chĩñuhú-yu Yá Ndiöxí

¹⁰ Dico sátá cuáháⁿ cue ñaní-gá, te ní xica-gá cuáháⁿ-gá tñàhá-gá dicó-ni sá dàyuhu cuáháⁿ-gá. ¹¹ Te ñáyiu isràél ñáyiu xĩndecu vico nànducú-yu Jèsús, te xĩtnàhá-yu:

—¿Ndèè ndécú Jèsús? —càchí-yu xĩtnàhá-yu.

¹² Te nchaa ñáyiu xĩndecu vico xĩndatnúhu-yu cuendá-gá. Te davá-yu xĩtnàhá-yu sá ïo váha iní-gá, te davá-yu xĩtnàhá-yu sá ñà díú tée váha cùu-gá, chi dándahú-gá ñáyiu.

¹³ Dico mee-ni xĩcáháⁿ náhĩ-yu, chi xĩyùhú-yu cue tée cùnuu núũ-yu.

¹⁴ Te ta ngũhuⁿ dava vico, te cuánguĩhu Jèsús veñúhu càhnu sá ïo cùnuu, te ní ngüíta-gá dácuaaha-gá ñáyiu. ¹⁵ Te ñáyiu isràél ní cuñúhu vĩhĩ-yu sá ïo váha càháⁿ-gá, te ní xĩtnàhá-yu:

—¿Ná cuendá ïo váha ñùhu-tu díquí tée-a tñúhu càháⁿ-dé te ñá túú ní dàcuaha-dé-í? —càchí-yu xĩtnàhá-yu.

¹⁶ Te ní xáhaⁿ Jèsús:

—Ñá díú cuendá méè-í cúú-xí sã dánèhé ñáhà-í xii-ndo, chi cuendá Dútú Ndiöxí Yáá ní tendaha ñàha xii-í véxi-í cúú-xí. ¹⁷ Te núu ïó dava-ndo nĩ yuhu ni iní-ndó cuiní-ndó càda-ndo nacuaa cuiní Yã Ndiöxí cunduu, te cutnùnĩ ndáá iní-ndó sã tñùhu dàcuaha ñaha-í xii-ndo cùu-xi cuendá méé Dütú Ndiöxí, te ñá díú cuendá méè-í cúú-xí. ¹⁸ Te tée cuiní sá cádá càhnu ñaha ñáyiu xii-dé, tée-áⁿ càháⁿ-dé nàcuáa véxi iní méé-dě. Dico yúhú cuiní-í sá cádá càhnú-yu Dútú Ndiöxí Yáá ní tendaha ñàha xii-í véxi-í ñuyúú-a, te càháⁿ ndáá-í te ñá túú dàcuandehnde-í.

¹⁹ Te ndíi Moisés ní taxi ndíi tñúhu sá sánú ìchi ñaha xii-ndo nacuaa cundecu-ndo, te ni dùcaⁿ ñá túú sàndáá

iní-ndó nàcuáa càháⁿ tnúhu-áⁿ. ¿Te ná cuendá cuiní-ndó càhni ñaha-ndo xii-í? —càchí-gá xáhaⁿ-gă xií-yu.

²⁰ Te ní xáhăⁿ-yu xii-gá:

—Yucu ñăvâha dâcoto ñaha xii-ó, chi vá yõo ñⁿ cuiní cahni ñaha xii-n —cachí-yu xăhăⁿ-yu xii-gá.

²¹ Te ní xáhaⁿ Jèsús xií-yu:

—Sá ñă quide-í ñⁿ sá vă yõo tnàhí ndàcu cada nduu cuu-xi nduu ndetatú-ó, xíăⁿ ío ní cuñúhu ñaha-ndo xii-í. ²² Te ndíi Moisés ní cachí ndíi sá cuăha-yu sěná ñîi cue landú tée, dico ñă díú mề ndíi ni càhu iní ndíi chi ducaⁿ tnàhí ní xóo cada cue ñani tnáhá-ó dává-áⁿ, núu xíăⁿ nchòhó sâha-ndo sěná ñîi landú tée cuèi cùu-xi nduu ndetatú-ó. ²³ Te ducaⁿ quide-ndo cuendá sá ñă túú ñă cumání-ndó núú tnúhu sá sánú ìchi ñaha xii-ndo ní dándõ ndíi Moisés. ¿Te ná cuendá cúdeéⁿ-ndó núú-í sá ñă quide tátna-í tée cùhú nduu ndetatú-ó-í? ²⁴ Te váha váha cada cuendá-ndó, te vá cuendá-ni cáháⁿ-ndó să yùhú ndècuéchi-í chi ñă túú xini-ndó —càchí-gá xáhaⁿ-gă xií-yu.

Jèsús xáhaⁿ-gă xií-yu núú vëxi-gá

²⁵ Te dava ñáyiu ñuú Jerusàlén ní nguíta-yu xitnàhá-yu:

—¿Náa ñă díú tề-áⁿ nándùcu-güedé cahni-güedé?,

²⁶ núu náí-dé nútñîi núu chítú núú tàcá-ăⁿ càháⁿ-dé, te vá yõo cùyîi cúñaha xii-dé ñⁿ tnúhu. Cudana te cue tée cùchiuⁿ sandáa iní-güedé sá díú-dě cúú-dě Crístú Yaá ní tendaha Yă Ndiõxí véxi ñuyú-a. ²⁷ Dico nchoo xini-ó ndèe ichi véxi tề-ăⁿ, dico Crístú ná quixi-gá chi vá yõo ñⁿ quini ndèe ichi quixi Yaá-áⁿ —càchí-yu xitnàhá-yu.

²⁸ Te yîhi Jesús xití veñúhu càhnu sá ño cùnuu danehe-gá ñáyiu, te ní tecú dóho-gá tnúhu càháⁿ-yu. Te níhi ní cáháⁿ-gá, te xáhaⁿ-gă xií-yu:

—¡Ná quiní-tu nchòhó ndèé ichi véxi yúhú! Yúhú véxi-í dico ñá díú sǎ cúú ìní mée-í, chi Yá Ndiöxí Yaá quidé nchàa-ndi túhú sá vǎha ní tendaha ñàha-gá xii-í véxi-í, te nchòhó ñá túú xìní-ndó-gǎ. ²⁹ Te yúhú xìní-í-gá chi núú ndécú-gǎ ní quee-í véxi-í, te ñi mee-gǎ ní tendaha ñàha-gá véxi-í —càchí-gá xáhaⁿ-gǎ xií-yu.

³⁰ Te sá dúcáⁿ ñí cáháⁿ-gá, núú cuìní-güedé tñi ñaha-güedé xii-gá quíhíⁿ-gá vecaá ní cùu, dico vá yǒo ñí ni cùyi tñi ñaha xii-gá chi vátá sàá-gá òré tñi ñaha-güedé. ³¹ Dico vǎi-yu ní sándáá ìní ñáhǎ-yu xii-gá, te ní xít-nàhá-yu:

—¡Nágá cúú sǎ cǎdá Crístú ná quixi-gá-i?, te té-a ío cuéhé nǔú sǎ tá quide-dé véxi. Váa ñi té-a cùu-dé Crístú Yaá ní tendaha Yá Ndiöxí véxi ñuyú-a —càchí-yu xít-nàhá-yu.

Cue té cùu fariséú cuìní-güedé quíhíⁿ Jèsús vecaá

³² Te ní ñíhí cue té cùu fariséú tñihu nàcuáa càháⁿ ñáyi cuendá Jèsús, núú ní ndatnúhu-güedé ndíhi cue dútú cúnùu, te ní techiùⁿ-güedé cue té quide cuendá veñuhu cuáháⁿ-güedé cuátñi ñaha-güedé xii-gá ní cùu.

³³ Te ní xáhaⁿ-gǎ xii-güedé:

—Sacú duha nduu cundecu ndíhi ñaha-í xii-ndo, te núhú tucu-í núú ndécú tǎtà-í Yaá ní tendaha ñàha xii-í véxi-í ñuyú-a. ³⁴ Te cuéi na nànducu ñaha-ndo dico vá ná ñíhí ñáhá-ndó chi vá sàá-ndó nǔú cúndecu-í —càchí-gá xáhaⁿ-gǎ xii-güedé.

³⁵ Te ní ngúíta ñáyi isràél xít-nàhá-yu:

—¡Ndèé quíhíⁿ-tu té-a te vá ná ñíhí-ó-dě-i? ¿Àdi quíhíⁿ-dé na chitnahá-dé ñáyi isràél ñáyi nchiténuu nchaa ñúú xícá cuendá danèhé-dé ñáyi griégú? ³⁶ ¿Nása càháⁿ-tu-dé duha càháⁿ-dé: “Nanducu ñàha-ndo te

vá nánihí ñáhá-ndó chi vá sàá-ndó núú cùndècu-í",
càchí-tu-dé? —càchí-yu xítناهá-yu.

Nàcuáa cada Espiritú Yă Ndiöxí iní-ó

³⁷ Te nduu nǐ yáha-ná vico cùu-xi nduu cahnu vihi,
te nduu-ǎⁿ nǐ ngúnu tnǐ Jèsús tnuú ñáyiu, te níhi ní
cáháⁿ-gá, te xáhaⁿ-gǎ xií-yu:

—Núu ió dava-ndo yìchí-ndó ndùte, te quixi-ndo núu-í,
te coho-ndo. ³⁸ Duha càháⁿ-í chi nchaa ñáyiu na quíndáá
iní ñáhá xii-í, te cada-xi iní-yu dàtná ñⁿ núú xícá ndùte,
nchaa-ni nduu xica ñá túú yìchí, ducaⁿ càda-xi iní-yu núú
cuáháⁿ núú vèxi dàtná càháⁿ-xi núú tütú Yă Ndiöxí —
càchí-gá xáhaⁿ-gǎ xií-yu.

³⁹ Te ducaⁿ nǐ cáháⁿ-gá cuèndá sá quíxí Espiritú Yă
Ndiöxí ngúndecu ndihí nchaa ñáyiu na quíndáá iní ñáhá
xii-gá, chi sáá nduu ndàa-gá andiu càda cahnu ñaha
Tátá-gǎ xii-gá, te dàvá-án te quixi Espiritú Yă Ndiöxí
cundecu ndihí-yu.

Ñá ní cùu ñⁿnuú-yu cuèndá tnúhu ní cáháⁿ Jèsús

⁴⁰ Te dava ñáyiu ní xíndedóho tnúhu ní cáháⁿ Jèsús ní
xítناهá-yu:

—Ndáá sá tēe-a cùu-dé tēe càchí-yu quixi cáháⁿ tnúhu
Yá Ndiöxí —càchí-yu xítناهá-yu.

⁴¹ Te dava tucú-yu xítناهá-yu:

—Tēe-a cùu-dé Crìstú Yaá ní tendaha Yă Ndiöxí véxi
ñuyú-a —càchí-yu xítناهá-yu.

Te dava-gá tucú-yu xítناهá-yu:

—¿Náa ndàa distritú Galileá quixi Crìstú Yaá tendaha Yă
Ndiöxí quixi ñuyú-a? ⁴² Chi núú tütú Yă Ndiöxí càchí-xi
sá Crìstú Yaá tendaha Yă Ndiöxí quixi ñuyú-a cuu-gá
ñⁿ ñaní tnáhá ndii Dàvií, te quee-gá ñuú Belén ñuú méé
ndii Dàvií, duha càháⁿ-xi núú tütú Yă Ndiöxí —càchí-yu
xítناهá-yu.

43 Te xíàⁿ nũu ñá ní cùu ìⁿnuú-yu cuendá Jèsús. 44 Te davá-yu cuíní-yu tñíⁿ-yu Jèsús quíhíⁿ-gá vecaá ní cùu, dico ni ìⁿ-yu ñá túú ní cùyíⁿ-yu tñí ñàhá-yu xii-gá.

Cue tée cùchiuⁿ ñá túú sàndáá iní-güedé Jèsús

45 Te cue tée cuáháⁿ tñí ñaha xii Jesús ní cùu ní ndexìo-güedé núú cuè tée cùu fariséú ndíhí núú cuè dútú cúnùu. Te xáhaⁿ cuè tée cùnùu-áⁿ:

—¿Ná cuendá ñá ní cãndeca-ndo tõe-ãⁿ quixi? —
càchí-güedé xáhaⁿ-güedě.

46 Te cue tée ní sáháⁿ chiuⁿ ní xáhaⁿ-güedě:

—Ní ìⁿ tée ñá túú xìní-ndí cáháⁿ dàtná càháⁿ tée-ãⁿ —
càchí-güedé xáhaⁿ-güedě.

47 Te ní xáhaⁿ cuè tée cùu fariséú:

—¿Náa tñàhá nchòhó ní sàndáá iní-ndó tñùhu ndehnde càháⁿ tée-ãⁿ? 48 ¿Náa ñá túú xìní-ndó sã nì ìⁿ cue tée tàxi tñuní nchúhú, te ni ìⁿ nchúhú cue tée cùu fariséú ñá túú sàndáá iní-ndí tée-ãⁿ ñă? 49 Nchaa ñáyiú tũha ñaha xii tée-ãⁿ ñá túú sàndáá iní-yu nàcuáa càháⁿ tñùhu sá sánú ìchi ñaha xii-o, dico cuíta nihnú-yu sá dúcáⁿ quidé-yu —
càchí-güedé xáhaⁿ-güedě xii cue tée-áⁿ.

50 Te té Nicòdemú tée ní sáháⁿ niú ní ndatnúhu-dé ndíhí Jèsús cúú-dě tñàhá-dé ìⁿ tée fariséú, te ní xáhaⁿ-dě xii-güedé:

51 —Tnúhu sá sánú ìchi ñaha xii-o nacúaa cundecu-o càchí-xi sá ndéé cundedóho-o nãsa càháⁿ tée tàú cuéchi cuendá cutnùní iní-ó ñă ní quide-dé, te dàtnùní cáháⁿ-ó nũu ndisa ndècuéchi-dé àdi ñá túú ndècuéchi-dé —
càchí-dé xáhaⁿ-dě.

52 Te ní xáhaⁿ-güedě:

—Cùu ní cachí sá tñàhá-õ cúú-n tõe distritú Galileá nũu ducaⁿ càháⁿ-n. Dacuàha tutú yódó tñuní tñùhu Yá Ndiõxí te quiní-n nàcuáa càháⁿ-xi sá nì ìⁿ tée véxi distritú

Galileá ñá túú càháⁿ-dé tnúhu Yá Ndiõxí —càchí-güedé xáhaⁿ-güedě.

⁵³ Ducaⁿ te ndi dííⁿ cuãnuhú-güedé vehe-güedé.

8

Íⁿ ñadìhí ndécú vîhi cuéchi-xi

¹ Te Jèsús cuáháⁿ-gá yucu Òlívú. ² Te sátá ñí túndaá nduu tněé, te cuáháⁿ tucu-gá veñúhu càhnu sá ïo cùnuu. Te ío cuéhé ñăyiu ní chítú níhnũ-yu núú-gă, te ní ngóo-gá ní dánèhé ñáhá-gă xií-yu. ³ Te ní quexìo cue téé dàcuaha ñaha xií-yu nchaa tnúhu ní chídó tnùní ndíi Moisés, ndìhi cue téé cùu fariséú, te ndèca-güedé íⁿ ñadìhí ní sáá, te ñaha-áⁿ ñí xiní ñáhă-yu càháⁿ ndìhi-aⁿ íⁿ téé dico ñá díú yî-aⁿ cuu-dé, te ní sanutnîi ñaha-güedě xii-aⁿ tnuú nchaa ñăyiu xîndecu núú Jèsús. ⁴ Te ní xáhaⁿ-güedě xii Jèsús:

—Mèstrú, ñadìhí-a ní xiní ñáhá ñăyiu xii-aⁿ càháⁿ ndìhi-aⁿ íⁿ téé dico ñá díú yî-aⁿ cuu-dé. ⁵ Te tnúhu ní chídó tnùní ndíi Moisés càchí-xi sá yúú cahni-o nchàa ñăyiu dîhí duha quide. Te yòhó, ¿nása càchí-n cùnduu-i? —cachí-güedé xáhaⁿ-güedě xii-gá.

⁶ Duha ní cáháⁿ-güedé chi cuendá sá cuení-güedé coto ndeé ñáhá-güedě xii-gá nõu nása cáháⁿ-gá cuendá núcóo nchìhi ñaha-güedě xii-gá ní cáháⁿ-güedě. Te ní ngúnu ndeyi-gá te ní ngúita-gá téé-gă ndìhi díquí ndáhá-gă lètrá núú ñúhú. ⁷ Te xicáⁿ tnúhú-ní tucu-güedé núú-gă nõu ní ndonehe núú-gă, te ní xáhaⁿ-gă:

—Ndědani càa nchohó te núu ñá túú ñă cuéchi quide-ndo te díhna nuu-gă-ndó chí cuãha-aⁿ yúú —càchí-gá xáhaⁿ-gă xii-güedé.

⁸ Te ní ngúnu ndeyi tucu-gá téé tucu-gá lètrá núú ñúhú. ⁹ Te sá dúcáⁿ ñí xáhaⁿ-gă xii-güedé te ní ndixi túu iní-güedé sá ñà túú quide váha mee-güedě tnàhá-güedé,

núu da ìⁿ da ìⁿ-güedé ní ndee, te díhna-gá cue tée cùu sacuéhé ní ndee te ní nguíta nchicúⁿ dava-gá-güedé. Te sátá ní ndíhi-güedé ní ndee, te ní quendóo mee-nă Jèsús ndíhi ñadìhí-áⁿ. ¹⁰ Te ní ndonehe núu Jèsús te ní xiní-gá sá ní ndíhi-güedé cuáháⁿ te mee-nă ñadìhí-áⁿ ní ndóo-aⁿ, te ní xáhaⁿ-gă xii-aⁿ:

—¿Nděndi cuáháⁿ cue tée càchí sá ní quide-n cuěchi? ¿Ni ìⁿ-güedé ñá ní cùndee tnúhu-güedé quíhíⁿ-n cástiú-va? —càchí-gá xáhaⁿ-gă xii-aⁿ.

¹¹ Te ní xáhaⁿ-aⁿ xii Jèsús:

—Ñáhá, chi ni ìⁿ-güedé ñá ní ndàcu-güedé —càchí-aⁿ xáhaⁿ-aⁿ.

Te ní xáhaⁿ Jèsús:

—Te ni yùhú vá dáquìhíⁿ ñáhà-í castiú xii-n. Te vitna te núhú-n te vá cádá-gă-n năndi sá cuéhé sá dúhá —càchí-gá xáhaⁿ-gă xii-aⁿ.

Jèsús dándixi túu-gá iní-ó

¹² Te ní cáháⁿ tucu Jèsús núu ñăyiu, te xáhaⁿ-gă xií-yu:

—Yúhú cùu-í dàtná ìⁿ ñuhú dáyèhe-í ñuyíú-a, te nchaa ñáyiu na chìtnahá ñáhá xii-í, te vá cùndècu-gá-yu ichi cuéhé ichi duha, chi yúhú dándixi túu-í iní-yu cuendá cut-nùní iní-yu nàcuáa ndùu cuendá Yă Ndiòxí, te cundecu-í ndíhí-yu ni caa ni quíhíⁿ —càchí-gá xáhaⁿ-gă xií-yu.

¹³ Te ní xáhaⁿ cuè tée cùu fariséú xii-gá:

—Medii-n caháⁿ-n sã cùu-n tēe váha, te vá yōo ìⁿ-gá chindèe tnúhu ñaha xii-n núu ná tée cùu-n, dico xíăⁿ ñá túu nàndíhi-xi —càchí-güedé xáhaⁿ-güedě xii-gá.

¹⁴ Te ní xáhaⁿ Jèsús:

—Cuěi càháⁿ-í cuendá mèè-í dico nàndíhi tnúhu càháⁿ-í. Chi yúhú nàha-í ndèé ichi véxi-í, te xiní-í ndèé ichi núhú-í, dico nchòhó chi ñá túu xiní-ndó ndèé ichi

véxi-í, te ni ñà túú xìní-ndó ndèé ichi quíhíⁿ-í. ¹⁵ Te nchòhó chi cuèndá-ni càháⁿ-ndó cuèndá ñáyiú núu quide váha-yu àdi ñá túú quide váha-yu. Te yúhú ñá túú càháⁿ-í cuèndá ñáyiú núu quide váha-yu àdi ñá túú quide váha-yu. ¹⁶ Àdi núu càháⁿ-í dico ìⁿ tnúhu ndáá càháⁿ-í chi ñá díú-ní mèe-í càháⁿ, chi tnàhá Tătà-í Yaá ní tendaha ñàha xii-í véxi-í ñuyíú-a càháⁿ-gá chíndèe tnúhu ñaha-gá xii-í. ¹⁷ Te tnúhu sá sánú ìchi ñaha xii-ndo cachí-xi sá núu na cùndecu úú cue tée cáháⁿ ndáá-güedé nàcuáa cùu ìⁿ sá cùndáá, te núu ìⁿ-ni tnúhu na càháⁿ-güedé ndi ndùú-güedé te xíãⁿ nándĩhi-xi, duha càchí tnúhu-án. ¹⁸ Te ñu-ni ducaⁿ cùu-xi yúhú chi càháⁿ-í ìⁿ tnúhu ndáá sá cúú-xí mèe-í, te ñu-ni dàtná càháⁿ-í càháⁿ Tătà-í Yaá ní tendaha ñàha xii-í véxi-í ñuyíú-a —càchí-gá xáhaⁿ-gá xii-güedé.

¹⁹ Te ní xáhaⁿ-güedě xii-gá:

—¿Te ndèé ndécú Tătà-n-í? —càchí-güedé xáhaⁿ-güedě.

Te ní xáhaⁿ Jèsús:

—Te núu dícó xìní-ndó yòo cuu yúhú-á te ducaⁿ te quiní-ndó Tătà-í. Te ni yúhú ñá túú xìní-ndó yòo cuu-í nũu xíãⁿ ñá túú xìní-ndó Tătà-í —càchí-gá xáhaⁿ-gá xii-güedé.

²⁰ Duha ní cáháⁿ Jèsús nini dàcuaha-gá ñáyiú xití veñúhu núu ndécú àlcançιά díhúⁿ. Te vá yòo ìⁿ ni cùyii tñi ñaha xii-gá chi vátá sàá-gá òré tñi ñaha-güedě.

Ñáyiú ñá túú sàndáá iní ñáhá xii Jesús vá ndácũ-yu quíhíⁿ-yu núu nùhú-gá cundecu-gá

²¹ Te ní xáhaⁿ tùcu Jesús xii-güedé:

—Yúhú núhú-í te nanducu ñàha-ndo te vá nánĩhí ñáhá-ndó, te cuú-ndó nũu yicá cuěchi-ndo, chi vá

ndácú-ndó sǎá-ndó nǔú nùhú-í cundecu-í —càchí-gá xáhaⁿ-gǎ xii-güedé.

²² Te ní xítñàha cue téé isràél:

—¿Te náa cahni-dé méé-dé nǔú càchí-dé sá vǎ ndácú-ó sàá-ó nǔú quǐhíⁿ-dé-ǎⁿ? —càchí-güedé xítñàha-güedé.

²³ Te ní xáhaⁿ Jèsús xii-güedé:

—Nchòhó chi cue téé ñuyú-a cùu-ndo, núú ío ñùhu iní-ndó sǎ ìó ñuyú-a. Te yúhú chi téé núú ññu cùu-í nǔú xǎⁿ ñá túú sǎ ìó ñuyú-a ñùhu iní-í. ²⁴ Te xǎⁿ nǔú càchí-í sá cùú-ndó nǔú yíca cuèchi-ndo, chi ñá cuení-ndó quíndáá iní-ndó sǎ yǔhú véxi cuuⁿ-í andi, te núú xǎⁿ diu-ni núú yíca cuèchi-ndo cùú-ndó —càchí-gá xáhaⁿ-gǎ xii-güedé.

²⁵ Te ní xícaⁿ tnúhú-güedé núú-gǎ, te xǎhaⁿ-güedé:

—¿Te ná cúú yòhó nǔú ducaⁿ càháⁿ-n-í? —càchí-güedé xǎhaⁿ-güedé xii-gá.

Te ní xáhaⁿ-gǎ:

—Sa ní cachí tnúhu-í xii-ndo ndéé díhna —càchí-gá xáhaⁿ-gǎ xii-güedé.

²⁶ Te xǎhaⁿ tùcu-gá:

—Ndècu cuéhé tnùhu cáháⁿ-í cada ndáá-í cuèndá nchòhó. Te Tǎtà-í Yaá ní tendaha ñàha xii-í véxi-í ñuyú-a càháⁿ-gá tnúhu ndáá, te tnúhu càháⁿ yúhú ñuyú-a cùu-xi tnúhu ní cáháⁿ-gá ní xíndedóho-í —càchí-gá xáhaⁿ-gǎ xii-güedé.

²⁷ Te mee-güedé ñá túú ní tècú tnùn-í-güedé sá cuèndá Dútú Ndiòxí ní cáháⁿ Jèsús. ²⁸ Te ní xáhaⁿ-gǎ xii-güedé:

—Òré ná catá càa ñaha-ndo xii yúhú Téé cùu ñaní tnáhá-ndó nchàa-ndo núú cùrúxí cahni ñaha-ndo, te òré-áⁿ cutnùn-í iní-ndó yòo cuu-í, te ñá túú quide-í sá cúú iní mèe-í, chi yúhú càháⁿ-í nàcuáa ní dánèhé ñáhá Tǎtà-í ²⁹ Yaá ní tendaha ñàha xii-í véxi-í. Te diu-gá ndécú ndìhi ñaha-gá xii-í, te ñá túú dàña nihnu ñaha-gá chi quide-í nchaa nàcuáa cùu iní-gá —càchí-gá xáhaⁿ-gǎ xii-güedé.

³⁰ Te sá dúcáⁿ ñí cáháⁿ-gá ñũu ío vai ñáyiu ní sándáá iní ñáhá xii-gá.

Ñáyiu sándáá iní ñáhá xii Yá Ndiöxí ndihi ñáyiu ndècu ichi cuehé ichi duha

³¹ Te ní xáhaⁿ Jèsús xii ñáyiu israhèl ñáyiu ní sándáá iní ñáhá xii-gá:

—Te núu vá dáñá ndèé-ndó càda-ndo nchaa nacuaá càháⁿ-í, te cuu ndisa-ndo cue tée tñahá tñuhu ndihi-í, ³² te tecú tñuní-gá-ndó tñuhu ndáá, te ducaⁿ te cácu nihnu-ndo —càchí-gá xáhaⁿ-gã xíí-yu.

³³ Te ní xáhãⁿ-yu:

—Nchúhú cúú-ndĩ cue ñaní tñahá ndĩ Àbrahám, te ni ñⁿ nduu ñá túú ndèé sácündedí nihnu-ndí ndoho tñahá-ndí ñũu cáchí-ö sá dàcácu nihnu ñaha-n xii-ndí —càchí-yu xãhãⁿ-yu xii-gá.

³⁴ Te ní xáhaⁿ Jèsús xíí-yu:

—Na càchí tñuhu ndáá-í xii-ndo sã nchaa ñáyiu quide nchaa sá cuèhé sá dúhá tàxi tñuní ñáhá-ñã-xi xíí-yu.

³⁵ Te cue ñáyiu xinu cuechi te vá cúú ñⁿ-ná cuú-yu ndihi ñáyiu dii vèhe-xi xinu cuechí-yu, dico cue déhe ñáyiu dii vèhe-xi-áⁿ chi ñⁿ-ni cùu ndihi ñaha-güexi xíí-yu.

³⁶ Te núu yúhú Yaá cúú Dèhe Yá Ndiöxí dàcácu nihnu ñaha-ĩ xii-ndo ñúu nchaa yíca cuèchi-ndo, te ndáá sá nchòhó cácu nihnu ndisa-ndo. ³⁷ Te yúhú sa xini-í sá nchòhó cúú-ndó ñaní tñahá ndĩ Àbrahám, te dicó-ni sá ñã tñahá iní-ndó tñuhu càháⁿ-í ñũu xíãⁿ cuiní-ndó càhni ñaha-ndo. ³⁸ Te yúhú càháⁿ-í nàcuáa ní dánèhé ñáhá Tătã-í, te nchòhó quidé-ndó nàcuáa càháⁿ tătã-ndó —càchí-gá xáhaⁿ-gã xíí-yu.

³⁹ Te ní xáhãⁿ-yu:

—Ndií Àbrahám cúú tătã-ndĩ —càchí-yu xãhãⁿ-yu xii-gá.

Te ní xáhaⁿ Jèsús:

—Núu ndisa ñaní tnáhá ndí Ìbrahám cúú-ndó, te cada-ndo nàcuáa ní xóo cada ndíi ni cùu. ⁴⁰ Te yúhú cuèi càháⁿ-í ìⁿ tnúhu ndáá nàcuáa càháⁿ Yă Ndiöxí càchí tnúhu-gá xii-í, te cuìní-ndó càhni ñaha-ndo. ¡Dico ndíi Ìbrahám chi ñá túú dùcaⁿ ni quide ndíi! ⁴¹ Te nchòhó quidé-ndó nàcuáa quide tátá-ndó —càchí-gá xáhaⁿ-gă xii-yu.

Te ní xáhăⁿ-yu:

—Nchúhú, ñá túú yàyacáⁿ ndécú tătá-ndí, chi ìⁿdii Yá Ndiöxí cúú tătá-ndí —càchí-yu xáhăⁿ-yu xii-gá.

⁴² Te ní xáhaⁿ Jèsús:

—Núu dicó Yă Ndiöxí ndisa cùu Tătá-ndó te cuu iní ñáhá-ndó xii-í ní cùu chi yúhú ní quee-í núú ndécú-gă véxi-í ñuyíú-a. Te ñá túú véxi-í sá cúú iní mée-í, chi mee-gă ní tendaha ñaha-gá véxi-í. ⁴³ Te ñá túú tècú tnùn-ndó tnúhu càháⁿ-í chi ñá túú tnáhá iní-ndó. ⁴⁴ Te nchòhó chi tătá-ndó cùu yucu ñávăha núu cùdí iní-ndó quide-ndo nchaa nacuáa cùu iní-xi, chi ndéé òré ní ngáva ñuyíú ducaⁿ-ni ndècu-xi dacáháⁿ-xi iní-ndó sàhni tnaha-ndo. Te ñá ìⁿ ndùu cáháⁿ-xi ìⁿ tnúhu ndáá chi ñá túú xìca-xi ichi ndáá, chi mee-ni ìchi tnúhu ndehnde xìca-xi chi ducaⁿ iní-xi. Te ñu-xi dàcahu-xi iní-ndó dàcuandehnde-ndo. ⁴⁵ Te yúhú càháⁿ-í tnúhu ndáá te ñá túú cuìní-ndó quìndáá iní ñáhá-ndó. ⁴⁶ ¿Te ndèdacàa nchohó xìní-ndó sã quidè-í ìⁿ sá cuèhé sá dúhá-í?, te yúhú ñá túú nă quidè-í chi càháⁿ ndáá-í, ¿te ná cuendá ñá túú cuìní-ndó quìndáá iní-ndó tnúhu càháⁿ-í? ⁴⁷ Te nchaa ñáyiú ndècu ichi Yá Ndiöxí, ñáyiú-án sácùndedóho-yu nchaa tnúhu càháⁿ-gá. Te nchòhó chi ñá díú ichi Yá Ndiöxí ndécú-ndó núu ñá túú sácùndedóho-ndo tnúhu càháⁿ-gá —càchí-gá xáhaⁿ-gă xii-yu.

Díhna-gá Crìstú sa ndècu dacúxí ndíi Ìbrahám

⁴⁸ Te ní xáhaⁿ ñǎyiu isràél:

—Váha-ni càháⁿ-ndí sá tǎe samaritànú cúú-n, te yucu ñávǎha ndècu ndìhi-n —cachí-yu xǎhǎⁿ-yu xii-gá.

⁴⁹ Te ní xáhaⁿ Jèsús:

—Yúhú, ñá túú yùcu ñávǎha ndècu ndìhi-í, chi Tǎtà-í quidé càhnu-í, te nchòhó da cùu úhú iní ñáhá-ndó xii-í —càchí-gá xáhaⁿ-gǎ xií-yu.

⁵⁰ Te xǎhaⁿ tùcu-gá:

—Yúhú, ñá túú càchí-í sá cádá càhnu ñaha-ndo, dico Dútú Ndiòxí cuìní-gá sá cádá càhnu ñaha-ndo xii-í. Te mee-gǎ cáháⁿ-gá nùu ndǎdacàa-ndo quide váha, te ndǎdacàa-ndo ñá túú quide váha. ⁵¹ Te na càchí tnúhu ndáá-í xii-ndo sǎ nchàa ñáyiu na tnǎi tnúhu càháⁿ-í te vá cuíta nihnú-yu —càchí-gá xáhaⁿ-gǎ xií-yu.

⁵² Te ní xáhaⁿ tùcu ñáyiu isràél:

—Vitna te ní xiní ndáá-ndí sá yùcu ñávǎha ndècu ndìhi-n, chi ndí Àbrahám ndìhi nchaa cue tée ní xóo cáháⁿ tnúhu Yá Ndiòxí ndéé sanaha ñí xíhí-güedé, te yòhó càchí-tu-n sǎ ncháá ñáyiu na tnǎi tnúhu càháⁿ-n te vá cùú-gá-yu. ⁵³ ¿Náa ío-gá càhnu cuu-ó dàcúúxí ñàní tnáhá-ndí ndí Àbrahám-ǎⁿ? Tée-áⁿ dai ní xíhí-dé ndìhi cue tée ní xóo cáháⁿ tnúhu Yá Ndiòxí ndéé sanaha. ¿Te yòhó nágá-tu cùu-n te vá cùú-n càhaⁿ-n-i? —cachí-yu xǎhǎⁿ-yu.

⁵⁴ Te ní xáhaⁿ Jèsús:

—Te núu dicó mèe-í quidé càhnu-í mèe-í ñá, te ñá túú nàndíhi sá quidè-í nùu ducaⁿ. Dico Tǎtà-í quidé càhnu ñaha-gá xii-í, te ñu-ni Yaá-áⁿ càchí-ndó cùu Ndiòxí-ndó. ⁵⁵ Te nchòhó chi ñá túú xiní-ndó-gǎ. Te yúhú chi xiní-í-gá. Te núu na càchí-í sá ñà túú xiní-í-gá te dàcuandehnde-í dàtná ndehnde mèe-ndo. Te yúhú chi xiní ndisa-í-gá te tnǎi-í nchaa tnúhu càháⁿ-gá. ⁵⁶ Te ndí Àbrahám ñàní

tnáhá-ndó nǐ xíndecu ndéé sanaha ío ní cudǐí ìní ndíí sá quìní ñáhá ndíi xii-í, te ní sáá nduu nǐ xiní ñáhá ndíi xii-í nǔu ío ní cudǐí ìní ndíí —càchí-gá xáhaⁿ-gǎ xii-yu.

⁵⁷ Te ní xáhaⁿ ñǎyiu isràél xii Jèsús:

—Ni vǎtá cùhúⁿ-gǎ-n ùdico úxí cuíá-n te càchí-n sǎ nǐ xiní-n ndíi Àbrahám, te ní cunaha vǐhi ní xíhí ndíi-áⁿ —càchí-yu xǎhǎⁿ-yu xii-gá.

⁵⁸ Te ní xáhaⁿ Jèsús:

—Te na càchí tnúhu ndáá-í xii-ndo sǎ cùmání-gǎ cundecu ndíi-áⁿ ñuyúú-a te yúhú sa ndècu-gá-í —càchí-gá xáhaⁿ-gǎ xii-yu.

⁵⁹ Te sá dúcáⁿ nǐ cáháⁿ-gá nǔu xiǎⁿ ní quehéⁿ-yu yúú cuǎha ñàháyú xii-gá ní cùu, te ní nguívǎha-gá núǔ-yu te ní quee-gá xití venúhu cuáháⁿ-gá.

9

Jèsús quidé tǎtna-gá ìⁿ tée cuàá

¹ Te núú xícá cùu Jesús ní naníhí-gǎ ìⁿ tée cuàá, te sa ducaⁿ tnàhí càa núú-dě ní cacu-dé. ² Te ní xáhaⁿ cuè tée xica cuu ndíhi-gá xii-gá:

—Mèstrú, ¿ná cuèndá dàcáⁿ cuàá tée-ǎⁿ ní cacu-dé? ¿Sá cuèndá nchaa yícá cuèchi tǎtá-dě, ǎⁿ sǎ cuèndá nchaa yícá cuèchi nǎná-dě, ǎⁿ sá cuèndá nchaa yícá cuèchi mee-dě dàcáⁿ cáá-dě ní cacu-dé? —càchí-güedé xǎhaⁿ-güedě xii-gá.

³ Te ní xáhaⁿ Jèsús:

—Ni ñà díú sǎ cuèndá nchaa yícá cuèchi mee-dě, te ni ñà díú sǎ cuèndá nchaa yícá cuèchi tǎtá-dě, te ni ñà díú sǎ cuèndá nchaa yícá cuèchi nǎná-dě, chi mee Yǎ Ndiǒxí ní cuiní-gá sá dúcáⁿ cùnduu-dé sáá-dé ñuyúú-a cuèndá sá ñuyúú-a quini ñáyiu nása cada ñaha Yǎ Ndiǒxí xii-dé ndúha núú-dě. ⁴ Te vitna ío-gá nduu cùyica sá

cádà-í nchaa chiùn ní táhú Yàá ní tendaha ñàha xii-í véxi-í ñuyíú-a, chi sáá nduu te vá ndácú-gǎ-í cada-í chiùn-gá.

⁵ Te nini ndècu-gá-í ñuyíú-a te dándixi túu-í iní nchaa ñáyiú cuèndá cutnùní iní-yu nàcuáa ndùu cuendá Yǎ Ndiǒxí —càchí-gá xáhaⁿ-gǎ xii-güedé.

⁶ Te sátá dúcáⁿ ñí cáháⁿ-gá, te ní sati-gá díí-gá núú ñúhú te ní dácá-gǎ luha ñuhu ní cuáha ndéhyú, te ndéhyú-ǎⁿ ñí dácánùu-gá ndúú xio núú tǎe cuàá-áⁿ. ⁷ Te ní xáhaⁿ-gǎ xii-dé:

—Quíhíⁿ-n nàquete-n núú-n ndùte tanquí Silòé —càchí-gá xáhaⁿ-gǎ xii-dé. Te Silòé-áⁿ quée-xí tnùhu mèé-yu: Tée xìca chiuⁿ.

Te ní sáháⁿ tée cuàá-áⁿ ñí naquete-dé núú-dě, te òré ní ndexìo-dé te sa ndèhe-dé. ⁸ Te nchaa ñáyiú ndècu yatni núú ndécú-dě ndíhi nchaa ñáyiú xìní ñáhá xii-dé núú xìcáⁿ ndàhú-dé ní xítñàhá-yu:

—¿Náa ñá díú tǎe-ǎⁿ ní xóo cǎcáⁿ ndàhú-dé? —càchí-yu xítñàhá-yu.

⁹ Te davá-yu càchí-yu sá díú-dě, te davá-yu càchí-yu sá ñà díú-dě, dico ducaⁿ cǎa-dé, càchí-yu xítñàhá-yu.

Dico mee-dě ní xáhaⁿ-dě xií-yu sá díú-dě.

¹⁰ Te ní xìcáⁿ tnúhǔ-yu núú-dě, te xǎhǎⁿ-yu:

—¿Nása ní cuu núú ní ndúha núú-n ndèhe-n vitna? —cachí-yu xǎhǎⁿ-yu xii-dé.

¹¹ Te ní xáhaⁿ-dě:

—Tée nàni Jesús-ǎⁿ ní cadúha-dé luha ndéhyú te ní dácánùu-dé núú-í, te ní táúchíúⁿ-dě ní sáháⁿ-í tǎnquí Silòé ní naquete-í núú-í, te òré-áⁿ ñí cuu cundehe-í —càchí-dé xǎhaⁿ-dě xií-yu.

¹² Te ní xìcáⁿ tnúhú tùcú-yu núú-dě, te xǎhǎⁿ-yu:

—¿Te ndèè ndécú tǎe-áⁿ? —càchí-yu xǎhǎⁿ-yu xii-dé.

Te ní xáhaⁿ-dě:

—Ñá túú xiní-í —càchí-dé xăhaⁿ-dě xií-yu.

Cue tée cùu fariséú ndátnũhu-güedé ndihi tée ní ndúha núú-xi

¹³ Te ndèca-güedé tée ní ndúha núú-xi-áⁿ cuăháⁿ núú cuè tée cùu fariséú. ¹⁴ Te cuèndá sá ndùu ndetatú-yu ní cadúha Jèsús ndéhyú nĩ dácánũu-gá núú tõe-áⁿ te ní ndúha, ¹⁵ xíăⁿ nũu ní xícáⁿ tnúhú cuè tée cùu fariséú núú-dě, te xăhaⁿ-güedě:

—¿Nása ní cuu ní ndúha núú-n? —càchí-güedé xăhaⁿ-güedě xii-dé.

Te ní xáhaⁿ-dě xii-güedé:

—Hⁿ tée ní dácánũu-dé ndéhyú nũu-í te ní sáháⁿ-í ní naquete-í, te ní cuu ndèhe-í vitna —càchí-dé xăhaⁿ-dě xii-güedé.

¹⁶ Te dava cue tée cùu fariséú ní xítnáha-güedé:

—Ñá díú Yă Ndiöxí ní tëndaha ñaha-gá xii tée-ăⁿ véxi-dé nũu duha quide-dé nchaa sá vă yõo tnàhí ndàcu cada, te ñá túú sàndáá iní-dé canehe íí-dě nduu ndetatú-ó —càchí-güedé xítnáha-güedé.

Te dava-güedé ní xítnáha-güedé:

—¿Nása ndacu-dé cada-dé sá vă yõo tnàhí ndàcu cada te núu cùu-dé tée yícá cuèchi? —càchí-güedé xítnáha-güedé.

Te ñá túú ní cùu ĩⁿnuu-güedé tnúhu ní cáháⁿ-güedé.

¹⁷ Te ní xícáⁿ tnúhú tùcu-güedé núú tõe ní ndúha núú-xi-áⁿ, te xăhaⁿ-güedě:

—Te yòhó, ¿nása càchí-n cuèndá tée ní quide tátna núú-n te ní ndúha? —càchí-güedé xăhaⁿ-güedě xii-dé.

Te ní xáhaⁿ-dě:

—Yúhú càchí-í sá ĩⁿ tõe cáháⁿ tnúhu Yá Ndiöxí cúú-dě —càchí-dé xăhaⁿ-dě xii-güedé.

¹⁸ Dico cue tée isràél ñá ní sàndáá iní-güedé sá cuàá-dé ní cùu, chi cuèndá sa ní ndúha núú-dě ní xiní ñáhá-güedě,

te xíãⁿ nõu ní cana-güedé tătă-dě ndihi năná-dě, ¹⁹ te ní xícáⁿ tnúhú-güedě nõu-yu, te xăhaⁿ-güedě:

—¿Diu tée-a déhe-ndo tée cächí-ndó cuàá-dé ní cacu-dé-ăⁿ? ¿Te nása ní cuu ní ndúha núú-dě? — cächí-güedé xăhaⁿ-güedě xií-yu.

²⁰ Te ní xáhaⁿ tătă-dě ndihi năná-dě:

—Diu déhe-ndí cúú-dě te sa cuàá ndisa-dé ní cacu-dé, ²¹ dico ñá túú xìní-ndí nása ní cuu ní ndúha núú-dě, te ni ñá túú xìní-ndí yoo ní quide tătna. Chí cacăⁿ tnúhú nõú méé-dě xíãⁿ nõu sa sàcuéhé-dě, te na cáháⁿ-dé nõu nása ní cuu ní ndúha núú-dě —cächí-yu xăhăⁿ-yu xii-güedé.

²² Duha ní cáháⁿ tătă-dě ndihi năná-dě ní xáhăⁿ-yu xii-güedé cuendá sá yúhú-yu cue tée cùnũu núú ñăyiu isrâél, chi cue tée-ăⁿ sa ní ndatnúhu-güedé ní cuu ñⁿnuu-güedě sá nõu ndědacàa ñăyiu na cáháⁿ sá Jêsús cúú-gă Crístú Yaa ní tendaha Yă Ndiõxí véxi ñuyíú-a, te vá dáña-gă-güedé quíhu-yu veñúhu. ²³ Núu xíãⁿ ní xáhaⁿ tătă-dě ndihi năná-dě sá ná cacăⁿ tnúhú-güedě núú méé-dě chi sa sacuéhé-dě.

²⁴ Te xíãⁿ nõu ní cana tucu-güedé tée ní ndúha núú-xi-áⁿ, te ní xáhaⁿ-güedě:

—Cáháⁿ-n ñⁿ tnúhu ndáá chi Yá Ndiõxí ndéhé ndî-gá nàcuáa ní cuu ní ndúha núú-n, chi nchúhú xìní-ndí sá dícó ñⁿ tée ndècu yícá cuěchi-xi cùu tée cächí-n ñí quide tătna núú-n —cächí-güedé xăhaⁿ-güedě xii-dé.

²⁵ Te ní xáhaⁿ-dě:

—Yúhú, ñá túú xìní-í te núu tée ndècu yícá cuěchi-xi cùu-dé àdi ñáhá. Dícó-ni sá xìní-í sá cuàá-í ní cùu te vitna ní cuu cundehe-í —cächí-dé xăhaⁿ-dě xii-güedé.

²⁶ Te ní xícáⁿ tnúhú tucu-güedé núú-dě, te xăhaⁿ-güedě:

—¿Nása ní quide ñaha-dě xii-n te ní ndúha núú-n-í? — cächí-güedé xăhaⁿ-güedě xii-dé.

²⁷ Te ní xáhaⁿ-dě:

—Yúhú sa ní cáháⁿ-í te ñá túú quìde cuendá-ndó. ¿Te ná cuendá cuíní-ndó càchí tnúhu-ni tucu-í? ¿Á tnàhá-ndó cuíní-ndó quìndáá iní-ndó tnúhu càháⁿ-dé? —càchí-dé xăhaⁿ-dě xii-güedé.

²⁸ Te ní cudééⁿ-güedě núú-dě, te ní xáhaⁿ-güedě xii-dé:

—Te núu yòhó cuíní-n chinchícúⁿ-n tēe-ăⁿ te cuahán, dico nchúhú chi canchicúⁿ nihnu nahi-ni-ndí nàcuáa ní cáháⁿ ndí Moisés. ²⁹ Te nchúhú chi nàha-ndí sá Yă Ndiôxí ní cáháⁿ ndíhi-gá ndí Moisés, dico tēe càchí-n-ăⁿ chi ni ñá túú xìní-ndí ndéé tēe cùu-dé —càchí-güedé xăhaⁿ-güedě xii-dé.

³⁰ Te ní xáhaⁿ tēe ní ndúha núu-xi-áⁿ:

—¿Te náa ñá díú nchòhó càchí-ndó să ïo túha-ndo? Te núu ducaⁿ càháⁿ-ndó să ñá túú xìní-ndó ndéé tēe cùu-dé, te ñiu-dé ní quide tátna-dé núu-í ní ndúha —càchí-dé xăhaⁿ-dě xii-güedé.

Te xăhaⁿ tucu-dé:

³¹ —Xìní-ó să Yă Ndiôxí ñá túú tédòho-gá tnúhu càháⁿ ñáyiú quìde nchaa sá cuèhé sá dúhá, chi nchaa ñáyiú quìde cahnu ñaha xii-gá te quìdé-yu nchaa nàcuáa cùu iní-gá, te ñáyiú-áⁿ tédòho-gá tnúhu càháⁿ-yu. ³² Te ñá ííⁿ ndùu cáháⁿ ñáyiú cuendá ííⁿ tēe cada tátna núu ííⁿ ñáyiú cuáa ndéé ní cacu-xi te ndúha. ³³ Te núu ñá díú mēe Yă Ndiôxí ní tēndaha ñaha-gá xii tēe-ăⁿ véxi-dé ñá, te vá ndácú-dě cada tátna-dé núu-í ní cùu —cachí-dé xăhaⁿ-dě xii-güedé.

³⁴ Te ní xáhaⁿ-güedě:

—Dico yòhó ndéé yatni vâi cuéchi sa ta quìde-n véxi, ¿te vitna nacanú ichi ñaha-n xii-ndí cáháⁿ-n-ăⁿ? —càchí-güedé xăhaⁿ-güedě xii-dé.

Te ní queñuhu ñaha-güedě xii-dé tnuú-güedé ñá túú ní dàña-gá-güedé níhí tnàhá ndíhi ñaha-dé xii-güedé.

Ñáyiú ñá túú ndìxi túú iní cuèndá nchaa sá cuèhé sá dúhá quidé-yu

³⁵ Te ní níhí Jèsús tnúhu sá nǐ queñuhu-güedé tée ní cuhú núú-xi-ánⁿ tnuú-güedé cuèndá sá vǎ tnàhá tnúhu ndìhi ñaha-gǎ-dé xii-güedé, te ní naníhí ñáhá-gǎ xii-dé te ní xáhaⁿ-gǎ:

—¿Sàndáá iní-n Dèhe Yá Ndiöxí-ǎⁿ? —càchí-gá xáhaⁿ-gǎ.

³⁶ Te ní xáhaⁿ tǎe ní cuhú núú-xi-ánⁿ:

—Mèstrú, cachí tnúhu núú ndèè ndécú tǎe-ánⁿ cuèndá quíndáá iní-í-dé —càchí-dé xǎhaⁿ-dǎ xii-gá.

³⁷ Te ní xáhaⁿ Jèsús:

—Sa xìní-n-dǎ chi ñiu-dé cúú yǎhú tée ndàtnúhu ndìhi-n —càchí-gá xáhaⁿ-gǎ xii-dé.

³⁸ Te ní ngüíñí xítí-dǎ núú-gǎ, te ní xáhaⁿ-dǎ:

—Xítohó Jesucristú, sàndáá iní ñáhà-í xii-n —càchí-dé xǎhaⁿ-dǎ xii-gá.

³⁹ Te ní xáhaⁿ tùcu Jesús:

—Yúhú véxi-í ñuyú-a cada ndáá-í cuéchi ñáyiú. Te nchaa ñáyiú ñá túú quide váha cùú-yu dàtná ñⁿ ñáyiú cuàá, dico nchaa ñáyiú cùtnuní iní-xi sá ñà túú quide váha, te núu na quíndáá iní-yu tnúhu càháⁿ-í, te cada iní-ndó sǎ dàtná sá nǐ nacaáⁿ núú-yu chi tñíⁿ-yu tnúhu càháⁿ-í. Te ñáyiú càchí sá quidé vǎha vá núu núu-yu cuéchi-yu chi quesàhá-yu sá ïo ndáá quidǎ-yu, ñáyiú-ánⁿ cúú-yu dàtná ñⁿ ñáyiú cuàá, chi vá ndíxí tǔu iní-yu sá ñà túú quide váha-yu ndécú-yu, te vá tñíⁿ-yu tnúhu càháⁿ-í —càchí-gá xáhaⁿ-gǎ xii-dé.

⁴⁰ Te sá dúcáⁿ nǐ cáháⁿ-gá, núu ní cáháⁿ ñⁿ úú cue tée cùu fariséú, te xǎhaⁿ-güedǎ:

—¿Te náa tnàhá nchúhú cuàá-ndí cáháⁿ-n-ǎⁿ? —càchí-güedé xǎhaⁿ-güedǎ xii-gá.

⁴¹ Te ní xáhaⁿ Jèsús:

—Te núu dicó nchòhó cuàá-ndó ñá, te vá cùndècu cuéchi-ndo ni cùu, dico càchí-ndó sǎ ndéhé-ndó ìⁿ sá quidé-ndó te ñá ndáá, núu xǎⁿ ío ndècu cuéchi-ndo.

10

Jèsús càháⁿ-gá cuendá cùrrálí mběé

¹ Te na càchí tnúhu ndáá-í xii-ndo sǎ ìⁿ téé ñá túú quǎhu ndáa yuyehe ìⁿ currálí mběé, te cùtexínu-ni na cùidó-dé, téé-áⁿ cúú-dě ñádúhú. ² Dico téé quǎhu ichi yèhe currálí-güedi, téé-áⁿ cúú-dě xítóhó-güedi. ³ Te téé ndéé yèhe currálí-güedi nàcaáⁿ-dé te cuánguǎhu xítóhó-güedi te ní cáháⁿ-dé, te ní nucúhuⁿ ndudú ñáhá-güedi xii-dé. Te ní cáháⁿ díú-dě-güedi te ní queñuhu-dé-güedi cùrrálí. ⁴ Te sátá ñí quee-güedi cùrrálí, te ní ngódó núú-dě núú-güedi, te ní ngüíta nchicúⁿ ñáhá-güedi xii-dé chi ní nucúhuⁿ ndudú ñáhá-güedi. ⁵ Te ñá túú chinchicúⁿ-güedi ìⁿ téé tàtú, chi nùcúhuⁿ ndudú-güedi sá ñà díú xítóhó-güedi cùu-dé, núu xǎⁿ xínú-güedi núú-dě —càchí-gá xáhaⁿ-gǎ xii-güedé.

⁶ Duha ní cáháⁿ Jèsús cuendá sá cuení-gá dacuàhá-yu tnúhu-gá ní cùu, dico ñá ní tècú tnùní-yu nása ndùu tnúhu ní cáháⁿ-gá.

Jèsús cúú-gǎ dàtná ìⁿ toli

⁷ Te ní xáhaⁿ tùcu Jesús xii-güedé:

—Na càchí tnúhu ndáá-í xii-ndo sǎ yǎhú cùu-í dàtná ìⁿ yèhe currálí núú ndǎhu cue mběé. ⁸ Te nchaá cue téé sa yòdo nuu-gá ní quixi ní dándàhú-güedé ñáyíu cùu-güedé dàtná ñádúhú dùhu-güedé cue mběé ní cùu, dico ñá ní quide cuendá ñáhá-güedi xii-güedé, chi ní cutnùnì iní-güedi sá ñà díú xítóhó-güedi cùu-güedé. ⁹ Te yúhú cùu-í dàtná yuyèhe currálí cue mběé. Te ducaⁿ

sătnahá-xi cùu-í chi nchaa ñáyiú na tùha ñaha xii-í te naníhí tàhú-yu. Te cùú-yu dàtná cue mběé quiti xĩquee cùrrálí-xi cuáháⁿ-güedi núú cáá íté caxi-güedi, te dàtnùní cuándihu-ná-güedi cùrrálí, ducaⁿ sãtnahá-xi cùú-yu.

¹⁰ 'Ñádúhú òré véxi-dé chi dùhu-dé, sãhni-dé te dànaa-dé mběé, dico yúhú chi véxi-í cuendá sá naníhí tàhú-ndó te ío cudíí ìní-ndó cùnu cuechi-ndo núú Dütú Ndiõxí ni caa ni quíhíⁿ. ¹¹ Te yúhú cùú-í dàtná ìⁿ toli téé ío nèhe cuendá mběé-xi, chi téé-áⁿ cuéi na cùú-dé sá cùú-xí mběé-dě cuendá-nă sá ná cãcu-güedi. ¹² Te núú ìⁿ téé na còto ñaha xii-güedi, te téé-áⁿ cuendá-ni sá ñúhú yãhu-dé xító-dě-güedi. Te núú na quíni-dé sáá ìⁿ quiti dééⁿ te dàña-dé-güedi xínu-dé, te ndíhi-güedi xité nuu ñaha quiti dééⁿ-ăⁿ, chi ñá díú mèi xítóhó-güedi cùu-dé. ¹³ Chi cuendá-ni sá ñúhú yãhu-dé xító-dě-güedi núú ñá túú nă ndíhú ìní-dé cuéi na dândíhi ñaha quiti cuihna. ¹⁴ Te yúhú cùú-í dàtná ìⁿ téé ío váha xito mběé-xi, chi téé-áⁿ da ìⁿ da ìⁿ-di xìní-í-dé nàcuáa ndăa-di, te ducaⁿ xìní ñáhá-güedi xii-dé. Te ducaⁿ sãtnahá-xi cùu yúhú ndíhi nchaa ñáyiú sândáá ìní ñáhá xii-í, chi yúhú xìní-í-yu te ducaⁿ mēé-yu xìní ñáhă-yu xii-í.

¹⁵ 'Te diu-ni ducaⁿ cùu-í ndíhi Tătà-í, chi xìní ñáhá-gă xii-í te xìní-í-gá. Te sáá nduu cùú-í cuendá nchaa ñáyiú sândáá ìní ñáhá xii-í. ¹⁶ Te ndècu-gá ñáyiú vátá quíndáá ìní ñáhá-gă xii-í. Te xini ñuhu-xi cundedóho-yu tnúhu-í te quíndáá ìní ñáhă-yu cuendá ìⁿ-nă ichi cuú-yu, te ducaⁿ cùndecu ìⁿ-ná téé coto ñaha xii-yu cuu-dé dàtná ìⁿ tòlí-yu, te téé coto ñaha xii-yu-áⁿ cúú yúhú.

¹⁷ 'Te Tătà-í ío cudíí ìní ñáhá-gă xii-í cuendá sá sáá ìⁿ nduu te cuú-í, te cuú-í chi ducaⁿ cãhí ìní-í, te ñá díú sã cúú ìní ñáyiú ñuyúú-a cuú-í, te cuú-í dico ndoto-í. ¹⁸ Te vá yõ ìⁿ te ndacu cahni ñaha xii-í, te núú ñá díú sã cúú ìní

mèè-í cuú-í. Te dàtná-ni cùu iní-í sá cùu-í te òu-ni ducaⁿ ndòto-í chi ducaⁿ nĩ cachí Tàtà-í Dútú Ndiòxí cunduu — cächí-gá xáhaⁿ-gã xii-güedé.

¹⁹ Te sá dúcáⁿ nĩ cáháⁿ-gá te ñá ní cùu ìⁿnuu tucu ñáyiú isràél. ²⁰ Te davá-yu ní xítناهá-yu:

—¿Ná cuendá sàndáá-tu iní-ndó tnũhu càháⁿ tée-ãⁿ, te yucu ñávãha ndècu ndihí-dé, lúcú tée-ãⁿ? —cächí-yu xítناهá-yu.

²¹ Te davá-yu ní xítناهá-yu:

—¿Náa xìní-ndó ìⁿ tée ndècu ndihí yucu ñávãha duha váha càháⁿ-dé? ¿Náa xìní-ndó nũu ndàcu yucu ñávãha cada tátna-xi núú ìⁿ tée cuáá te ndúha? —cächí-yu xítناهá-yu.

Ñáyiú isràél dáquèe tíhũ-yu Jèsús

²² Te ndi tnahá cuía ndadá càhnú-yu vico veñúhu càhnu sá ìo cùnuu ñúú Jerusàlén, te mei yóó quidé vixiⁿ-xi quidé-yu vico-áⁿ. ²³ Te corrèdór veñúhu-áⁿ nání-xí Sàlomón, te xíaⁿ xícá cùu Jèsús. ²⁴ Te ní chítú níhnú ñáyiú isràél núú-gã, te ní xáháⁿ-yu:

—¿Ná ndéé òré cachí tnũhu ndáá-n, te núu sá Crìstú Yaá ní tendaha Yã Ndiòxí véxi ñuyúú-a cùu-n, àdi ná tée cùu-n?, cáháⁿ-ni-n —cächí-yu xáháⁿ-yu xii-gá.

²⁵ Te ní xáhaⁿ Jèsús:

—Sa ní cachí tnũhu-í te ñá sàndáá iní-ndó, te ndèhe-ndo sá vái nũú sã quidè-í sá nĩ táuchíúⁿ Tàtà-í cada-í, te cùu-xi ìⁿ sá cútnùní iní-ndó nã tée cùu-í. ²⁶ Dico nchòhó ñá sàndáá iní-ndó, chi ñá túú cùu-ndo ñáyiú ní chitnahá ñáhá xii-í. ²⁷ Chi nchaa ñáyiú ní chitnahá ñáhá xii-í cùu-yu dàtná cue mbéé quiti xĩndecu ndihí xítóhó-xi chi núcúhuⁿ ndudú-güedi xítóhó-güedi, te ducaⁿ nàquiní ñáhá-ní xítóhó-güedi xii-güedi. Ducaⁿ sãtnahá-xi cùu nchaa ñáyiú ní chitnahá ñáhá xii-í. ²⁸ Te yúhú cada-í te nduu táhũ-yu cundecu ndihí ñáhá-yu xii-í

ni caa ni quíhíⁿ te vá ííⁿ ndùu-gá cuíta nihnú-yu, te ni vǎ yǒo ííⁿ ndacu naquendeé ñáhá xii-yu ndaha-í. ²⁹ Chi Tǎtǎ-í ní taxi cuendá ñáhá-gǎ xii-yu. Te ío cùnuu-gá nǔu xǎⁿ vá yǒo ííⁿ ndacu naquendeé ñáhá xii-yu ndaha-gá. ³⁰ Yúhú ndíhi Tǎtǎ-í Dútú Ndiǒxí ííⁿ-ni cùu-ndí —càchí-gá xáhaⁿ-gǎ xii-yu.

³¹ Te ní queheⁿ tucu ñáyiú isràél yúú cuǎha ñàhá-yu xii-gá ní cùu.

³² Te ní xáhaⁿ-gǎ xii-yu:

—Ío cuéhé sǎ vǎha ní quide-í núú-ndó nǐ chindee ñàha Tǎtǎ-í Dútú Ndiǒxí. ¿Te ndědacàa sá ñǎ tnàhá iní-ndó nǔu cùiní-ndó cuǎha ñaha-ndo yúú xii-í-i? —càchí-gá xáhaⁿ-gǎ xii-yu.

³³ Te ní xáhaⁿ ñáyiú isràél:

—Ñá díú cuendá nchaa sá vǎha ni quide-n cuiní-ndí cuǎha ñaha-ndí yúú xii-n, chi ííⁿ dìi-ni sá ïo càháⁿ úhú-n cuendá Yǎ Ndiǒxí. Te dìcò ííⁿ tée ñuyíú-a cùu-n te càchí-n sǎ cùú-n Ndiǒxí —càchí-yu xǎhǎⁿ-yu xii-gá.

³⁴ Te ní xáhaⁿ Jèsús:

—Núú tütú Yǎ Ndiǒxí sá ndécú ndíhi-ndo cáháⁿ-xi nàcuáa ní cáháⁿ-gá, te duha ní cachí-gá: “Nchòhó quidé-ndó nǔu-í”, duha ní cachí-gá. ³⁵ Te nàha-o sá vǎ cùú quèhndé nihnu-o tnǔhu yòdo tnuní núú tütú Yǎ Ndiǒxí, chi mee-gǎ ní cachí-gá sá cáďǎ-yu núú-gǎ, te vá càchí-ó sǎ ñǎ ndáa. ³⁶ Te núu ducaⁿ nǐ cáháⁿ-gá sá nǔú-gǎ quidé nchàa ñáyiú ní sándáa iní ñáhá xii-gá ñá, ¿te ná cuendá cúdeéⁿ-ndó nǔu yǔhú sá càchí-í sá cùú-í Déhe-gá? Te mee Yǎ Ndiǒxí ní tendaha ñàha-gá xii-í véxi-í ñuyíú-a sá cáďǎ-í chiuⁿ-gá. ³⁷ Te núu ñá túú quide-í nàcuáa ní táuchíúⁿ Tǎtǎ-í cada-í ñá, te vá quíndáa iní ñáhá-ndó. ³⁸ Te núu quide-í ñá, te cuéi vá quíndáa iní ñáhá-ndó xii mee-í dico quíndáa iní-ndó nchàa chiuⁿ quide-í. Ducaⁿ te cutnùní

ndáá iní-ndó sǎ Yǎ Ndiǒxí ndécú ndìhi-í te ìⁿ-ni cùu-ndí —càchí-gá xáhaⁿ-gǎ xií-yu.

³⁹ Te ní cuiní-güedé tni ñaha tùcu-güedé xii-gá quíhíⁿ-gá vecaá ní cùu, dico ní xinu núú ñáhá-gǎ xii-güedé.

⁴⁰ Te ní xica-gá cuáháⁿ-gá ndàa ingá xio yúte Jòrdán núú nǐ xóo dacuàndute ndí Juàá ñáyiu ndéé díhna, yàcáⁿ ní xíndecu-gá. ⁴¹ Te yàcáⁿ ío vǎi ñáyiu ní sáháⁿ ní cáháⁿ ndìhi ñaha xì-gá, te ní xítnàhá-yu:

—Ndí Juàá, cuèi ñǎ túú ní quide ndí sá vǎ yǒo tnàhí ndàcu cada dico ndáá ní cáháⁿ ndí, chi dàtná-ni ní cáháⁿ ndí quide té-a —càchí-yu xítnàhá-yu.

⁴² Te yàcáⁿ ío vǎi-yu ní sándáá iní ñáhǎ-yu xii-gá.

11

Ní xíhí té Lǎzarú

¹ Ñúú Bètaniá ní xíndecu ìⁿ téé ní xínani-dě Lǎzarú. Te càhú víhí nǐ tnahá-dé ní cuhú-dé, te ní xíndecu ndìhi-dé cue cúha-dé tá Màriá ndìhi tá Màrta chi xíaⁿ ñúú-yu. ² Te tá Màriá-áⁿ cúu-xí xíchí nǐ sódó àcití sáháⁿ tnámí sáhá Jèsús, te ní nadayìchí-xi sáhá-gǎ ndìhi idi díqui-xi. Te cuendá sá cùhú cúha-yu té Lǎzarú, ³ núu ní tendàhá-yu ñáyiu nàha tnúhu cuáháⁿ núú Jèsús, te xǎhǎⁿ-yu xii-gá:

—Mèstrú, téé ío cùu iní-n ío càhú tnàhá-dé cùhú-dé —càchí-yu xǎhǎⁿ-yu xii-gá.

⁴ Te sá dúcáⁿ càa tnúhu ní sáá, núu ní xáhaⁿ Jèsús xií-yu:

—Dico cuéhé-ǎⁿ chi vǎ cùú-dé sá cùú dúcáⁿ-dě, chi Yá Ndiǒxí cuiní-gá sá quíní-yu nchaa sá cádá-gǎ cuendá chiñuhu ñáhá-yu xii-gá, te díu-ni ducaⁿ chiñuhu ñáhá-yu xii yúhú Déhe-gá —càchí-gá xáhaⁿ-gǎ xií-yu.

⁵ Te cuèi ío cùu iní ñáhá Jèsús xii té Lǎzarú ndìhi cue cúha-dé ⁶ dico òré ní níhí-gǎ tnúhu, te ní cuyaa-gǎ úú-gá nduu núú ndécú-gǎ. ⁷ Te ní xáhaⁿ-gǎ xii cue téé xica cuu ndìhi-gá:

—Na quíhíⁿ tucu-o dìstrítú Jùdeá —càchí-gá xáhaⁿ-gǎ xii-güedé.

⁸ Te ní xáhaⁿ cuè téé xica cuu ndíhi-gá xii-gá:

—Mèstrú, vitna-ni cuíní cue téé isràél xǐndecu yàcáⁿ cuáha ñaha-güedě xii-n yúú ní cùu, ¿te cuíní-ni tucu-n quíhíⁿ-n-ú? —càchí-güedé xáhaⁿ-güedě xii-gá.

⁹ Te ní xáhaⁿ Jèsús:

—Úxúú òré cúú ìhⁿ nduu, te núu nduu na càca cuu-o, te ñá túú ñă candaundeé-ó chi cùtnuní núú-ó chi dító.
¹⁰ Dico núu niú ná càca cuu-o, te ìó ná candaundeé-ó chi vá cùtnuní núú-ó —càchí-gá xáhaⁿ-gǎ xii-güedé.

¹¹ Te ní xáhaⁿ Jèsús:

—Té Lǎzarú téé ío váha tnàhá tnúhu ndíhi-o ñí xídí-dé dico quíhíⁿ-ó chi ndocani-o-dě —càchí-gá xáhaⁿ-gǎ xii-güedé.

¹² Te ní xáhaⁿ-güedě xii-gá:

—Mèstrú, te núu xídí-dé te váa sa ta ndüha-dé cuáháⁿ —càchí-güedé xáhaⁿ-güedě xii-gá.

¹³ Duha ní cáháⁿ Jèsús, chi té Lǎzarú sa ní xíhí-dé te cue téé xica cuu ndíhi-gá ní sani iní-güedé sá ñí xídí ndisa-dé.

¹⁴ Te Jèsús ní xáhaⁿ ndǎá-gá xii-güedé:

—Sa ní xíhí té Lǎzarú. ¹⁵ Váha-gá sá ñă ní sǎháⁿ-í quíngoto-í-dé, chi ndècu ingá chiùⁿ cada-í quíní-ndó, te quindáá iní ñáhá-gǎ-ndó xii-í, te vitna na quíhíⁿ-ó núú ndécú yìqui cuñú ndíi —càchí-gá xáhaⁿ-gǎ xii-güedé.

¹⁶ Te té Mǎxí téé xáhaⁿ-güedě cuáchí ní xáhaⁿ-dě xii dava-gá-güedé:

—Na quíhíⁿ-ó nchàa-o chi yàcáⁿ cuú-ó ndíhi-dé —càchí-dé xáhaⁿ-dě xii-güedé.

Jèsús càháⁿ-gá sá cuèi na cùú ñáyiú dico ndotó-yu cundecú-yu ndíhi-gá

17 Te òré ní sáá Jèsús ñuú Bètaniá, te ní xáhăⁿ-yu sá sà ní cuu cúmí nduu ní xíhí té Lăzarú. 18 Te ñuú-áⁿ cáá yàtni-ni-gá ñuú Jerusàlén, dàtná cuádava-ná òré cuhuⁿ-o ìchi te saá-ó. 19 Núu xíăⁿ vâi ñáyiu isrâél ní sáháⁿ-yu ní cáháⁿ ndihíⁿ-yu tá Mărta ndihíⁿ cúhú-xi tá Măriá, te ní sáhàháⁿ-yu tnúhu ndee ìní sá dúcáⁿ ñí xíhí cúha-yu. 20 Te ní níhí tă Mărta tnúhu sá ñúhú Jèsús ichi cuáháⁿ-gá núu ndécŭ-yu núu ní sáháⁿ-xi ní sátnahá-xi-gá, te cúhú-xi tá Măriá ní ndóo-xi vehe. 21 Te òré ní naníhí tă Mărta Jèsús, te ní xáhaⁿ-xi xìi-gá:

—Mèstrú, te núu dicó ní x̃ndecu-n ìha te vá cùú cúha-ndí ní cùu. 22 Te cuèi vitna te núu ná sá ná càcáⁿ-n nŭú Yă Ndiòxí te taxi-gá xii-n —càchí-xi xăhaⁿ-xi xìi-gá.

23 Te ní xáhaⁿ Jèsús:

—Vá ndìhú ìní-n chi ndoto cúha-n —càchí-gá xáhaⁿ-gă xii-xi.

24 Te ní xáhaⁿ tă Mărta:

—Ndáá chi sa xìní-í sá ndótó-dě ná qũtnahá nduu ndòto nchaa ñáyiu ní xíhí —càchí-xi xăhaⁿ-xi xìi-gá.

25 Te ní xáhaⁿ Jèsús:

—Yúhú dandòto-í-yu cuèndá cundecú-yu ni caa ni quíhíⁿ ná sàá nduu. Te nchaa ñáyiu na quíndáá ìní ñáhá xìi-í, te cuèi na cùú-yu dico ndotó-yu cundecu-í ndihíⁿ-yu ni caa ni quíhíⁿ. 26 Te nchaa ñáyiu ndècu vívú ñuyúú-a te núu na quíndáá ìní ñáhă-yu xii-í, te cundecu ndihí-í-yu ni caa ni quíhíⁿ. ¿Sàndáá ìní-n tnúhu-a ñă? —càchí-gá xáhaⁿ-gă xii tá Mărta.

27 Te xăhaⁿ-xi:

—Mèstrú, sàndáá ìní-í, te sàndáá tucu ìní-í sá díú-n cùu-n Cristú Déhe Yă Ndiòxí, Yaá ní tendaha-gă véxi ñuyúú-a —càchí-xi xăhaⁿ-xi xìi-gá.

Jèsús ndàhí-gá núú ñí nguíndŭxi té Lăzarú

²⁸ Sátá dúcáⁿ nǐ cáháⁿ-xi te ní sáháⁿ ngana-xi cúhú-xi tá Màriá, te dayuhu nǐ xáhaⁿ-xi:

—Yácáⁿ ní quexìo Mestrú, te càna ñaha-dé xii-n — cǎchí-xi xǎhaⁿ-xi.

²⁹ Te sá dúcáⁿ xǎhaⁿ cǔhú tǎ Màriá sá cáná ñàha Jesús xii-xi, núu ndǐhi-ni ní xica-xi cuáháⁿ-xi núú ndécú-gǎ.

³⁰ Te Jèsús vátá quǐhu-gá xití ñuú, chi ndècu-ni-gá núú nǐ sáháⁿ tnahá ñáhá tǎ Màrta. ³¹ Te ñáyiu isràél ndécú sǎñaha tnǔhu ndee ìní xii tá Màriá ndǐhi cúhú-xi ní sani iní-yu sá cuáháⁿ-xi núú yǐndǔxi cúha-xi ndáhyú-xi ní cáhǎⁿ-yu, núu nchìcúⁿ-yu-xi cuáháⁿ.

³² Te ní sáá tá Màriá núú ndécú Jèsús te ní nguúíñí xití-xí núú-gǎ, te xǎhaⁿ-xi xì-gá:

—Mèstrú, te núu dícó ní xǐndecu-n ìha te vá cùú cúha-ndí ní cùu —cachí-xi xǎhaⁿ-xi xì-gá.

³³ Te sá nǐ xiní Jèsús ndáhyú tá Màriá ndǐhi ñáyiu isràél nchìcúⁿ ñáhá cuáháⁿ, xǎⁿ ío ní cuyica ìní-gá. ³⁴ Te ní xáhaⁿ-gǎ xií-yu:

—¿Ndèè ní taxi ndecu-ndo yìqui cuñú-dé-i? —cǎchí-gá xáhaⁿ-gǎ xií-yu.

Te ní xáhǎⁿ-yu:

—Mèstrú, néhé ná quèhíⁿ-ó te quiní-n —cǎchí-yu xǎhǎⁿ-yu xii-gá.

³⁵ Te ní ndáhyú-gá tnahá-gá. ³⁶ Te ní xítñaha ñáyiu isràél:

—Súúní cùu iní-dé ndí ni cùu —cachí-yu xítñahá-yu.

³⁷ Te davá-yu xítñahá-yu:

—Tée-a ní quide tátna-dé núú tǎe cuàá te ní ndúha. ¿Te nása ní cuu núu ñá túú ní quide tátna-dé té Lázaru cuendá sá vǎ cùú-dé ní cùu-i? —cachí-yu xítñahá-yu.

Jèsús dándòto-gá té Lázaru

³⁸ Te ío ní cuyica tùcu iní Jèsús òré ní quexìo-gá yuhu yaú núú nǐ chihi-güedé yiqui cùnú té Lázaru. Te yuhu yaú-áⁿ ndèdí ìⁿ yúú. ³⁹ Te ní xáhaⁿ Jèsús xíí-yu:

—Chí xócàni yúú-ǎⁿ —càchí-gá xáhaⁿ-gǎ xíí-yu.

Te ní xáhaⁿ tǎ Mǎrta cúha téé ní xíhí-áⁿ:

—Mèstrú, sa tucu sàháⁿ-dé chi sa ní cuu cúmí nduu sá nǐ xíhí-dé —càchí-xi xǎhaⁿ-xi xii-gá.

⁴⁰ Te ní xáhaⁿ Jèsús:

—¿Náa ñá díú nǐ cachí-í sá núu na quíndáá iní-n, te quíní-n sǎ ýo càhnu cuu Yá Ndiǒxí? —càchí-gá xáhaⁿ-gǎ xii-xi.

⁴¹ Te ní xócání-yu yúú ndèdí yuhu yaú-áⁿ. Te ní ndacoto-gá andíu, te ní xáhaⁿ-gǎ xii Tǎtá-gǎ Dútú Ndiǒxí:

—Táu, ndàcáⁿ táhù-í núú-n sǎ nǐ tèdoho-n tnúhu ní cáháⁿ-í. ⁴² Te yúhú sa nàha-í sá ncháá-ni òré ndèdóho ñaha-n xii-í, dico duha càháⁿ-í cuendá sá ná tècú dóho nchaa ñáyiú ndècu iha cuendá quíndáá iní-yu sá díú-n nǐ tendaha ñaha-n xii-í véxi-í ñuyíú-a —càchí-gá xáhaⁿ-gǎ xii Dútú Ndiǒxí.

⁴³ Te sátá dúcáⁿ nǐ cáháⁿ-gá ndíhi Yá Ndiǒxí, te níhi ní cáháⁿ-gá xáhaⁿ-gǎ xii téé ní xíhí-áⁿ:

—¿Lázaru, tandèe xíaⁿ! —càchí-gá xáhaⁿ-gǎ xii-dé.

⁴⁴ Te ní ndee téé ní xíhí-áⁿ yaú-áⁿ, te ndùtu dóó cuíñí ndàha-dé ndíhi sáhá-dě, te dǎhu tucu ìⁿ dóó núú-dě. Te ní xáhaⁿ Jèsús xíí-yu:

—Chí nándàxi-dé te daña-ndo-dě ná cáca-dě —càchí-gá xáhaⁿ-gǎ xíí-yu.

Ndùcu-güedé nàcuáa cada-güedé cahni-güedé Jèsús

(Mt. 26:1-5; Mr. 14:1-2; Lc. 22:1-2)

⁴⁵ Te nchaa ñáyiú nchicúⁿ ñáhá xii tá Màriá cuáháⁿ ío vaí-yu ní sándáá iní-yu Jèsús sá nǐ xiní-yu nàcuáa ní quide-gá. ⁴⁶ Dico davá-yu ní sáháⁿ-yu núú cuè téé cùu fariséú, te ní caní-yu cuèndú núú-güedě nàcuáa ní quide

Jèsús. ⁴⁷ Te cue tée cùu fariséú ndìhi cue dútú cúnùu ní nataká-güedé ní xóo-güedé jùndá, te ní xítñàha-güedé:

—¿Nása cada-o?, chi tée-ǎⁿ ío vài sá vǎ yõo tñàhí ndàcu cada quide-dé. ⁴⁸ Te núu na dàña ío te nchaa ñáyiú quindáá iní ñáhǎ-yu xii-dé, te quixi cue tée ñuú Rómá dangòyo-güedé veñúhu-o te danàa-güedé nchaa ñuú-ó — càchí-güedé xítñàha-güedé.

⁴⁹ Te ìⁿ cue tée-áⁿ nání-dě Caifás, te cùnùu-gá-dé núú dàva-gá cue dútú cuǎ-ǎⁿ, te ní xáhaⁿ-dě xii-güedé:

—Nchòhó ni lùha ñá túú cùtnuní iní-ndó. ⁵⁰ Te ni ñǎ sǎha-ndo cuendá sá vǎha-gá tñahá-ó, te núu na cùú ìⁿ-ni tée cuendá nchaa ñáyiú isràél, te ñá díú sǎ dánàa ñaha-güedé xii-yu —càchí-dé xǎhaⁿ-dě xii-güedé.

⁵¹ Dico té Caifás chi ñá díú sǎ cúú iní mee-dě ní cǎháⁿ-dé, chi cuendá sá cuǎ-ǎⁿ ñí cunuu-dě núú cuè dútú, núu xǎⁿ Yǎ Ndiǒxí ní dácáhú iní ñáhá-gǎ nàcuáa cáháⁿ-dé sá Jèsús cuú-gá sá cúú-xí nchàa ñáyiú isràél. ⁵² Te ñá díú cuendá mee-ni ñáyiú-áⁿ cuú-gá, chi cuú-gá tñahá cuendá nchaa ñáyiú ní sándáá iní ñáhá xii-gá, ñáyiú nchíténuu ñihí ñuyú, te ìⁿ-nǎ cuú-yu ndìhi-gá. ⁵³ Núu ndéé nduu-ǎⁿ ñí ndatnúhu cue tée cùnùu núú ñáyiú isràél nàcuáa cada-güedé cahni-güedé Jèsús.

⁵⁴ Te xǎⁿ nùu ñá ní xìca cuu-gá Jèsús quini ñáhá ñáyiú isràél, te ní quee-gá cuáháⁿ-gá ñuú Efràín, ìⁿ ñuú cáa yàtni yucu, yàcáⁿ ní ngüíñí-gá ndìhi cue tée xìca cuu ndìhi-gá.

⁵⁵ Te ta cùyatni nduu cadá-yu vico pàscuá. Te cuéhé ñáyiú ní quee-yu ñuú-yu cuáháⁿ-yu ñuú Jerusalén cuendá sá sà ndìhí-yu nchaa-yu nduu íí, te tñahá nduu vico pascuá. ⁵⁶ Te yàcáⁿ nándúcú-yu Jèsús ní cùu te ñá túú-gǎ òré-áⁿ, te ní naníhí tñáhǎ-yu xití veñúhu, te xítñahá-yu:

—¿Nása sàni iní-ndó-í? ¿Quixi Jèsús vico àñ ñàhá? —
càchí-yu xìtnàhá-yu.

⁵⁷ Te cue tée cùu fariséú ndihí cue dútú cúnùu sa ní xáhaⁿ-güedě xii ñáyiú sá ñùu nděda-ni càa-yu xìní-yu núú ndécú Jèsús te na càháⁿ-ni-yu cuendá tnií ñaha-güedě xii-gá.

12

Ḥⁿ ñadìhí chíhí-áⁿ Jèsús acítí
(Mt. 26:6-13; Mr. 14:3-9)

¹ Íñú-gá nduu cùmání tnahá vico pàscuá, te ní sáháⁿ Jèsús ñúú Bètaniá, ñúú té Lăzarú tée ní dándótó-gă.

² Te xíaⁿ ñí cadúha-yu sá ñí cudìni Jesús. Te tá Mărta ní sani-xi cóhó, te té Lăzarú yíhí-dě mèsá ndihí Jèsús, ndihí dava-gá-güedě xéxí-güedě. ³ Te tá Măriá néhé-xí cuădava lítrú acítí sàháⁿ tnámí să ïo ndèyáhu, te acítí-áⁿ ñí cuáha mee-ni yŭcú nărdú, te ní sódó-xi sáhá Jèsús, te ní nadayìchí-xi ndihí idi díquí-xi sáhá-gă. Te ñihí xítí vehe ní xíté nuu dicó acítí-áⁿ. ⁴ Te té Júdás déhe té Xímú Iscarioté ñiu-ni ḥⁿ tée xica cuu ndihí-gá, tée cuáha cuendá ñàhá xii-gá núú cuè tée cùu úhú iní ñàhá ñí xáhaⁿ-dě xii-gá:

⁵ —¿Ná cuendá ñá ní cùyáhu acítí-a sá ùní ciendú díhúⁿ denàriú cuu cuendá ñáyiú ndàhú? —càchí-dé xáhaⁿ-dě xii-gá.

⁶ Dico sá dúcáⁿ ñí càháⁿ té Júdás chi ñá díú să ndísá ñùhu iní-dé ñáyiú ndàhú chi ñicó-ni ḥⁿ ñádúhú cúú-dě, chi ñiu-dé néhé cuendá-dé díhúⁿ-güedě nchaa-güedé te ní xóo duhu ñàha-dé xii-güedé. ⁷ Te ní xáhaⁿ Jèsús:

—Daña, vá dásàtú-n ñí xíchí-a na tàxúha nahi-xi àcítí-a, chi nàndíhí ndéé òré ná nguñdŭxi-í. ⁸ Chi nchòhó chi cuhúⁿ tnahá-ni ñáyiú ndàhú tnuú-ndó, dico yúhú chi

vá ncháá ndùu cundecu ndìhi ñaha-í xii-ndo —càchí-gá xáhaⁿ-gã xii-dé.

Tnàhá té Lăzarú cuìní-güedé cahni ñaha-güedě xii-dé

⁹ Te vâi ñáyiú isràél ní níhĩ-yu tnúhu sá ndécú Jèsús ñúú Bètaniá. Te ní sáháⁿ-yu cuendá quiní-yu-gá, te quiní-yu tnàhá té Lăzarú téé ní dándótó-gã. ¹⁰ Te cue dútú cúnùú ní ndatnúhu-güedé ní cuu ñⁿnuu-güedě cuendá sá cáhni-güedě tnàhá té Lăzarú ní cùu, ¹¹ chí diu cuendá téé-áⁿ ñí cuu cuéhé ñăyiú isràél tá dăña nihnú-yu-güedě cuáháⁿ cuendá sá ñí sándáá iní-yu Jèsús.

Jèsús cuánguïhu-gá ñúú Jerusalén

(Mt. 21:1-11; Mr. 11:1-11; Lc. 19:28-40)

¹² Te nduu tněé-áⁿ vâi ñáyiú ní quexìo ñúú Jerusalén cuendá cundecú-yu vico, te ní níhĩ-yu tnúhu sá Jèsús sáá-gá tnàhá-gá cundecu-gá vico-áⁿ, ¹³ núú ní xehndé-yu ndaha yùtnu ñúú, te nêhé-yu ní sáháⁿ ní sátnahá ñáhă-yu xii-gá. Te níhi ní cáhâⁿ-yu, te càchí-yu:

—jío càhnu cuu Yá Ndiõxí! Te ducaⁿ-ni ño càhnu cuu Yaá ní tendaha-gã véxi quindaha ñaha xii-o —duha ní cachí-yu.

¹⁴ Te Jèsús ní níhí-gã ñⁿ bŭrru, te yòdo-gá-di cuáháⁿ. Te ducaⁿ ñí cuu chí ní quee ndáá-xi nàcuáa càhâⁿ-xi núú tütú Yă Ndiõxí núú càchí-xi:

¹⁵ Vá yùhú nchòhó cue ñáyiú ndècu ñúú Sìón,

chí iha véxi téé yìndaha ñaha xii-ndo yodo-dé ñⁿ bŭrru. Duha càchí-xi núú tütú-gá. ¹⁶ Dico cue téé xica cuu ndìhi Jesús ñá ní ndàcu iní-güedé nàcuáa càhâⁿ-xi núú tütú Yă Ndiõxí nàcuáa cada Jèsús. Dico sáta cuândaa-gá andiú càda cahnu ñaha Tátá-gã xii-gá, te ní ndacu iní-güedé sá dúcáⁿ yòdo tnuní nàcuáa cada-gá, te ducaⁿ ñí cuu.

¹⁷ Nchaa ñáyiú ní xíndecu ndìhi Jèsús òrè ní dándótó-gã té Lăzarú, ya yàcáⁿ ní caní-yu cuendú núú ñăyiú nàcuáa

ní quide ñaha-gǎ xii-dé. ¹⁸ Te vǎi-yu ní sáháⁿ-yu núú ndécú Jèsús cuèndá sá ñí níhǐ-yu tnúhu ní quide-gá sá vǎ yǒo tnàhí ndàcu cada. ¹⁹ Te cue tée cùu fariséu ní xítñàha-güedé:

—Ní xito-ndo ñá túú nàndihí sá quidé-ó-vá, chi nchaa ñáyu ní chinchícúⁿ ñáhǎ-yu xii-dé —càchí-güedé xítñàha-güedé.

Ñáyu ñá túú cùu ñáyu isràèl nánducú-yu Jèsús

²⁰ Te tnàhá ñáyu ñá túú cùu ñáyu isràèl ní sáháⁿ-yu vico ñuú Jerusalén ní quide càhnú-yu Yá Ndiǒxí. ²¹ Te ñáyu-áⁿ ñí sáháⁿ-yu núú tǎ Lìpé tée ñuú Bètsaidá, te ñuú-áⁿ yíndèhu-xi distritú Galileá. Te ní xáháⁿ-yu xii-dé:

—Tǎtá, vá cùndèe iní-n càchí tnúhu-n nùu ndéè ndécú Jèsús, chi cuíní-ndí cáháⁿ ndihí-ndí-gá —càchí-yu xáháⁿ-yu xii-dé.

²² Te té Lìpé ní naníhí-dě té Ndrǐxí te ní xáhaⁿ-dǎ nàcuáa càháⁿ-yu, te ndí ndùu-güedé ní sáháⁿ-güedé ní xáhaⁿ-güedǎ xii Jèsús nàcuáa càháⁿ-yu. ²³ Te ní xáhaⁿ Jèsús xii-güedé:

—Vitna ní cuyatni òré cada càhnu ñaha Tátà-í xii-í, te quiní-yu sá ìo càhnu cuu yúhú Tée cùu ñaní tnáhǎ-yu nchaa-yu. ²⁴ Te na càchí tnúhu ndáá-í xii-ndo sǎ nùu ìⁿ tatá vá ngává-xí nùu ñúhú tǎhyú-xi ña, te diu-ni ducaⁿ cùnduu-xi cundecu-xi. Dico ìⁿ tatá ná ngává nùú ñúhú xǐnu déhe-xi, te xǐⁿ nádàcayá tnáhá-xí, te mee-xi tǎhyú-xi. ²⁵ Te nchaa ñáyu ío ñùhu iní-xi cundecu ñuyú-a ñá túú ñùhu iní-yu Yá Ndiǒxí, te ñáyu-áⁿ cuíta nihnú-yu. Te nchaa ñáyu ío ñùhu iní ñáhá xii Yá Ndiǒxí, ñáyu-áⁿ cundecú-yu ndihí-gá ñí caa ñí quíhíⁿ. ²⁶ Te nchaa ñáyu cuíní cunu cuechi nùu-í xini ñuhu-xi natuha ñahá-yu xii-í, te nduu táhǎ-yu cundecú-yu núú nùhú-í

cundecu-í. Te nchaa ñáyu na cùnu cuechi núu-í, te cada càhnu ñaha Tàtá-í xií-yu —càchí-gá xáhaⁿ-gã xii-güedé.

Jèsús càháⁿ-gá sá cáhni ñàha-güedé xii-gá

²⁷ Te ní xáhaⁿ tùcu-gá:

—Ío ndìhú iní-í. Te cúñaha-ĩ xii Tàtá-í taunihnu ñaha-gã nõu dicó sá cúú, dico vá cúú chi cuendá tnàhí-a véxi-í —càchí-gá xáhaⁿ-gã xii-güedé.

²⁸ Te ní xáhaⁿ-gã xii Tàtá-gã Dútú Ndiõxí:

—Táu, cada nàcuáa ní sani iní-n cùnduu cuendá sá ná cáda càhnu ñaha ñáyu xii-n —càchí-gá xáhaⁿ-gã.

Te ducaⁿ te ní tecú ní cáháⁿ Yă Ndiõxí ndéé andiu, te càchí-gá:

—Sa ní quide-í nàcuáa cachí ñáyu sá ïo càhnu cuu-í. Te cada tucu-í cuendá cada càhnu ñaha-gá-yu xii-í —càchí Yă Ndiõxí xáhaⁿ-gã xii Déhe-gá.

²⁹ Te nchaa ñáyu xñdecu ní tecú dóho-yu ní cáháⁿ-gá, dico ñá túú ní sàni iní-yu sá méé-gã ní cáháⁿ, chi davá-yu ní xítñahá-yu sá ññhu ní cáháⁿ, te davá-yu ní xítñahá-yu sá ìⁿ espíritú xínú cuèchi núú Yă Ndiõxí ní cáháⁿ. ³⁰ Te ní xáhaⁿ Jèsús xií-yu:

—Ñá díú cuendá yúhú ní cãháⁿ Yă Ndiõxí, chi ní cáháⁿ-gá cuendá sá nchòhó cundedóho-ndo. ³¹ Te vitna ní sáá nduu càda ndáá Yă Ndiõxí cuèchi nchaa ñáyu ñuyúú-a, te ducaⁿ te vá cúnù-gá yucu ñãvãha. ³² Te na càta caa ñaha-güedé xii-í núú cùrúxí, te xíaⁿ cuú-í te ñihí-yu tnúhu ni càa xico ñuyúú, te quindáá iní-yu tnúhu-í —càchí-gá xáhaⁿ-gã xií-yu.

³³ Duha ní cáháⁿ-gá cuendá cutnùní iní-yu nàcuáa ndoho-gá òré cuú-gá. ³⁴ Te ní xáhãⁿ-yu xii-gá:

—Ñihí-ndí tnúhu sá nõú tütú yódó tnùní tnúhu Yá Ndiõxí càháⁿ-xi sá Cristú Yaá tendaha-gã quixi ñuyúú-a cundecu-gá ni caa ni quíhíⁿ. ¿Te yòhó nása càháⁿ-tu-n

să ìⁿ tée cùu ñaní tnáhá nchàa ñáyiú ñuyíú-a cahni ñaha-güedě núú cùrúxí? Te cachí tnúhu-n nă cúú tée-án —càchí-yu xăhăⁿ-yu xii-gá.

³⁵ Te ní xáhaⁿ Jèsús:

—Yúhú cùú-í dàtná ìⁿ ñuhú dáyèhé ñuyíú-a, dico sacú-ni nduu ndècu ndìhì ñaha-í xii-ndo. Te caca-ndo ichi ndáá vitna dáyehé-gá-í núú-ndó chi na cùnee te vá cùtnùní-gá núú-ndó ndèé ichi quíhíⁿ-ndó. ³⁶ Quindáá iní ñáhá-ndó xii-í vitna ndècu ndìhì ñaha-gá-í xii-ndo dándixi túú-í iní-ndó, cuèndá cutnùní iní-ndó nàcuáa ndùu cuèndá Yă Ndiöxí, te cuu-ndo dèhe-í —càchí-gá xáhaⁿ-gă xii-yu.

Te sátá dúcáⁿ ñí cáháⁿ Jèsús, te ní quee-gá cuáháⁿ-gá ìⁿ núú vă ná nihí ñáhă-yu xii-gá.

Ñáyiú israhél ñá cuiní-yu quindáá iní-yu Jèsús

³⁷ Te cuèi ío vâi sá vă yôo tnàhí ndàcu cada ní quide Jèsús ní xiní-yu, dico ni dùcaⁿ ñá túú ní sàndáá iní-yu-gá.

³⁸ Te ducaⁿ ñí quidé-yu chi dacuítíⁿ ñí quee ndáá-xi nàcuáa ní chídó tnùní ndíi Chàiaⁿ ndíi ní cáháⁿ tnúhu Yă Ndiöxí ndéé sanaha núú tütú-gá núú càchí-xi:

Yòhó Yaá cúú Xítohó-í, vá yôo ìⁿ sàndáá iní tnúhu cáháⁿ-ndí.

Te vá yôo ìⁿ cùtnuní iní-xi sá ïo cahnú cuu-n.

Duha ní chídó tnùní ndíi Chàiaⁿ núú tütú-gá. ³⁹ Te ñá ní sàndáá iní-yu chi ní quee ndáá-xi nàcuáa ní chídó tnùní tucu ndíi Chàiaⁿ núú tütú Yă Ndiöxí nàcuáa cáháⁿ Jèsús:

⁴⁰ Mee Yă Ndiöxí ní quide-gá sá vă tècú tnùní-yu,

chi ní dádăhu ndodo iní ñáhá-gă xii-yu,

chi ío sàá iní-yu núú ñá ní cuiní-gá-yu quindáá iní ñáhă-yu xii-gá.

Te ni vă túhá ñáhá-yu xii yúhú cuèndá dacăcu nihnu-í-yu.

⁴¹ Duha ní chídó tñùní ndíi Chàíá nàcuáa cáháⁿ Jèsús chi ní xiní ndíi sá ò cànhu cuu-gá.

⁴² Te cuèi ducaⁿ ñí cuu dico titní cue tée cùnuu núú ñáiyu isràél ní sándáá iní ñáhá-güedě xii-gá. Dico ñá túú ní xò cáháⁿ ndáá-güedé chi ní xóo yùhú-güedé sá vǎ dáñá-gǎ cue tée cùu fariséú quíhu-güedé veñúhu. ⁴³ Chi ní xóo cudíí-gǎ iní-güedé sá cǎháⁿ ñáiyu dàcúúxí tñùhu cǎháⁿ Yǎ Ndiǒxí.

Ñáiyu ñá túú sàndáá iní tñùhu Jèsús cuíta nihnú-yu

⁴⁴ Jèsús níhi ní cáháⁿ-gá, te cǎchí-gá:

—Nchaa ñáiyu na quíndáá iní ñáhá xii-í, te ñá díú-ní mèe-í quíndáá iní-yu, chi tñàhá Tǎtà-í Yáá ní tendaha ñàha xii-í véxi-í ñuyíú-a quíndáá iní-yu. ⁴⁵ Te ñáiyu xini ñáhá xii yúhú xini-yu tñàhá Tǎtà-í. ⁴⁶ Te yúhú véxi-í dandixi túu-í iní ñáiyu ñuyíú-a cuendá cutnùní iní-yu nàcuáa nduu cuendá Yǎ Ndiǒxí, te nchaa ñáiyu na quíndáá iní ñáhá xii-í te vǎ cùndècu-gá-yu ichi cuèhé ichi duha. ⁴⁷ Te núu ío davá-yu ndèdóho-yu nàcuáa cǎháⁿ-í te ñá túú tñí-yu tñùhu-í, te ñá díú yùhú dàcuíta nihnu-í-yu, chi ñá túú véxi-í ñuyíú-a sá dácúíta nihnu-í-yu, chi véxi-í sá dácǎcu nihnu-í-yu. ⁴⁸ Te nchaa ñáiyu na cùyíchí iní ñáhá xii-í te ñá túú quide cuendá-yu nàcuáa cǎháⁿ-í, te ñáiyu-án ná sàà nduu te cuíta nihnú-yu chi ñá ní tñí-yu tñùhu ní cáháⁿ-í. ⁴⁹ Te yúhú ñá túú cǎháⁿ-í tñùhu véxi iní mèe-í, chi mee Tǎtà-í Yáá ní tendaha ñàha xii-í véxi-í ñuyíú-a ní cachí tñùhu-gá nàcuáa cunduu tñùhu cáháⁿ-í danèhé-í ñáiyu. ⁵⁰ Te yúhú xini-í sá tñùhu ní táuchíúⁿ Tǎtà-í cáháⁿ-í cúu-xí ìⁿ sá vǎha sá cúu xii-ndò chi nduu táhú-ndó cùndècu-ndo ndíhi-gá ni caa ni quíhíⁿ, núu xǎⁿ cǎháⁿ-í nchaa nàcuáa ní táuchíúⁿ-gǎ —cǎchí-gá xáhaⁿ-gǎ xii-yu.

13

Jèsús náquète-gá sáhá cuè téé xìca cuu ndìhi-gá

¹ Te cùmání-gă tnahá vico pàscuá, te Jèsús sa nàha-gá sá sà ní cuyatni òrè dándóo-gá ñuyíú-a, te ndaa-gá núú ndécú Tătá-gă. Te ío ní cuu iní-gá nchaa ñáyiú ní sándáá iní ñáhá xii-gá, te ní quide ndisa-gá sá ñí cuu iní ñáhá-gă xií-yu.

²⁻⁴ Te ní quíhu yucu ñăvâha díquí tĕ Jùdás déhe té Xímú Iscàrioté, te ní sani iní-dé nàcuáa cada-dé cuáha cuendá-dé Jèsús núú cuè téé cùu úhú iní ñáhá xii-gá. Te Jèsús sa nàha-gá sá mée Yă Ndiöxí Yaá cúú Tătá-gă ní sáñaha-gă tnúhu ndee ìní xii-gá sá cádá-gă núú-gă, te nàha-gá sá díú núú Tătá-gă ní quee-gá véxi-gá ñuyíú-a. Te sáá nduu nàsáá tucu-gá núú Tătá-gă. Te cùdini Jèsús ndìhi cuè téé xìca cuu ndìhi-gá ní cùu, te ní ndacuíñí-gá yuhu mèsá, te ní taunuu-gá ìⁿ dóó níhnú-gă, te ní queheⁿ-gá ìⁿ dóó ñí dácútú-gă núú yíquí-gă. ⁵ Te ní chihi-gá ndute ìⁿ tìná, te xíaⁿ ñí naquete-gá sáhá cuè téé xìca cuu ndìhi-gá, te ndìhi dóó ndútú núú yíquí-gă-áⁿ ñí nadayìchí-gá sáhá-güedĕ.

⁶ Te òrè naquete-gá sáhá tĕ Xímú, àdi Pelú, ní cùu ní xáhaⁿ-dĕ xii-gá:

—Mèstrú, ¿te yòhó naquete-n sáhà-í-u? —càchí-dé xáhaⁿ-dĕ xii-gá.

⁷ Te ní xáhaⁿ Jèsús:

—Vitna ñá cútñuní iní-n să quídè-í-a dico sáá nduu te cutñuní iní-n —càchí-gá xáhaⁿ-gă xii-dé.

⁸ Te ní xáhaⁿ tĕ Pèlú:

—Yúhú chi vá ìⁿ ndùu te naquete-n sáhà-í —càchí-dé xáhaⁿ-dĕ xii-gá.

Te ní xáhaⁿ Jèsús:

—Te núu vá náquète-í sáhá-n áⁿ, te vá cáda-gă-n cuendá sá ndécú ndìhi ñaha-í xii-n —càchí-gá xáhaⁿ-gă xii-dé.

⁹ Te ní xáhaⁿ tĕ Pèlú:

—Te núu ducaⁿ te vá méé-ní sǎhà-í naquete-n, chi naquete-n tnàhá ndaha-í ndìhi díquì-í —càchí-dé xáhaⁿ-dĕ xii-gá.

¹⁰ Te ní xáhaⁿ Jèsús xii-dé:

—Tée íchí nĭ xichi chi xini ñuhu-xi sá sáhá-na-dĕ ndoo, te ducaⁿ te nduu ndoo-dé ñihí-dé. Te nchòhó sa càndoo-ndo cuéi ñá ncháá-ndó càndoo —cachí-gá xáhaⁿ-gă xii-dé.

¹¹ Te ducaⁿ nĭ cáháⁿ Jèsús chi sa naha-gá sá ííⁿ cuè tée-áⁿ cuăha cuendá ñáhá-güedĕ xii-gá núu cuè tée cùu úhú iní ñáhá, xíáⁿ nŭu ní xáhaⁿ-gă sá ñá túu càndoo-güedĕ nchaa-güedĕ.

¹² Te sátá nĭ naquete-gá sáhá-güedĕ, te ní ndécúñnu-gá dóó-gă, te ní nucóo-gá yuhu mèsá, te ní xáhaⁿ-gă xii-güedĕ:

—¿Te ní cutnùní iní-ndó sǎ nĭ quide ñaha-í xii-ndo-ăⁿ?

¹³ Te nchòhó váha-ni càháⁿ-ndó sǎ cúnùu-í, te dànani ñaha tucu-ndo Mestrú xii-í, te ndáá càháⁿ-ndó. ¹⁴ Te núu yúhú cùu-í Mèstrú, te cùu tucu-í tée cùnnuu te nàquete-í sáhá-ndó, te diu-ni ducaⁿ càda nchohó tucu naquete sáhá tnáhá-ndó. ¹⁵ Yúhú sànu ichi ñaha-í xii-ndo nàcuáa cada-ndo. ¹⁶ Te na càchí tnúhu ndáá-í xii-ndo sǎ nĭ ííⁿ tée xinu cuechi ñá túu cùnnuu-dé dàcúúxí pàtróóⁿ-dĕ, te ni ííⁿ tée xica chiuⁿ ñá túu cùnnuu-dé dàcúúxí tĕe tëndaha ñaha xii-dé cuáháⁿ-dĕ chiùⁿ. Te ducaⁿ sǎtnahá-xi cùu yúhú ndìhi nchòhó. ¹⁷ Te núu ní cutnùní iní-ndó nàcuáa ní quide ñaha-í xii-ndo ña, te ducaⁿ càda tnaha-ndo te cuu váha iní ñáhá Yă Ndiöxí xii-ndo.

¹⁸ 'Yúhú, ñá túu càháⁿ-í cuendá-ndó nchàa-ndo, chi yúhú sa naha-í nàcuáa sàni iní ííⁿ ííⁿ nchòhó cue tée ní nanducu ñhnu-í tnuú nchaa ñáyiù ñùhu ichi cuehé ichi

duha ní cachí-í chitnahá ñáhá-ndó xii-í. Chi dacuítí sǎ queé ndǎá-xi nǎcuáa cǎháⁿ-xi núú tǔtú Yǎ Ndiǒxí núú cǎchí-xi: “Tée xèxi ndihi ñaha xii-í ngóo-dé cuu úhú iní ñáhá-dě”, duha cǎchí-xi núú tǔtú-gá. ¹⁹ Te cùmání-gǎ sǎá nduu cǎda ñaha-dé sǎ sání iní-dé, núú xǎⁿ cǎchí tnúhu-í xii-ndo nǎcuáa cada-dé, chi na sǎá nduu-ǎⁿ te cutnùní iní-ndó sǎ yǔhú cúu-í Crístú Yaá ní tendaha Yǎ Ndiǒxí véxi ñuyú-a. ²⁰ Te na cǎchí tnúhu ndǎá-í xii-ndo sǎ nchàa ñáyiu na quèheⁿ cuendá ñáhá xii cue tée tendaha-í cǎháⁿ tnúhu-í, te cada iní-yu sǎ tnàhá yúhú ní queheⁿ cuendá-yu. Te nchaa ñáyiu na quèheⁿ cuendá ñáhá xii-í, te cada iní-yu sǎ tnàhá Tǎtà-í Dútú Ndiǒxí Yaá ní tendaha ñaha xii-í véxi-í ñuyú-a ní queheⁿ cuendá-yu —cǎchí-gá xáhaⁿ-gǎ xii-güedé.

Jèsús cǎchí-gá sǎ tǎ Jùdás cuáha cuendá ñáhá-dě xii-gá núú cuè tée cúu úhú iní ñáhá

(Mt. 26:20-25; Mr. 14:17-21; Lc. 22:21-23)

²¹ Te sǎtá dúcáⁿ nǎ cǎháⁿ Jèsús te ío ní ndíhú iní-gá, te ní xáhaⁿ-gǎ xii-güedé:

—Na cǎchí tnúhu ndǎá-í xii-ndo sǎ díú-ní ñⁿ nchohó cuáha cuendá ñáhá-ndó xii-í núú cuè tée cúu úhú iní ñáhá —cǎchí-gá xáhaⁿ-gǎ xii-güedé.

²² Te ní ngúíta cue tée xica cuu ndihi-gá ndéhe ñⁿ ndehe ñⁿ núú tnáhá-güedě, chi ñá ní cùtnuní iní-güedé ndédacàa-güedé cuendá-güedé ní cǎháⁿ-gá. ²³ Te ñⁿ tée-ǎⁿ ÿo cùdíí iní ñáhá Jèsús, te ndècu yatni-dé dǎñi-gá cúdini-dé ndihi-gá. ²⁴ Te té Xímú, àdi Pelú chi úú diu-dé, ní quide-dé sèñá núú tǎe ndècu yatni dǎñi-gá-ǎⁿ sǎ cǎcáⁿ tnúhú-dě núú-gǎ nǔu ndédacàa-güedé cuendá-güedé ní cǎháⁿ-gá. ²⁵ Te tée-ǎⁿ ní sáháⁿ ndehe yatni-gá-dé dǎñi Jesús, te ní xáhaⁿ-dě xii-gá:

—Mèstrú, ¿ndědacàa-ndí cuendá-ndí ní cáháⁿ-n-i? —
càchí-dé xáhaⁿ-dě xii-gá.

²⁶ Te ní xáhaⁿ Jèsús:

—Na chindóyo-í luha pàá, te tée na cuáha-í te tée-án
cúú-dě —càchí-gá xáhaⁿ-gă xii-dé.

Te ní chindóyo-gá luha pàá, te ní sáha-gá té Jùdás
déhe té Xímú Iscarioté. ²⁷ Te òré ní queheⁿ-dé pàá, te ní
ngúndecu ndíhi ñaha dùuⁿ-ná yucu ñăvâha xii-dé. Te ní
xáhaⁿ Jèsús:

—Sá ñí sani iní-n càda-n te cada ndíhi-ni-n —càchí-gá
xáhaⁿ-gă xii-dé.

²⁸ Te ni ñíⁿ cue tée cùdini ndíhi-gá ñá ní tècú
tnùní-güedé nása ndùu tnúhu ní xáhaⁿ-gă xii té Jùdás.

²⁹ Te dava-güedé ní sani iní-güedé sá să cuendá sá
ndécú ndíhi-dé sá ñúhú dǐhúⁿ, te vâa òó ñíⁿ sá cuááⁿ-dě
nândíhi-güedé vico, àdi díhúⁿ cuáha-dé ñáyiú ndàhú
xáhaⁿ-gă ní cáháⁿ-güedě. ³⁰ Te sa ní cundiquíⁿ ní queheⁿ
cuendá té Jùdás pàá caxi-dé, te òré ní níhí-dě pàá-án te ní
quee-dé cuáháⁿ-dé.

Jèsús càchí tnúhu-gá nàcuáa cada-o

³¹ Te sátá ñí quee té Jùdás cuáháⁿ-dé, te ní xáhaⁿ Jèsús
xii dava-gá-güedé:

—Vitna te quiní-ndó ndíhi nchaa ñáyiú sá òo càhnu
cuu yúhú Téee cùu ñaní tnáhá-ndó nchâa-ndo, te òré-án
cutnùní iní-ndó să òo càhnu cuu tucu mee Yá Ndiòxí.
³² Te núu yúhú quidé càhnu-í Yă Ndiòxí, te diu-ni ducaⁿ
càda cahnu ñaha-gá xii yúhú, te ñá túú-gă titní nduu te
ducaⁿ càda-gá. ³³ Te nchòhó cue déhe-í na càchí tnúhu-í
sá sàcú duha-ná nduu ndècu ndíhi ñaha-í xii-ndo. Te
nchòhó nanducu ñaha-ndo xii-í dico vá ná ñihí ñáhá-ndó
dàtná ní xáhaⁿ-í xii ñáyiú isrâél, te diu-ni ducaⁿ càháⁿ-í
núú-ndó să vă ndácú-ndó quíhíⁿ-ndó núú quíhíⁿ-í. ³⁴ Te

duha sànu ichi ñaha tucu-í xii-ndo nàcuáa cada-ndo sã cúu ìní tnáhá-ndó ìíⁿ ìíⁿ-ndo datná yúhú cúu ìní ñáhà-í xii-ndo. ³⁵ Te núu na cùu ìní tnáhá-ndó ìíⁿ ìíⁿ-ndo ña, te ducaⁿ te cutnùní ìní nchaa ñáyiú sá cúú-ndó cuè téé ní chitnahá ñáhá xii-í —càchí-gá xáhaⁿ-gã xii-güedé.

Jèsús càháⁿ-gá sá tẽ Pèlú vá nũnuu-dé sá xícá cùu ndihi ñaha-dé xii-gá

(Mt. 26:31-35; Mr. 14:27-31; Lc. 22:31-34)

³⁶ Te ní xáhaⁿ tẽ Xĩmú, àdi Pelú chi úú dũu-dé, xii Jèsús:
—Mèstrú, ¿ndèé quĩhíⁿ-n-í? —càchí-dé xáhaⁿ-dẽ xii-gá.
Te ní xáhaⁿ Jèsús:

—Vitna te vá ndácú-n cànchicúⁿ ñáhá-n quĩhíⁿ núu quĩhíⁿ-í, dico na sàá nduu te dai sáá-n nũú cùndècu-í —càchí-gá xáhaⁿ-gã xii-dé.

³⁷ Te ní xáhaⁿ tẽ Pèlú xii-gá:

—Mèstrú, ¿te ná cuendá nũu vá ndácù-í canchicúⁿ ñáhà-í xii-n quĩhíⁿ vitna-í? Chi yúhú ñá túú tnáhí yùhú-í cuèi na cùú-í sá cuendá-n —càchí-dé xáhaⁿ-dẽ xii-gá.

³⁸ Te ní xáhaⁿ Jèsús:

—¿Te ndáá sá xèhndé ìní-n sã cuèi na cùú-n cuendá-í-u? Te na càchí tnúhu ndáá-í xii-n sã cùmání-gã cana líhi, te úní xito cáháⁿ-n sã ñà túú xìní ñáhá-n xii-í —càchí-gá xáhaⁿ-gã xii-dé.

14

Jèsús dánèhé ñáhá-gã nàcuáa cada-o nàsáá-ó nũú ndécú Yã Ndiõxí

¹ Te ní xáhaⁿ-gã xii-güedé:

—Te ñá túú nã cani ìní-ndó. Quĩndáá ìní-ndó Yã Ndiõxí, te quĩndáá ìní-ndó yùhú. ² Chi núu ndécú Tãtà-í ío nùne núu cùndècu-o, chi núu ñáhá ñá te sa càchí tnúhu-í xii-ndo ni cùu. Te vitna na nùhú-í te cada túha-í núu

cúndècu-ndo. ³ Te dàtnùnì quixi tucu-í te candeca ñaha-í xii-ndo quíhíⁿ cuèndá ìⁿ-ni xìchi cundecu-o. ⁴ Te sa nàha-ndo ndéé quíhíⁿ-í te sa xìnì-ndó ìchi —cachí-gá xáhaⁿ-gă xii-güedé.

⁵ Te ní xáhaⁿ tĕ Măxí xii-gá:

—Mèstrú, ñá túú xìnì-ndí ndèè quíhíⁿ-n te da ichi-ná quínì-ndí —càchí-dé xáhaⁿ-dĕ xii-gá.

⁶ Te ní xáhaⁿ Jèsús:

—Yúhú cúù-í dàtná ìⁿ ichi te càháⁿ-í tnúhu ndáá, te yúhú cada-í te naníhí tàhú-ndó. Te ìⁿ dìi díi-ni yúhú cađa-í te sáá-ndó nŭú Yă Ndiöxí cundecu-ndo te núu na quíndáá iní-ndó ñáhá-ndó xii-í. ⁷ Te núu dícó cútnùnì ndisa iní-ndó yòo cuu-í-áⁿ, ducaⁿ te cutnùnì iní-ndó yòo cuu Tătà-í ní cùu. Dico vitna dàtná sá nĭ xìnì núú-ndó Dŭtú Ndiöxí Yaá cúú Tătà-í cada iní-ndó, chi ní xìnì-ndó yúhú —càchí-gá xáhaⁿ-gă xii-dé.

⁸ Te ní xáhaⁿ tĕ Lìpé xii-gá:

—Mèstrú, danèhé ñáhá xii-ndí Dŭtú Ndiöxí chi na cùu váha iní-ndí —càchí-dé xáhaⁿ-dĕ xii-gá.

⁹ Te ní xáhaⁿ Jèsús xii-dé:

—Lìpé, ¿te náa ñá túú xìnì ñáhá-n xii-í? Te sa ní cuu vài nduu ndecu ndìhì ñaha-í xii-ndo, chi ñáyiu xìnì ñáhá xii-í te xìnì-yu tnàhà Tătà-í. ¿Te ná cuèndá yòhó càchí-n să dánèhé ñáhá-í xii-ndo Tătà-í? ¹⁰ ¿Náa ñá túú sàndáá iní-ndó să yúhú ndécù-í ndìhì Tătà-í? Te mee-gă ndécú ndìhì ñaha-gá xii-í. Te nchaa tnúhu càháⁿ-í núú-ndó ñà túú càháⁿ-í sá vĕxi iní mèè-í, chi Tătà-í Yaá ndécú ndìhì ñaha xii-í chíndèe ñaha-gá quídè-í chiùⁿ-gá. ¹¹ Te quíndáá iní-ndó să yúhú ndécù-í ndìhì Tătà-í, te ducaⁿ mèè-gá ndécú ndìhì ñaha-gá xii-í. Te núu ñá túú sàndáá iní-ndó tnúhu càháⁿ-í-a, te dandàcu iní-ndó nchàa chiùⁿ ta quide-í véxi, te quíndáá iní ñáhá-ndó. ¹² Te na càchí

tnúhu ndáá-í xii-ndo sã nchàa ñáyiú na quìndáá iní ñáhá xii-í, te cadá-yu chiùⁿ quide-í te càhnu-gá chiùⁿ cadá-yu chi yúhú núhú-í núú ndécú Tătà-í cundecu-í nàcuáa níhí ndéé-gã-yu cundecu-yu. ¹³ Te nchaa sá ná càcáⁿ-ndó te taxi-í te núu na quìndáá iní ñáhá-ndó xii-í, te nchaa cada-í cuèndá cutnùní iní ñáyiú sá ïo càhnu cuu Tătà-í Dútú Ndiöxí. ¹⁴ Te yúhú cada-í nchaa sá cuìní-ndó càcáⁿ táhú-ndó nüù-í, te núu na quìndáá iní ñáhá ndìsa-ndo xii-í.

Jèsús càchí-gá sá téndàha-gá Espíritú Yă Ndiöxí quixi cundecu ndìhi-o

¹⁵ Te núu nchòhó cúú iní ñáhá-ndó xii-í te tñii-ndo nchàa tnúhu càháⁿ-í. ¹⁶ Te yúhú cacáⁿ táhù-í núú Tătà-í sá téndàha-gá Espíritú-gá quixi cundecu ndìhi-ndo cànu ichi ñaha-xi xii-ndo nacuéa cundecu-ndo, te chindee ñaha-xi xii-ndo ni caa ni quíhíⁿ. ¹⁷ Te nchaa ñáyiú ndècu ichi cuehé ichi duha ñá túú xìní-yu Espíritú Yă Ndiöxí te ni vă cúú cùndecu ndìhí-yu. Dico nchòhó sa xìní-ndó Espíritú-gá te ndècu ndìhí ñaha-xi xii-ndo. Te sáá ìⁿ nduu te cunuu Espíritú-gá iní-ndó. ¹⁸ Te yúhú vá dáñá nihnu ñaha-í xii-ndo, chi quixi tucu-í cundecu ndìhí ñaha-í xii-ndo. ¹⁹ Te sácú duha-ná nduu ndècu-í te vá quìní ñáhá-gã ñáyiú xii-í, dico nchòhó chi quìní ñáhá-ní-ndó xii-í. Te ducaⁿ-ni cùndecu-ndo ichi váha chi cundecu ndìhí ñaha-í xii-ndo ni caa ni quíhíⁿ. ²⁰ Te dàvá-áⁿ cutnùní iní-ndó sã ndécù-í ndìhí Tătà-í, te ducaⁿ nchòhó cundecu ndìhí ñaha-ni-ndo xii-í. ²¹ Te nchaa ñáyiú dàcuaha tnúhu-í te tñii-yu, ñáyiú-án quidé ndìsá-yu sá cúú iní ñáhã-yu xii-í. Te ducaⁿ Tătà-í cúú iní ñáhá-gã xii-yu, te ducaⁿ-ni yúhú cúú iní-í-yu tucu, te ducaⁿ te cùtnuní iní-yu sá ndécú ndìhí-í-yu —càchí-gá xáhaⁿ-gã xii-dé.

²² Te ní cáháⁿ ìⁿ tée nàni Judás dico ñá díú tẽ Jùdás déhe té Xímú Iscàrioté ní cáháⁿ, chi ingá té Jùdás ní xáhaⁿ-dẽ xii-gá:

—Mèstrú, ¿nása cada-n cuendá cutnùnì iní-ndí sá cùndècu ndihì ñaha-n xii-ndí, te ñáyiù ñùhu ichi cuehé ichi duha vá cùndècu ndihí-n-yu-i? —càchí-dé xáhaⁿ-dẽ xii-gá.

²³ Te ní xáhaⁿ Jèsús xii-güedé:

—Nchaa ñáyiù cùu iní ñáhá xii-í te tñí-yu tñúhu càháⁿ-í, te ñáyiù-án cùú iní ñáhá Tătà-í xii-yu, te yúhú ndihì Tătà-í ndécú-ndí ndihí-yu. ²⁴ Te nchaa ñáyiù ñá túú cùu iní ñáhá xii-í te ñá túú tñí-yu tñúhu càháⁿ-í. Te nchaa tñúhu ní cáháⁿ-í ní xíndèdóho-ndo chi Tătà-í Yaá ní tendaha ñaha xii-í véxi-í ñuyú-a ní dácáhu iní ñáhá-gá xii-í, te ñá díú mèe-í ní càhu iní-í tñúhu cáháⁿ-í.

²⁵ Duha ndùu tñúhu càháⁿ-í núú-ndó vitna ndecu ndihì ñaha-gá-í xii-ndo. ²⁶ Dico Yá Ndiõxí tendaha-gá Espiritú-gá quixi-xi cada-xi núú-í taxi-xi tñúhu ndee iní xii-ndo, te ñu-xi chindee ñaha-xi xii-ndo te danèhé ñáhá-xí xii-ndo nchaa sá cùmání quini-ndó, te ñu-ni-xi dandàcu iní ñáhá-xí xii-ndo nchaa nacuaa ní cáháⁿ-í.

²⁷ Te yúhú chindee chítuu ñaha-í xii-ndo ño váha cuu iní-ndó cùndecu-ndo datná yúhú ío váha cùu iní-í ndécú-í, chi sa ta cùyatni nduu núhú-í. Te yúhú càchí tñúhu ndáá-í sá chíndèe ñaha-í xii-ndo, te vá cadà-í datná quídé ñáyiù ñùhu ichi cuehé ichi duha. Te ni vã ndihú iní-ndó, te ni vã yùhú-ndó. ²⁸ Te sa ní xíndèdóho-ndo ní cáháⁿ-í sá nùhú-í, te quixi tucu-í cundecu ndihì ñaha-í xii-ndo. Te núu ndisa cùu iní ñáhá-ndó xii-í ñá, te òré ní níhí-ndó tñùhu sá nùhú-í núú ndécú Tătà-í, te cudíí iní-ndó ní cùu, chí ío càhnu cuu-gá dàcúxí yùhú. ²⁹ Te sa ní cachí tñúhu-í sá nùhú-í, te na sàá òré núhú-í núú ndécú Tătà-í, te quíndáá iní ñáhá-ndó xii-í.

³⁰ 'Te ñá túú-gă vâi tnúhu ndatnúhu ndihî ñaha-ÿ xii-ndo chi sa véxi yucu ñăvâha sá táxi tnùnî ñuyúú-a, dico vá táxi tnùnî ñáhá-xî xîi yúhú. ³¹ Te cada-í nchaa nàcuáa ní táúchíúⁿ Tătà-í cuendá cutnùnî iní nchaa ñáyiu ñuyúú-a sá yúhú ío cùu iní-í-gá. Te vitna chí ndácuñî ná quihîⁿ-ó —càchí-gá xáhaⁿ-gă xii-güedé.

15

Cuendá yoho yàha stilé ndihî nchaa dité-xi

¹ Te ní xáhaⁿ tùcu-gá xii-güedé:

—Yúhú cúu-í dàtná yoho yàha stilé, te Tătà-í cúu-gă dàtná ìⁿ téé xîto yoho yaha stilé-áⁿ. ² Te nchaa ñáyiu ní sándáá iní ñáhá xîi-í cúu-yu dàtná dité nchaa yoho yàha stilé-áⁿ. Te téé xîto yoho yaha stilé-áⁿ xèhndé-dé nchaa dité-xi sá ñă cuiní-gá-xi cuuⁿ ndéhé-xi, te ndàda ndoo-dé nchaa dité-xi sá cúuⁿ cuendá cuuⁿ-gá. ³ Te ducaⁿ sãtnahá-xi cùu nchohó, chi sa ní xócuñî nchaa sá cuèhé sá dúhá ndècu ndihî-ndo, chi ní sándáá iní-ndó tnúhu ní cáháⁿ-í. ⁴ Te cuu ìⁿnuu-ndo cùndecu ndihî ñaha-ndo xii-í, te núu ducaⁿ na càda-ndo, te cùndecu ndihî ñaha-ÿ xii-ndo. Chi núu ìⁿ yutnu vîdí ná quèndèé dité-xi, te dité-xi sá ñî quèndéé-áⁿ vâ cúuⁿ-gă sávîdí-xi chi duuⁿ duuⁿ ní xíta-xi. Ducaⁿ sãtnahá-xi cùu nchohó chi vá ndácú-ndó càda-ndo chiuⁿ-í, te núu vá cùndècu ndihî ñaha-í xii-ndo.

⁵ 'Chi yúhú cúu-í dàtná yutnu vîdí-áⁿ, te nchòhó cúu-ndó dàtná nchaa dité-xi. Te nchaa ñáyiu cùu ìⁿnuu ndihî ñaha xii-í, te ndècu ndihî-í-yu, te ndácú-yu quidé-yu chiuⁿ-í. Te núu vá cúu ìⁿnuu ndihî ñahá-yu xii-í, te vá ndácü-yu cadá-yu chiuⁿ-í. ⁶ Te nchaa ñáyiu vá cúu ìⁿnuu ndihî ñaha xii-í, te yàha-yu dàtná yàha ìⁿ dité yutnu vîdí sá ñă túú cùuⁿ sávîdí-xi, chi xèhndé-güedé yìchí-xi, te sàhmi-güedé.

7 'Cuu ìⁿnuu ndìhi ñaha-ndo xii-í, te vá nàcuànaa-ndo nacuáa ní cáháⁿ-í. Te núu ducaⁿ na càda-ndo, te nání cuíní-ndó cǎcǎⁿ-ndó nǔù-í te taxi-í. 8 Te núu nchòhó ná cádá vǎha-ndo cùndecu-ndo, te ío cada càhnu-ndo Tǎtà-í, te ducaⁿ cùtnuní sǎ ndísá cùu-ndo cue téé ní chitnahá ñáhá xii-í. 9 Te yúhú ío cùu iní ñáhà-í xii-ndo dàtná cúú iní ñáhá Yǎ Ndiǒxí xii-í. Te cada-ni-ndo mèe-ni sǎ vǎha cuendá cudíí iní ñáhá-gǎ-í xii-ndo. 10 Te núu na quìndáá iní-ndó càda-ndo nchaa nacuáa ní cáháⁿ-í, te ío cuu iní ñáhà-í xii-ndo, chi yúhú ducaⁿ ÿo sàndáá iní-í Tǎtà-í quídè-í nchaa nàcuáa ní cáháⁿ-gǎ, te xǎⁿ nǔù ío cùu iní ñáhá-gǎ xii-í.

11 'Duha càháⁿ-í núú-ndó cuendá cudíí ndisa iní-ndó dàtná cúdíí iní mée-í. 12 Te duha ndùu tnúhu càháⁿ-í cuendá sǎ cúú iní tnáhá-ndó ìⁿ ìⁿ-ndo datná cúú iní ñáhà-í xii-ndo. 13 Te núu ní xíhó sǎ cúú-xí ìⁿ téé ío váha tnàhá tnúhu ndìhi-o, te xǎⁿ cutnùní iní ñáyiu sǎ ÿo cùu iní-ó-dě. 14 Te nchòhó cuu-ndo cuè téé ío váha tnàhá tnúhu ndìhi-í te núu na càda-ndo nchaa nacuáa càháⁿ-í. 15 Te vá cǔñaha-gǎ-í xii-ndo sǎ cúú-ndó cuè téé xìnu cuechi núù-í, chi ni ìⁿ téé xìnu cuechi ñá túú xìní-dé ná quídé pàtróóⁿ-dě. Te yúhú cǎchí-í xii-ndo sǎ cúú-ndó cuè téé ío váha tnàhá tnúhu ndìhi-í, chi ní cachí tnúhu-í nchaa nàcuáa ní cáháⁿ Tǎtà-í. 16 Te ñá díú nchòhó ní càháⁿ ñáhá-ndó xii yúhú, chi yúhú ní cáháⁿ ñáhà-í xii-ndo. Te yúhú tauchìuⁿ-í quíhíⁿ-ndó càda-ndo nchaa nacuáa ní cáháⁿ-í, chi tnúhu-áⁿ vǎ ndíhí ñìhnu-xi. Te ducaⁿ nchaa sǎ ná cǎcǎⁿ-ndó nǔú Tǎtà-í Yǎ Ndiǒxí te taxi-gǎ, te núu na quìndáá iní ñáhá-ndó xii-í. 17 Te yúhú càháⁿ-í dóho-ndo sǎ cúú iní tnáhá-ndó ìⁿ ìⁿ-ndo.

Ñáyiu ndècu ichi cuehé ichi duha cùu úhú iní-yu Jèsús ndìhi nchaa ñáyiu sàndáá iní tnúhu-gǎ

18 'Te nchaa ñáyiú ndècu ichi cuehé ichi duha ñá cúú quíní ñáhă-yu xii-ndo, te sa nàha-ndo sá dîhna-gá yúhú ní nguíta-yu ducaⁿ ñà cúú quíní ñáhă-yu xii-í. 19 Te núu dicó tnàhá nchòhó ndécú-ndó ìchi cuehé ichi duha ña, te cuu iní ñáhă-yu xii-ndo dàtná cúú iní tnàhá-yu ndi mèe-yu ni cùu. Te yúhú ní nanducu nîhnu ñaha-í xii-ndo tnúú ñáyiú ndècu ichi cuehé ichi duha, núu xîáⁿ ío cùu úhú iní ñáhă-yu xii-ndo cuendá sá ñà túú-gă chítnàhá-ndõ-yu. 20 Te dandacu iní-ndó nàcuáa ní cáháⁿ-í sá nî ìⁿ tée xînu cuechi ñá túú cùnuu-dé dàcúúxí pàtróóⁿ-dě. Te yúhú cúú úhú iní ñáhă-yu, te ñiú-ni ducaⁿ càda ñahá-yu xii nchòhó. Te núu dicó ní tnî^ñ-yu tnúhu ní cáháⁿ-í ñá, te ñiú-ni ducaⁿ tnî^ñ-yu tnúhu cáháⁿ-ndó nŭŭ-yu ni cùu. 21 Te ducaⁿ càda ñahá-yu xii-ndo sã cuendá-í, chi ñá xîní-yu Tătà-í Yaá ní tendaha ñàha xii-í véxi-í ñuyúú-a.

22 'Te vaa vá cùndècu cuéchi-yu ni cùu, te núu ñá túú yúhú ní cãháⁿ-í nŭŭ-yu, te vitna vá cúú tnàhí cachí-yu sá ñà túú cuéchi-yu. 23 Chi nchaa ñáyiú cùu úhú iní ñáhá xii-í, te cùu úhú iní-yu tnàhá Tătà-í. 24 Te vaa ni ìⁿ cuéchi-yu vá cùndècu ni cuu, te núu dicó ñá túú ní xîní-yu nchaa sá nî quide-í sá vã yõo tnàhí ndàcu cada. Te cuèi ní xîní-yu dico dai cùu úhú iní ñáhă-yu xii-í ndîhi Tătà-í. 25 Te duha quidè-yu chi dacuítí quèe ndáá-xi nàcuáa yòdo tnuní núu tûtú Yă Ndiõxí sá dácuahá-yu, chi càchí-xi sá ñà túú nă cuéchi-í te cuu úhú iní ñáhă-yu xii-í.

26 'Te Espiritú Tătà-í Dútú Ndiõxí sá ndécú nŭú-gă tendaha-í quixi chindee ñàha-xi xii-ndo, te canu ichi ñaha-xi nàcuáa cundecu-ndo, te Espiritú-án cãháⁿ ndáá-xi cuendá cutnùní iní nchaa ñáyiú yoo cùu-í. 27 Te nchòhó tnàhá-ndó cãháⁿ váha-ndo cuendá-í cuendá cutnùní iní-yu yoo cùu-í, chi nàha-ndo sá ndèé òré ní nguíta-í quidè-í chîuⁿ Tátà-í ní chitnahá ñáhá-ndó xii-í —càchí-gá xáhaⁿ-gă xii-güedé.

16

¹ Te ní xáhaⁿ tùcu-gá xii-güedé:

—Duha càháⁿ-í cuendá ná nanchòcáva iní-ndó nùhú-ndó ìchi cuehé ichi duha. ² Chi vá dáñá-gă-güedé quíhu-ndo vèñúhu, te ni vǎ cúú-gă quini ndeé ñáhá-güedě xii-ndo. Te sáá ìⁿ nduu te cahni ñaha-güedě xii-ndo, te xǎⁿ cuu cahaⁿ-güedě sá quidé-güedě chiuⁿ Yá Ndiöxí. ³ Te ducaⁿ càda-güedé chi ñá túú xini-güedé Tătà-í, te ni ñà túú xini ñáhá-güedě xii yúhú. ⁴ Te duha ndùu tnúhu càháⁿ-í núú-ndó, chi na sàà òré te ndacu iní-ndó nchàa tnúhu sá sà ní cachí tnúhu-í xii-ndo nàcuáa cada ñaha-güedě xii-í.

Nchaa chiuⁿ quide Espiritú Yă Ndiöxí

⁵ Te ñá túú ní càchí tnúhu-í xii-ndo nděé díhna chi ndècu ndihí ñaha-í xii-ndo. ⁵ Dico vitna sa ta cùyatni nduu núhú-í núú ndécú Tătà-í Yaá ní tendaha ñàha xii-í véxi-í ñuyúú-a. Te ni ìⁿ nchohó ñá túú xicáⁿ tnúhú-ndó nùú-í nùu ndeé quíhíⁿ-í. ⁶ Chi mee-ni sǎ ndìhú iní-ndó sǎ dúcáⁿ nǐ cáháⁿ-í. ⁷ Te na càchí tnúhu ndáá-í xii-ndo sǎ vǎha-gá sá cúú-xí-ndó nùu núhú-í, chi tendaha-í Espiritú Yă Ndiöxí quixi cundecu ndihí-ndo chindee ñaha-xi, chi núu vá nùhú-í te vá quíxí Espiritú-gá cundecu ndihí-ndo chindee ñaha-xi xii-ndo. ⁸ Te na quixi Espiritú-gá te dandixi túu-xi iní nchaa ñáyiu ndècu ichi cuehé ichi duha sá ñà túú quide váha-yu. Te dacàhu iní ñáhá-xí sǎ ndécú ìⁿ ichi váha ichi ndáá. Te Espiritú-gá-áⁿ cada-xi nàcuáa cutnùní iní-yu sá Yă Ndiöxí cada ndáá-gá cuéchi-yu. ⁹ Te ducaⁿ te cutnùní iní-yu sá ndécú cuéchi-yu, chi ñá túú sàndáá iní ñáhă-yu xii-í. ¹⁰ Te ducaⁿ te cutnùní iní-yu nàcuáa ndùu cuendá ichi váha ichi ndáá, chi yúhú núhú-í núú ndécú Tătà-í, te nchòhó vá quini ñáhá-gă-ndó. ¹¹ Te ducaⁿ te cutnùní iní-yu sá Yă Ndiöxí cada ndáá-gá cuéchi-yu, chi sa

ní cáháⁿ-gá sá yúcu ñávãha sá táxí tnùní ñuyúú-a quíhíⁿ-xi núú ùhú núú ndàhú.

¹² Te vài-gá tnúhu ndècu cachí tnúhu-í xii-ndo, dico nchòhó chi vá cùndèe iní-ndó cùndedóho-ndo nchàa vitna. ¹³ Te na quìxi Espiritú Yã Ndiöxí, Espiritú càháⁿ ndáá cuiti, te Espiritú-áⁿ danèhé ñáhá-xí nchàa tnúhu váha tnúhu ndáá. Te vá dácàhu iní ñáhá-xí xii-ndo sá vèxi iní méé-xí chi dacàhu iní ñáhá-xí nchàa sá càháⁿ Yã Ndiöxí, te cachí tnúhu-xi nchaa nàcuáa cada-xi ndéé núú cuáháⁿ núú vèxi-gá. ¹⁴ Te Espiritú-gá-áⁿ cada càhnu ñaha-xi xii yúhú chi ndècu ndìhi-xi tnúhu-í, te danèhé ñáhá-xí xii-ndo. ¹⁵ Te nchaa sá ndécú ndìhi Tátà-í ndécú ndìhi-í tnàhà-í, núú xíãⁿ càchí-í sá Espiritú-gá danèhé ñáhá-xí nchàa tnúhu-í xii-ndo.

Nchaa ñáyiu ndìhú iní-xi nduu díí iní-yu na quìxi tucu Jesús

¹⁶ Te ìⁿ úú-nã nduu ndècu-í te vá quìní ñáhá-gã-ndó xii-í, dico núú sàcú-ni nduu te quini ñáhá tùcu-ndo xii-í, te ducaⁿ chi núhú-í núú ndécú Tátà-í —càchí-gá xáhaⁿ-gã xii-güedé.

¹⁷ Te sá dúcáⁿ ñí cáháⁿ-gá ñuu ní ngúíta ìⁿ úú cue tée xica cuu ndìhi-gá xìtnàha-güedé:

—¿Nása ndùu-tu tnúhu càháⁿ-gá sá càchí-gá sá ìⁿ úú-nã nduu ndècu-gá te vá quini-gá-ó-gã, dico núú sàcú-ni nduu te quini tucu-o-gã-i?, chi núhú-gá núú ndécú Tátà-gã —càchí-güedé xìtnàha-güedé.

¹⁸ Te xìtnàha tucu-güedé:

—¿Nása cuáháⁿ-tu tnúhu-ãⁿ sá sàcú-ni nduu? Te ñá tècú tnùní-ó nása ndùu tnúhu càháⁿ-gá —càchí-güedé xìtnàha-güedé.

¹⁹ Te Jèsús ní cutnùní iní-gá sá cuini-güedé cácaⁿ tnúhú-güedé núú-gã nása ndùu tnúhu ní cáháⁿ-gá, núú ní xáhaⁿ-gã:

—Cuèndá sá nǐ cachí-í sá ìⁿ úú-nǎ nduu ndècu-í te vá quíní ñáhá-gǎ-ndó xii-í, dico núú sàcú-ni nduu te quíní ñáhá tùcu-ndo xii-í ní cachí-í, ¿xíⁿ ndúcú tñuhu núú tñáhá-ndó-ǎⁿ? —càchí-gá xáhaⁿ-gǎ xii-güedé.

²⁰ Te ní xáhaⁿ tùcu-gá:

—Te na càchí tñuhu ndáá-í xii-ndo sǎ nchòhó ndìhú víhí ìní-ndó te ndáhyú-ndó, dico nchaa ñáyiú ndècu ichi cuehé ichi duha chi da cudíí ìní-yu. Dico nchòhó ñáyiú ndáhyú chi sáá nduu te nduu díí ìní-ndó. ²¹ Chi dàtná cuíní-ndó cùu ìⁿ ñadìhí ñaha ní tnahá nduu cacu déhe-xi vài sani ìní-aⁿ sá quidé úhú ñáhá-xí. Dico na yǎha cacu déhe-aⁿ, te ñá túú-gǎ ndácú ìní-aⁿ sá nǐ quide úhú ñáhá-xí xii-aⁿ chi mee-nǎ sá cúdíí ìní-aⁿ déhe-aⁿ. ²² Ducaⁿ sǎtnahá-xi cùu nchohó vitna chi ndìhú ìní-ndó sǎ nùhú-í, dico quixi tucu-í quixi coto ñaha-í xii-ndo, te òré-áⁿ te cudíí ndìsa ìní-ndó, te vá yòo ìⁿ-gá dandìhú ìní ñáhá xii-ndo davá-áⁿ.

²³ Te dàvá-áⁿ ñà túú-gǎ ná nducu tñuhu-ndo nùú-í. Te na càchí tñuhu ndáá-í xii-ndo sǎ Tǎtà-í taxi-gá nchaa sá ná càcáⁿ-ndó nùú-gǎ nùu na quìndáá ìní ñáhá-ndó xii-í. ²⁴ Te ndéé vitna vátá dúcáⁿ-gǎ cada-ndo càcáⁿ-ndó. Dico càcáⁿ-ndó nùú-gǎ nùu ná cuíní-ndó te taxi-gá cuèndá cudíí ndìsa ìní-ndó —càchí-gá xáhaⁿ-gǎ xii-güedé.

Xítóhó Jesucristú ní cunuu tñuhu-gá núú yucu ñǎvǎha

²⁵ Te xáhaⁿ tùcu-gá xii-güedé:

—Mee-ni nǐ chidáhu ndodo-í tñuhu ní cáháⁿ-í núú-ndó, dico sáá nduu te vá chidǎhu-gá-í tñuhu cáháⁿ-í, chi cáháⁿ ndáá-na-í cuèndá Tǎtà-í. ²⁶ Te dàvá-áⁿ cǎcáⁿ-ndó nùú Tǎtà-í nùu ná cuíní-ndó te taxi-gá, te núu na quìndáá ìní ñáhá-ndó xii yúhú Déhe-gá. Te ñá túú-gǎ xíní ñùhu-xi sá yúhú càcáⁿ-í núú-gǎ cuèndá-ndó chi càcáⁿ méé-nǎ-ndó. ²⁷ Chi mee Tǎtà-í ío cùu ìní ñáhá-gǎ xii-ndo cuèndá cúú ìní ñáhá-ndó xii-í, te sàndáá ìní-ndó sǎ nùú-gǎ ní quee-í

véxi-í. ²⁸ Te yúhú ní quee-í núú Tătà-í véxi-í ñuyúú-a, te vitna dándóo-í ñuyúú-a te núhú-í núú ndécú-gă —càchí-gá xáhaⁿ-gă xii-güedé.

²⁹ Te ní xáhaⁿ cuè téé xìca cuu ndihi-gá:

—Vitna chi càháⁿ ndáá-nă-n, ñá túú-gă chídăhu-n tnũhu càhá-n. ³⁰ Te vitna ní xiní-ndí sá ïo váha cùtnuní iní-n nchàa nacuáa cùu, te cùtnuní iní-n nchàa nacuáa sàni iní nchaa ñáyiú. Te ñá túú xini ñuhu-xi nágá nducu tnũhu-yu núú-n chi nchaa sa ní dátũu-n nũ-yu. Te xiăⁿ nũu sàndáá iní-ndí sá nũú Yă Ndiõxí ní quee-n vëxi-n —càchí-güedé xáhaⁿ-güedé xii-gá.

³¹ Te ní xáhaⁿ Jèsús:

—¿Te vitna sàndáá iní-ndó-ăⁿ? ³² Vitna ní sáá nduu ñí sáá òré sá ncháá nchòhó cuténuu-ndo càa ïiⁿ caa úú cuu-ndo, te dándóo mee ñàha-ndo xii-í. Dico ñá díú mée dii-í quendóo chi ndècu ndihi-í Tătà-í. ³³ Duha càháⁿ-í cuendá cuu váha iní-ndó cùndecu-ndo, chi ñuyúú-a cuu úhú iní ñáhă-yu xii-ndo, dico ni vă yùhú-ndó chi yúhú sa ní dáquéeé tihù-í nchaa sá cuèhé sá dúhá ió ñuyúú-a —càchí-gá xáhaⁿ-gă xii-güedé.

17

Jèsús xìcáⁿ táhú-gă núú Tătá-gă Dútú Ndiõxí cuendá cue téé xìca cuu ndihi-gá

¹ Te sátá dúcáⁿ ñí càháⁿ Jèsús te ní ndacoto-gá andiú, te ní xáhaⁿ-gă xii Tătá-gă Dútú Ndiõxí:

—Táu, vitna ní sáá nduu càda cahnu ñaha-n xii-í cuendá ducaⁿ càda cahnu ñaha-í xii-n. ² Chi mee-n ñí cachí-n sá táxí tnùn-í nchaa ñáyiú ñuyúú-a, te dàcacu nihnu-í nchaa ñáyiú ní cachí-n nàníhí tàhú. ³ Te cundecu ndihi-õ-yu ni caa ni quíhíⁿ, chi sàndáá iní ñáhă-yu sá ííⁿ dìi díi-ni yòhó cúú-n Ndiõxí ndisa, te ducaⁿ xini ñáhă-yu xii yúhú Jesucrístú téé ní tendaha-n vëxi ñuyúú-a.

⁴ 'Te yúhú ní chiñuhu ñaha-ĩ xii-n ñuyú-a, te ní xínu chiuⁿ ní cachí-n càda-í. ⁵ Táu, vitna na nàsáá-í núú-n te cada càhnu ñaha-n xii-í dàtná ní xóo cada càhnu ñaha-n xii-í ndéé cútnàhá vátá ngäva-gá ñuyú.

⁶ 'Te nchaa ñáyiú ní nanducu ñhnu-n tnuú nchaa ñáyiú ndècu ichi cuehé ichi duha, ní taxi cuendá-n-yu, te ní xáhaⁿ-ĩ xií-yu yoo cùu-n. Te cuendá-n cùú-yu, te ní taxi cuendá-n-yu, te ní sándáá iní-yu tnuúhu-n. ⁷ Te vitna ní cutnùní iní-yu sá ncháá tnúhu ndècu ndihí-í diu-ni mee-n ñí taxi-n. ⁸ Te ní dánèhé-í-yu nchaa tnúhu sá ñí dánèhé ñáhá-n xii-í, te ní sándáá iní-yu. Te ní cutnùní iní-yu sá nùú-n ñí quee-í véxi-í, te ní sándáá iní-yu sá yòhó ní tendaha ñaha-n xii-í véxi-í ñuyú-a.

⁹ 'Te yúhú càháⁿ ndàhú-í núú-n cuendá nchaa ñáyiú ní taxi cuendá-n. Te ñá túú càháⁿ ndàhú-í núú-n cuendá ñáyiú ndècu ichi cuehé ichi duha, chi cuendá nchaa ñáyiú ní taxi cuendá-n càháⁿ-í, chi cuendá-n cùú-yu. ¹⁰ Te nchaa sá cúú cuendá-í cúú-xí cuendá-n, te nchaa sá cúú cuendá-n cùu-xi cuendá-í tnàhá-í. Te xiquide càhnu ñahá-yu xii-í.

¹¹ 'Te yúhú vá cundècu-gá-í ñuyú-a, dico mèé-yu chi cundecu-ní-yu, te yúhú ndixi-í núú ndécú-n. Táu, yòhó ío yiñuhu ndecu-n, te yúhú càháⁿ ndàhú-í núú-n sã ní yùhu ñí iní-n còto-n nchaa ñáyiú ní taxi cuendá-n, ñáyiú ní sándáá iní tnúhu-í cuendá sá ñíⁿ-ní ìchi cuú-yu cundecú-yu dàtná ñⁿ-ni cùu nchoo. ¹² Chi òré ndécú-í ndihí-yu ñuyú-a ní xito-í-yu nàcuáa cùu iní-n, te ñí ñⁿ-yu ñá túú ní xíta nihnu, chi ñⁿdì-ni té Jùdás ní xíta nihnu tnàhí-dé, te ducaⁿ ñí cuu cuendá sá ñí quee ndáá-xi nàcuáa yòdo tuní núú tütú-n.

¹³ 'Te vitna sa ndixi-í núú ndécú-n, dico nini ndècu-gá-í ñuyú-a duha càháⁿ-í cuendá sá cúdí^í iní-yu dàtná cúdí^í iní mèé-í. ¹⁴ Te yúhú ní dánèhé-í-yu tnúhu-n, dico nchaa

ñáyi ndècu ichi cuehé ichi duha cùu úhú iní ñáhà-yu xii-yu cuèndá sá ñà túú-gă ndécü-yu ichi cuehé ichi duha-áⁿ dàtná yúhú ñá túú ndècu-í ichi-áⁿ. ¹⁵ Te ñá túú càchí-í sá xócàní-n-yu ñuyú-a, dico càháⁿ ndàhú-í núú-n sã dácăcu nihnú-n-yu núú yucu ñăvăha. ¹⁶ Te yúhú ñá túú ndècu-í ichi cuehé ichi duha, te ducaⁿ mée-yu ñá túú-gă ndécü-yu ichi cuehé ichi duha. ¹⁷ Te ío na cùndecu yihi ñuhu-gă-yu núú-n dàcuahá-yu tnúhu-n, chi cùu-xi ìⁿ tnúhu ndáá. ¹⁸ Te dàtná ní tendaha ñàha-n xii yúhú véxi-í tnuú nchaa ñáyi ndècu ichi cuehé ichi duha, ducaⁿ càda-í tendaha-ÿ-yu quíhíⁿ-yu cáháⁿ-yu tnúhu-í tnuú nchaa ñáyi ndècu ichi cuehé ichi duha. ¹⁹ Te yúhú ndécú yíñuhu-í núú-n, te cada ñàha-n xii-í nàcuáa cùu iní-n sã cuèndá-yu, te ducaⁿ te cundecu yiñuhú-yu núú-n dàcuahá-yu tnúhu-n.

²⁰ Te ñá díú cuèndá mee-ni ñáyi sa ní sándáá iní-xi càháⁿ ndàhú-í núú-n, chi tnàhá cuèndá nchaa ñáyi na quèndáá iní ñàhá xii-í ndée ìdá-gă nŭu na cùndedóho-yu tnúhu cáháⁿ ñáyi na tëndaha-í. ²¹ Te xicáⁿ táhù-í núú-n sã ncháă-yu ìⁿ-nă ichi na cùu-yu, te ìⁿ-nă cani iní ndihi ñàhá-yu xii-o dàtná cúu nchò ìⁿ-ni cuu-o. Te ducaⁿ ìⁿ-ná cuu-o ndihí-yu cuèndá sá ná quèndáá iní nchaa ñáyi ndècu ichi cuehé ichi duha sá díú-n ñí tendaha ñàha-n xii-í véxi-í ñuyú-a. ²² Te nchaa sá văha ní taxi-n ndècu ndihi-í ní dánèhé-í-yu cuèndá sá ìⁿ-nă cuú-yu cundecú-yu dàtná ndécú nchò. ²³ Te yúhú cundecu ndihi-í-yu, te yòhó cundecu ndihi ñàha-n xii yúhú cuèndá ìⁿ-nă cuu ndisá-yu cundecú-yu. Te ducaⁿ te cutnùní iní nchaa ñáyi ndècu ichi cuehé ichi duha sá díú mée-n ní tendaha ñàha-n xii-í véxi-í ñuyú-a, te cùu iní-n-yu dàtná cúu iní ñàhá-n xii yúhú.

²⁴ 'Táu, mee-n ñí taxi cuèndá-n-yu, te cuiní-í sá

cúndècú-yu núú cúndècu-í cuendá quiní-yu sá quidé càhnu ñaha-n xii-í chi ducaⁿ-ni cùu iní ñáhá-n xii yúhú ndéé cútnàhá vátá ngáva-gá ñuyú. ²⁵ Táu, yòhó ío yíñuhu ndecu-n. Te ñáyiú ndècu ichi cuehé ichi duha ñá túú xìní ñáhă-yu xii-n, dico yúhú chi xìní ñáhà-í xii-n, dico ñáyiú ní sándáá iní ñáhá xii-í sa xìní-yu sá díú-n ñí tendaha ñaha-n xii-í véxi-í ñuyú-a. ²⁶ Te sa xăhaⁿ-ÿ xii-yu yoo cùu-n, te ñu-ni ducaⁿ càda-í cuendá cuu iní tnáhă-yu dàtná cúú iní ñáhá-n xii-í, te ducaⁿ cùndecu-í ndihí-yu — càchí-gá xăhaⁿ-gă xii Tătá-gă Dútú Ndiöxí.

18

Ní tñi-güedé Jèsús ndécá ñaha-güedé cuáháⁿ

(Mt. 26:47-56; Mr. 14:43-50; Lc. 22:47-53)

¹ Te sátá dúcáⁿ ñí cáháⁿ Jèsús, te ní quee-gá ndihi cue téé xica cuu ndihi-gá cuáháⁿ-güedé ndàa ingá xio yuhu yúú Cèdrón. Te yàcáⁿ cáá ñíⁿ lahuertá, te xití lahuertá-áⁿ cuănguïhu Jèsús ndihi cue téé xica cuu ndihi-gá. ² Te té Júdás déhe té Xímú Iscarioté téé ní sáha cuendá ñáhá xii-gá núú cuè téé cùu úhú iní ñáhá sa xìní-dé lahuertá-áⁿ chi titní xito ní sáháⁿ Jèsús ndihi-güedé xíaⁿ. ³ Núú ndáá ichi xíaⁿ ñí sáá té Júdás ndihi vâi sandadú, ndihi cue téé quide cuendá veñúhu ní techiúⁿ ñaha cue dútú cúnúu, ndihi cue téé cùu fariséú. Te xínehe-güedé machití ndihi ñíⁿ úú-gá sá dééⁿ, te yòtnuú-güedé lintérná ndihi iti ní sáá. ⁴ Te Jèsús sa nàha-gá nchaá nàcuáa cada ñaha-güedě xii-gá nùu ní sáháⁿ tuha ñaha-gă xii-güedé, te ní xăhaⁿ-gă:

—¿Yoo nànducu-ndo? —cachí-gá xăhaⁿ-gă xii-güedé.

⁵ Te ní xăhaⁿ-güedě:

—Jèsús téé ñuú Nazàrét nànducu-ndí —càchí-güedé xăhaⁿ-güedě xii-gá.

Te ní xăhaⁿ Jèsús:

—Yúhú ducaⁿ nàni-í, te náu-í ndécú-á te núu yúhú nándùcu-ndo —cachí-gá xáhaⁿ-gã xii-güedé.

Te tràhá té Jùdás téé ní sáha cuendá ñáhá xii-gá ndihi-güedé. ⁶ Te òré ní xáhaⁿ Jèsús sá díú-gã cúú tée nànducu-güedé, te ní nacaca dùma-güedé te ní nduá-güedé ndéé ñuhu. ⁷ Te ní xícáⁿ tnúhú tùcu Jesús núú-güedě yoo nànducu-güedé. Te ní xáhaⁿ tùcu-güedé sá Jèsús téé ñuú Nazàrét nándùcu-güedé, ⁸ núu ní xáhaⁿ-nă Jèsús:

—Sa ní cáháⁿ-í sá díú yǔhú ducaⁿ nàni-í, te núu yúhú nándùcu-ndo, te daña-ndo nchàa cue téé iha na nùhú-güedé —càchí-gá xáhaⁿ-gã xii-güedé.

⁹ Duha ní cuu chi ní quee ndáá-xi nàcuáa ní cáháⁿ méé Jèsús chi ní cachí-gá sá ncháá ñăyiu ní sáha cuendá ñáhá Yă Ndiöxí cundecu ndihi-gá vá cuíta nihnú-yu. ¹⁰ Te té Xímú, àdi Pelú chi úú òú-dé, néhé-dě ñⁿ machití, te ní tava-dé machití-án ñii-xi te ní xehndé-dé lóho xio cùha ñⁿ téé nàni Malcú ní quéndeé duuⁿ. Te téé-án xínú cuèchi-dé núú dǔtú cúnù-gá. ¹¹ Te ní xáhaⁿ Jèsús xii té Pèlú:

—Nataxúha machití-áⁿ nǔú ñúhú-xí, chi dacuitíí sǎ ndóhò-í nàcuáa ní cachí Tǎtà-í cunduu —càchí-gá xáhaⁿ-gã xii-dé.

*Jèsús ndécú-gã núú dǔtú cúnù-gá
(Mt. 26:57-58; Mr. 14:53-54; Lc. 22:54)*

¹² Te cue sandàdú ndihi cue téé cùnù-gá núú-güedě, ndihi cue téé quide cuendá veñúhu ní tni-güedé Jèsús, te ní dácútú ñàha-güedé. ¹³ Te ndèca ñàha-güedé xii-gá cuáháⁿ núú ndécú tě Ànás, te té Ànás-án cúú-dě tǎtá ñadìhí té Caifás. Te té Caifás-án ñⁿ cuu-dé dútú cúnù-gá cuíá-ăⁿ. ¹⁴ Te òu-ni téé-án ñⁿ xáhaⁿ-dě xii ñăyiu isràél sá vǎha-gá sá ííⁿ-ní tée na cùú-dé sá cuendá-yu ncháá-yu.

*Té Pèlú càháⁿ-dé núú ñǎyiu sá ñà túú xìní-dé Jèsús
(Mt. 26:69-70; Mr. 14:66-68; Lc. 22:55-57)*

¹⁵ Te té Pèlú, àdi Xímú chi úú òù-dé, ndìhi ingá tucu-dé nàcuáa xica cuu ndìhi-güedé Jèsús nchìcúⁿ ñáhá-güedé xii-gá cuáháⁿ. Te ìⁿ tée-áⁿ xìní tnáhá-dě ndìhi dútú cúnù-áⁿ nũu nchìcúⁿ-dé tnáhá-dé Jèsús cuánguìhu ndéé núú cáá vèhe tée cúnù-áⁿ. ¹⁶ Dico té Pèlú ní ndóo-dé yuyèhe ndaa quehé, núú ní ndee tée ndìhi té Pèlú-áⁿ nǐ cáháⁿ ndìhi-dé ñaha ndèé yuyèhe, te ndèca-dé té Pèlú cuánguìhu. ¹⁷ Te ní xáhaⁿ ñàha ndéé yuyèhe-áⁿ xii té Pèlú:

—¿Náa ñá díú yòhó tnáhá-n xica cuu ndìhi-n tée ndèca-güedé cuánguìhu-a? —càchí-aⁿ xáhaⁿ-aⁿ xii-dé.

Te ní xáhaⁿ tǐ Pèlú:

—Ñáhá, ñá túú tǐ-ǎⁿ xicá cùu ndìhi-ú —càchí-dé xáhaⁿ-dǐ xii-aⁿ.

¹⁸ Te ío víxiⁿ quìde-xi núú cue tée xinu cuechi, ndìhi cue tée quìde cuendá veñúhu ní dátñáhá-güedé ñuhú, te xínutñí teté-güedé ndìhi té Pèlú.

*Dútú cúnù nducu tnúhu-dé núú Jèsús
(Mt. 26:59-66; Mr. 14:55-64; Lc. 22:66-71)*

¹⁹ Te dútú cúnù ní xicáⁿ tnúhú-dě núú Jèsús nũu nándi cùu cue tée xica cuu ndìhi-gá, te nándi sá dánèhé ñáhá-gǎ xii-güedé. ²⁰ Te ní xáhaⁿ-gǎ:

—Yúhú càháⁿ ndodo-í núú nchàa ñáyiu cuéi xití veñúhu càhnu sá ìo cúnùu, te cuéi xití nchaa dava-gá veñúhu núú tàcá nchaa ñáyiu isràél ducaⁿ-ni dānehé-í-yu, te ñá túú dāyuhu cáháⁿ-í. ²¹ Núú vá càcáⁿ tnúhú-n nũu-í. Cáčáⁿ tnúhú nũu nchàa ñáyiu sácúndedóho tnúhu càháⁿ-í, te na càháⁿ-yu núú nása ndùu tnúhu càháⁿ-í chi xìní-yu —càchí-gá xáhaⁿ-gǎ xii-dé.

²² Te sá dúcáⁿ nǐ cáháⁿ Jèsús nǔu ìⁿ tée quìde cuendá veñúhu nùtnǐi-dé tnàhá-dé te ní cani-dé ìⁿ déhndé nǔú-gǎ. Te ní xáhaⁿ-dě:

—¿Ná cuendá ducaⁿ càháⁿ-n nǔú dǔtú cúnùu-i? — cachí-dé xǎhaⁿ-dě xii-gá.

²³ Te ní xáhaⁿ Jèsús xii-dé:

—Te núu nèhé ní cáháⁿ-í te cáháⁿ-n nǎsa ndùu tnúhu ní cáháⁿ-í, te yúhú càháⁿ váha-í te ducaⁿ càniha-n —cachí-gá xáhaⁿ-gǎ xii-dé.

²⁴ Te ndùtu yoho-ni Jesús ní dánùhú ñáhá tǎ Ànás xii-gá ndaha té Caifás dútú cúnùu-gá.

Té Pèlú càháⁿ tucu-dé núu ñǎyiu sá ñà túú xiní-dé Jèsús (Mt. 26:71-75; Mr. 14:69-72; Lc. 22:58-62)

²⁵ Te té Pèlú nùtnǐi teté-ni-dé, te ní xáhaⁿ-güedě xii-dé:

—¿Náa ñá díú tnàhá yòhó xícá cùu ndìhi tée ndèca-ndí véxi-ǎn? —càchí-güedé xǎhaⁿ-güedě xii-dé.

Te ní xáhaⁿ tǎ Pèlú:

—Ñáhá, ñá túú tǎe-áⁿ xícá cùu ndìhi-ú —càchí-dé xǎhaⁿ-dě xii-güedé.

²⁶ Te ìⁿ ñaní tnàhá tǎe ní xehndé té Pèlú lóho-xi-áⁿ xínú cuèchi-dé tnàhá-dé núu dǔtú cúnùu. Te tǎe-áⁿ nǐ xáhaⁿ-dě xii té Pèlú:

—¿Náa ñá díú tnàhá-n ndìhi-n-dé ní xiní ñáhà-í òré ní tnǐi-ndí-dé xití lahuèrtá? —càchí-dé xǎhaⁿ-dě xii-dé.

²⁷ Te té Pèlú ní xáhaⁿ tucu-dé sá ñà díú-dě, te òré-áⁿ nǐ cana ìⁿ líhi.

Jèsús ndécú-gǎ núu tǎ Pìlatú

(Mt. 27:1-2, 11-14; Mr. 15:1-5; Lc. 23:1-5)

²⁸ Te ní ndeñuhu-güedé Jèsús vehe té Caifás, te ndèca ñaha-güedé xii-gá cuáháⁿ vechiùⁿ tée cùu gobiernú. Te sa ta cùditó-ni-gá cuáháⁿ nǔu ñá ní cuíní cue tée isràél quíhu-güedé xití vechiùⁿ tée cùu gobiernú-áⁿ.

Te núu nì quíhu-güedé vechiùⁿ-áⁿ ñá, te vá cúu-gă quíhu-güedé cudini-güedé vico pascuá ní cùu chi ducaⁿ tnàhí quide-güedé. ²⁹ Núu té Pìlatú tée cùu gobiernú ní quee-dé vechiùⁿ-dé ní cáháⁿ ndihí ñaha-dě xii-güedé, te ní xáhaⁿ-dě:

—¿Ná cuéchi ní quide tée-a núu ndèca-ndo-dé véxi? —
càchí-dé xáhaⁿ-dě xii-güedé.

³⁰ Te ní xáhaⁿ-güedě:

—Te núu dìcò ñá túu cuéchi-dé-áⁿ te vá cándèca-ndí-dé quixi núu-n ní cùu —cachí-güedé xáhaⁿ-güedě xii-dé.

³¹ Te ní xáhaⁿ tùcu té Pìlatú xii-güedé:

—Chí cándèca-dé cuánùhú, te cada ndáá-ndó cuéchi-dé nàcuáa càa léi méé-ndó —càchí-dé xáhaⁿ-dě xii-güedé.

Te ní xáhaⁿ-güedě:

—Dico nchúhú ñáyiù isràél chi ñá túu dùcaⁿ taxi tnuní léi sá cáhní-ndí —càchí-güedé xáhaⁿ-güedě xii-dé.

³² Te ducaⁿ ñi cuu chi dacuitíí ñi quee ndáá-xi nàcuáa ní cáháⁿ méé Jèsús cada-xi cuú-gá. ³³ Te cuándihú té Pìlatú vechiùⁿ-dé, te ní cana-dé Jèsús ní xicáⁿ tnúhú-dě núu-gă, te xáhaⁿ-dě:

—¿Yòhó yíndàha-n ñáyiù isràél-ăⁿ? —càchí-dé xáhaⁿ-dě xii-gá.

³⁴ Te ní xáhaⁿ Jèsús:

—¿Te xíăⁿ càháⁿ-n să véxi iní méé-n, àdi ió ìiⁿ ñáyiù ní cachí tnúhu xii-n cuendá-í? —càchí-gá xáhaⁿ-gă xii-dé.

³⁵ Te ní xáhaⁿ té Pìlatú xii-gá:

—Ñá díú tée isràél cùu-í nùu ducaⁿ cáháⁿ-n, chi cue ñaní tnáhá-n cuè tée isràél ndihí cue dútú cúnúu ní taxi cuendá ñáhá-güedě xii-n ìha. ¿Te ná ní quide-n? —càchí-dé xáhaⁿ-dě xii-gá.

³⁶ Te ní xáhaⁿ Jèsús:

—Ñá díú tée ñuyú-a cùu-í te ni ñà túu véxi-í taxi tnuní-í ñuyú-a, chi núu dìcò iha tàxi tnuní-í áⁿ te cue tée xica cuu

ndihi-í nàá-güedé ndihi cue téé isràél cuendá sá vǎ tníí ñaha-güedé xii-í ní cùu, dico ñá túú vèxi-í sá táxí tnùn-í ñuyúú-a —càchí-gá xáhaⁿ-gǎ xii-dé.

³⁷ Te ní xáhaⁿ tǎ Pìlatú:

—¿Te téé yìndaha ñáyiú cùu-ó vání? —càchí-dé xǎhaⁿ-dǎ xii-gá.

Te ní xáhaⁿ Jèsús:

—Te dàtná càchí-n-ǎⁿ yìndaha ndisa-í ñáyiú, chi yúhú véxi-í ñuyúú-a te iha ní cacu-í te càháⁿ-í mee-ni tnúhu ndáá. Te nchaa ñáyiú na cùdíí ìni-xi tnúhu ndáá, te tedóho-yu nchaa tnúhu càháⁿ-í —càchí-gá xáhaⁿ-gǎ xii-dé.

³⁸ Te ní xáhaⁿ tǎ Pìlatú:

—¿Te ná cúú-tu tnúhu ndáá-áiⁿ? —càchí-dé xǎhaⁿ-dǎ xii-gá.

Càchí-güedé sá cáhni-güedǎ Jèsús

(Mt. 27:15-31; Mr. 15:6-20; Lc. 23:13-25)

Te sátá ñí yáha ní xicáⁿ tnúhú tǎ Pìlatú núú Jèsús, te ní quee tucu-dé quehé, te xǎhaⁿ-dǎ xii cue téé isràél:

—Ñá túú ñá cuéchi téé-a. ³⁹ Te váha-ni chi ducaⁿ tnàhí quide nchohó sá ndí tnahá nduu vico pascuá cuiní-ndó sǎ dácǎcu-í ìⁿ téé yìhi vecaá. Te núu cuiní-ndó te na dácǎcu-í téé yìndaha ñaha xii-ndo —càchí-dé xǎhaⁿ-dǎ xii-güedé.

⁴⁰ Te sá dúcáⁿ ñí cáháⁿ-dé, núu nchaa-güedé níhi ní cáháⁿ-güedé, te xǎhaⁿ-güedǎ:

—¡Vá dácǎcu-n tǎe-áⁿ, té Barrábás dácǎcu-n! —càchí-güedé xǎhaⁿ-güedǎ xii-dé.

Te té Barrábás-áⁿ ñí cuu-dé ìⁿ ñadúhú.

19

¹ Te té Pìlatú ní táuchíúⁿ-dǎ ní tníí ñaha cuè sandadú xii Jèsús, te ní caniha-güedǎ xii-gá ndihi ñíí. ² Te ñiú-ni cue téé-áⁿ ñí cadúha-güedé ìⁿ coróná iñu ní chihí-güedé

díquí-gă, te ní dáquǎ nuu ñaha-güedě xii-gá ìⁿ dóó tícuèhé víhí. ³ Te ní sáháⁿ ndehe yatni-gá-güedé núú-gă, te ní xáhaⁿ-güedě:

—¡Ío càhnu cuu yohó té yíndaha ñaha xii ñáyiú isràél!
—càchí-güedé xăhaⁿ-güedě cúdíquí ndeé ñáhá-güedě xii-gá.

Te ní cani-güedé déhndé núú-gă.

⁴ Te ní quee tucu té Pìlatú quehé te ní xáhaⁿ-dě xii nchaa ñáyiú xĩndecu quehé:

—Te cundehe-ndo-dě ná ndeé ñùhu-í-dé iha, chi yúhú săha-í cuendá sá ñà túú cuěchi-dé —càchí-dé xăhaⁿ-dě xii-yu.

⁵ Te ní ndeñuhu ñaha té Pìlatú xii Jèsús xití vechiùⁿ-dé te ñùhu ìⁿ coroná iñu díquí-gă, te ñihnu-gá dóó tícuèhé víhí-ăⁿ. Te ní xáhaⁿ tĕ Pìlatú xii-yu:

—¡Nái-dé-a! —càchí-dé xăhaⁿ-dě xii-yu.

⁶ Te ní xiní ñáhá cuè dútú cúnùu ndìhi cue téé quide cuendá veñùhu. Te ní cuáá-güedé, te xăhaⁿ-güedě:

—¡Cata caa-dé! ¡Cata caa-dé núú cùrúxí! —càchí-güedé xăhaⁿ-güedě xii-dé.

Te ní xáhaⁿ tĕ Pìlatú:

—Váha-gá nñu candeca mee-ndo-dě quíhíⁿ cata caa-ndo-dě núú cùrúxí, chi yúhú cúnùnì iní-í sá ñà túú na cuěchi-dé —càchí-dé xăhaⁿ-dě xii-güedé.

⁷ Te ní xáhaⁿ cuè téé isràél:

—Lèì ndécú ndìhi nchúhú càchí-xi sá dài cuú-dé, chi càchí-dé sá Dĕhe Yá Ndiöxí cúú-dě —càchí-güedé xăhaⁿ-güedě xii-dé.

⁸ Te sá dúcáⁿ ñí xáhaⁿ-güedě xii té Pìlatú, te vaa-gá ní yùhú-dé. ⁹ Núú cuándihu tucu-dé vechiùⁿ-dé, te ní xáhaⁿ tùcu-dé xii Jèsús:

—¿Te yòhó ndèé tée cùu-n-i? —cachí-dé xǎhaⁿ-dě xii-gá.

Dico Jèsús ñá túú ní cǎháⁿ-gá.

¹⁰ Núu ní xáhaⁿ tǎ Pilatú xii-gá:

—¿Te vá cǎchí tnúhu-n nǔu ndèé tée cùu-n-u? ¿Náa ñá túú xìní-n sǎ yǔhú táxí tnùní-í, te cuu-ni tauchiùⁿ-í cata caa ñaha-güedě xii-n nǔú cùrúxí cuú-n, te cuu-ni dàcácu ñaha-í xii-n-ǎⁿ? —cǎchí-dé xǎhaⁿ-dě xii-gá.

¹¹ Te ní xáhaⁿ Jèsús:

—Yòhó ñá túú sǎ táxí tnùní ñáhá-n xii yúhú ní cùu núu ñá túú Yǎ Ndiǒxí ní cuíní-gá sá dúcáⁿ cùnduu, te tée ní taxi cuendá ñáhá xii-í núu-n tǎe-áⁿ ïo-gá ndècuéchi-dé dàcúxí yòhó —cǎchí-gá xáhaⁿ-gǎ xii-dé.

¹² Te òré-áⁿ nǐ ngúíta té Pilatú ndúcú-dě nàcuáa cada-dé dàcácu-dé Jèsús ní cùu, dico cue tée isràél ní ngúíta-güedé ní cuáá-güedé, te xáhaⁿ-güedé:

—Te núu na dàcácu-n tǎe-áⁿ, te ñá díú tǎe tnàhá tnúhu ndihí té Cèsár cuú-n. Chi ndèda-ni càa tée na cǎchí sá cuú-dě tée yǐndaha ñaha xii ñáyiu cùu úhú iní-dé té Cèsár. Te té Jèsús-áⁿ cǎchí-dé sá táxí tnùní-dé —cǎchí-güedé xáhaⁿ-güedě xii-dé.

¹³ Te sá dúcáⁿ nǐ xáhaⁿ-güedě xii té Pilatú nǔu ní quee-dé ndihí Jèsús cuáháⁿ ndihí ñaha-dě corrèdór núu nǐ quée mee-ni yúú vǎha núu ñúhú, te xíaⁿ nání-xí Gǎbatá tnúhu hèbreú. Te xíaⁿ ndécú xilé sácõo nchihi té Pilatú xèhndé-dé cuéchi ñáyiu, núu ní nucóo-dé núu xilé-dé òré ní quexio-dé ndihí Jèsús. ¹⁴ Te cùu-xi datná cuádava nduu, nduu víspré vico pàscuá. Te ní xáhaⁿ tǎ Pilatú xii ñáyiu isràél:

—¿Nái tée yǐndaha ñaha xii-ndo-a! —cachí-dé xǎhaⁿ-dě xii-yu.

¹⁵ Te ní cuáá-yu, te xǎhǎⁿ-yu:

—¡Cahni-dé! ¡Cahni-dé! ¡Cata caa-dé núú cùrúxí! —
càchí-yu xăhăⁿ-yu.

Te ní xáhaⁿ tĕ Pìlatú:

—¿Te yúhú cata caa-í tée yîndaha ñaha xii-ndo-u? —
cachí-dé xăhaⁿ-dĕ xíí-yu.

Te cue dútú cúnùu ní xáhaⁿ-güedĕ:

—Nchúhú ñá túú-gă tée yîndaha ñaha xii-ndí, chi
îⁿdii-ni té Cèsár yîndàha ñaha-dé xii-ndí —càchí-güedĕ
xăhaⁿ-güedĕ xii-dé.

¹⁶ Te té Pìlatú ní xáhaⁿ-dĕ ní queheⁿ cuëndá-güedĕ
Jèsús ndécá ñaha-güedĕ cuáháⁿ cata caa ñaha-güedĕ núú
cùrúxí.

Sàta caa-güedĕ Jèsús núú cùrúxí

(Mt. 27:32-44; Mr. 15:21-32; Lc. 23:26-43)

¹⁷ Te ní quee Jèsús nchídó-gă cùrúxí cuáháⁿ îⁿ xichi núú
nání Yìqui Díquí Ndÿi. Te tnúhu hĕbreú queé-xí Gôlgotá.

¹⁸ Te yàcáⁿ ní sata caa ñaha-güedĕ xii-gá núú cùrúxí-án.

Te xio xio dîñi-gá ní sata caa-güedĕ úú cue tée ndĕcu
ndisa cuéchi-xi dĭu-ni núú cùrúxí tucu. ¹⁹ Te ní táuchíúⁿ

tĕ Pìlatú ní taxi ndecu-güedĕ îⁿ sá ndĕé lètrá núú cùrúxí
tá càa-gá, te duha càchí lètrá-án: “Jèsús tée ñuú Nazàrét,

tée yîndaha ñaha xii ñáyiú isràél”, duha càchí-xi. ²⁰ Te vâi
ñáyiú isràél ní xiní-yu nàcuáa càháⁿ lètrá-án, chi yatni-ni

yuhu ñuú ní sata caa ñaha-güedĕ xii-gá núú cùrúxí. Te
lètrá-án càháⁿ-xi tnúhu hĕbreú, te càháⁿ-xi tnúhu grĕgú,

te càháⁿ-xi tnúhu làtín. ²¹ Te ní xáhaⁿ cuè dútú cúnùu xii
té Pìlatú:

—Vá táuchìuⁿ-n tee-güedĕ lètrá càháⁿ-xi “Tée yîndaha
ñaha xii ñáyiú isràél” ní cùu, vâha-gá tauchìuⁿ-n

tee-güedĕ lètrá càháⁿ-xi “Tée càchí yîndàha ñaha xii
ñáyiú isràél ní cùu” —cachí-güedĕ xăhaⁿ-güedĕ xii-dé.

²² Te ní xáhaⁿ tĕ Pìlatú:

—Nàcuáa ní táuchíùⁿ-í ní tee-güedé te ducaⁿ quèndóo-xi —càchí-dé xáhaⁿ-dě xii-güedé.

²³ Te sátá nǐ sata caa ñaha cuè sandadú xii Jèsús núú cùrúxí, te cúmí xichi ní quide-güedé dóó-gă, te ìⁿ ìⁿ xichi dóó-gă ní cáhñu cue sandàdú-áⁿ. Te ndècu ìⁿ dóó-gă dóó cání ñà túú ní tǐcu. ²⁴ Te cuendá dóó-áⁿ nǐ xítñaha cue sandadú-áⁿ:

—Vá ndátá-ó dǒó-a, váha-gá nǔu na còto ndéé-ó cuendá quiní-ó ndèdacàa-o cuu cuendá-ó —càchí-güedé xítñaha-güedé.

Te ducaⁿ nǐ quide-güedé chi ní quee ndáá-xi nàcuáa càháⁿ-xi núú tütú Yă Ndiǒxí núú càchí-xi: “Títí xichi ní cáhñu-güedé dóò-í. Te ní xito ndéé-güedé cuendá cut-nùní iní-güedé ndèdacàa-güedé níhí-güedé dóò-í”, duha càchí-xi núú tütú-gá. Te sá dúcáⁿ càháⁿ-xi núú tütú Yă Ndiǒxí nǔu xíáⁿ ducaⁿ nǐ quide cue sandàdú-áⁿ.

²⁵ Te yatni dǐñi curúxí núú tácaà Jesús nútñǐ nǎná-gă, ndihí cùhú-xi, ndihí tá Màriá ñadihí té Clèofás, ndihí tá Màriá Magdalèná. ²⁶ Te ní xiní Jèsús nǎná-gă nútñǐ-aⁿ dǐñi ìⁿ téé ní xica cuu ndihí-gá, téé ío cùu iní-gá, te ní xáhaⁿ-gă xii nǎná-gă:

—Nǎá, téé nútñǐ-áⁿ nduu-dé dàtná déhe mee-n —càchí-gá xáhaⁿ-gă xii-aⁿ.

²⁷ Te ní xáhaⁿ-gă xii téé ní xica cuu ndihí-gá-áⁿ:

—Ñaha-áⁿ nduu-aⁿ dàtná nǎná méé-n —càchí-gá xáhaⁿ-gă xii-dé.

Núu ndéé dàvá-áⁿ nǐ nduu nǎná ñáhá tǔe-áⁿ xii nǎná-gă.

Ní xíhí Jèsús

(Mt. 27:45-56; Mr. 15:33-41; Lc. 23:44-49)

²⁸ Te ní cutnùní iní Jèsús sá nǐ ndihí chiùⁿ ní táhú Tǎtá-gă Dútú Ndiǒxí ní quide-gá nǔu ní cachí-gá:

—Yíhí-í ndute —càchí-gá.

Te duha ní cáháⁿ-gá chi ní quee ndáá-xi nàcuáa càháⁿ-xi núú tütü Yă Ndiöxi.

²⁹ Te ndècu ìⁿ lítu ñùhu ndudí íá. Te sá dúcáⁿ ñí cáháⁿ-gá sá yìchí-gá ndute, núú xíáⁿ ní queheⁿ-güedé cáchí te ní chindóyo-güedé xití ndudí íá-ăⁿ, te ní chinenü-güedé díquí ìⁿ dité yutnu nàni hisópó, te ní ndocani-güedé ní chihi-güedé yuhu-gá. ³⁰ Te sátá ñí xihi-gá ndudí íá-ăⁿ, te càchí-gá:

—Vitna ní dáxīnu cava-í nchaa chiūⁿ ní cachí Tătà-í cada-í —duha ní cachí-gá.

Te ní xócuīta dúcúⁿ-gă ndàa núú-gă, te ní xíhí-ni-gá.

Īⁿ sandàdú ní caáⁿ-dé yiqui naha Jèsús ndīhi ìⁿ pùyá yíhí càa núú-xi

³¹ Te cuèndá sá ndùu vispré vico pàscuá cúú-xí nūu ñá ní cuìní cue tée isràél cundecu-ni yiqui cùñú-gá núú cùrúxí ndīhi yiqui cùñú cue tée ní sata caa-güedé dīñi-gá, chi cuèndá nduu tnèé-áⁿ cúú-xí ndùu ndetatú ñáyiū, te ío quìde cahnú-yu nduu-ăⁿ, núú ní xáhaⁿ-güedé xii té Pilatú sá táuchìuⁿ-dé quíhíⁿ cue tée cáhnú-güedé díhíⁿ Jèsús ndīhi díhíⁿ cue tée tàcaa ndīhi-gá, te xocàni-güedé yiqui cùñú-gá ndīhi yiqui cùñú-güedé yàcáⁿ. ³² Te sátá dúcáⁿ te ní sáháⁿ cue sandàdú ní sáhnú-güedé díhíⁿ cue tée tàcaa xio xio dīñi Jesús. ³³ Te òré ní cuyatni-güedé núú-gă, te ní xiní-güedé sá sà ní xíhí-gá nūu ñá ní sáhnú-güedé díhíⁿ-gá.

³⁴ Dico ìⁿ sandàdú-áⁿ ñí cúxi-dé pùyá néhé-dě ìⁿ xio yiqui naha-gă, te yíhi caá núú-xi núú ní caáⁿ-xi yiqui naha-gă ní quee níñí ndīhi ndute cuí. ³⁵ Te yúhú té Juáá tée ní cadúha tutú-a ní xiní-í nàcuáa ní cuu ní xíhí Jèsús, te xíáⁿ nūu càháⁿ ndáá-í cuèndá quíndáá iní-ndó. ³⁶ Te ducaⁿ ñí cuu ñá ní sáhnú-güedé díhíⁿ Jèsús, chi ní quee

ndáá-xi nàcuáa càháⁿ-xi núu tùtú Yă Ndiöxí núu càchí-xi: “Vá càhnú-güedé ni ìⁿ yiqui-gá”, duha càchí-xi. ³⁷ Te ducaⁿ nǐ quide-güedé Jèsús ní caáⁿ-güedé yiqui naha-gă, chi ingá xichi núu tùtú Yă Ndiöxí càchí-xi: “Sáá nduu te quiní-güedé ìⁿ tée ní dánícuèhé-güedé”, duha càchí-xi.

Chindúxi-güedé Jèsús

(Mt. 27:57-61; Mr. 15:42-47; Lc. 23:50-56)

³⁸ Te sátá dúcáⁿ nǐ cuu, te té Chèé tée ñúú Arimateá tnahá-dé ní sándáá iní-dé tnúhu Jèsús dico dayuhu, chi ní xóo yùhú-dé cue tée cùnuu núu ñăyiu isràél. Te tée-áⁿ nǐ xáhaⁿ-dě xii té Pilatú nǔu vá dáñá-dě canehe-dé yiqui cùñú Jèsús quíhíⁿ chindúxi-dé, te té Pilatú ní xáhaⁿ-dě xii-dé sá cúú cànehe-dé yiqui cùñú Jèsús quíhíⁿ, núu ní sáháⁿ-dé ní nuu nehe-dé yiqui cùñú-gá núu cùrúxí nchídó-dě cuáháⁿ. ³⁹ Te té Nicòdemú tée ní sáháⁿ niú ní cáháⁿ ndíhi-dé Jèsús ndéé díhna, tée-áⁿ néhé-dě ócò úxí kílú yuchi ní cuáha mee-ni yúcú sǎ nání mìrrá ndíhi yúcú sǎ nání àloés. Te ío váha tñami saháⁿ. ⁴⁰ Te ní naníhí tnahá-dě ndíhi té Chèé, te ní chidúcúⁿnuu-güedé yiqui cùñú Jèsús mee-ni dǒó vǎha, te nàcuáa ta dùcuⁿ nuu-güedé yiqui cùñú-gá dóó-ăⁿ, te ducaⁿ ta chido-güedé yuchi sáháⁿ tñamí-ăⁿ nǔú dǒó-ăⁿ chi ducaⁿ tnahí quide ñăyiu isràél òré chindúxi tnahá-yu. ⁴¹ Te yatni núu nǐ sata caa-güedé Jèsús cáá ìⁿ lahuertá. Te xití lahuertá-áⁿ nchíí ìⁿ yaú cava duha cuáháⁿ ndáá-xi, te vátá yǒ ìⁿ-gá nguíndúxi xíaⁿ. ⁴² Te cuèndá sá nǐ cuyatni tnahá nduu ndètátú ñăyiu isràél nǔu xíaⁿ yaú cava nchíí yatni-ni xíaⁿ nǐ chihi-güedé yiqui cùñú Jèsús.

20

Jèsús ní ndoto-gá

(Mt. 28:1-10; Mr. 16:1-8; Lc. 24:1-12)

¹ Te ndumìngú tacuĩhndá-gá cuáháⁿ tá Màriá Magdalèná cuáháⁿ ngoto-xi yaú núú nǐ chihi-güedé yiqui cùñú Jèsús, te ní sáá-xi ní xiní-xi sá ñà túú-gǎ ndèdí yúú yèhe yaú-áⁿ. ² Núú xìnu-xi cuánuhú núú ndécú tǎ Xǐmú, àdi Pelú chi úú òu-dé, ndihi ingá tée ní xica cuu ndihi-gá tée ío cùu iní-gá, te ní xáhaⁿ-xi xii-güedé:

—Nèhe-güedé yiqui cùñú Jèsús cuáháⁿ, te ñá xiní-ó ndèé ní taxi ndecu-güedé —càchí-xi xáhaⁿ-xi xii-güedé.

³ Te ní quee té Pèlú ndihi ingá tée-áⁿ cuáháⁿ ndéhe-güedé yaú núú nǐ chihi-güedé yiqui cùñú-gá.

⁴ Te ndúú-güedé xínú-güedé cuáháⁿ ní cùu, dico ingá tée-áⁿ nǐ cuu níhi-gá sáhá-dě cuáháⁿ-dé nǔu díhna-gá-dé ní sáá-dé yuhu yaú núú nǐ chihi-güedé yiqui cùñú Jèsús ní cùu.

⁵ Te ní ngáundeyi-dé xító ñihni-dé xití yaú-áⁿ, te ní xiní-dé mee-ñá dóó vǎha sá nǐ xíducúⁿ nuu-gá yúcu, dico ñá ní quǐhu-dé.

⁶ Te sátá nǐ sáá té Pèlú te cuanguihu-dé xití yaú-áⁿ, núu tnàhá-dé ní xiní-dé nchaa dóó nǐ xíducúⁿ nuu-gá yúcu-áⁿ.

⁷ Te ní xiní-dé sá dǒo nǐ xíndútú díquǐ-gǎ ñá túú càtuu jundú-xi ndihi dóo nǐ xíducúⁿ nuu-gá chi ní nadúcúⁿnuu-ná cǎtuu ìⁿ xio.

⁸ Te nchícúⁿ tucu tée ní sáá díhna-gá-áⁿ cuanguihu xití yaú-áⁿ, te ní xiní-dé sá dǒo-ñá yúcu, te ñá túú-gǎ yiqui cùñú Jèsús nǔu ní sándáá iní-dé sá nǐ ndoto-gá.

⁹ Chi vátá təcú tnùnì-gá-güedé nàcuáa càháⁿ-xi núú tütú Yǎ Ndiǒxí núú càchí-xi sá Jèsús ndoto-gá.

¹⁰ Te ní xícó ndí ndúú cue tée ní sǎngoto yaú núú nǐ chihi-güedé yiqui cùñú Jèsús ní cùu cuánuhú-güedé vehe-güedé.

*Jèsús ní naníhí tnàhá-gǎ ndihi tá Màriá Magdalèná
(Mr. 16:9-11)*

¹¹ Te ní sáá tucu tá Màriá yuhu yaú núú nǐ chihi-güedé yiqui cùñú Jèsús te ní ngüíta-xi ndàhyú-xi, te ní

ngáundeyi-xi xìto nihni-xi xití yaú-án. ¹² Te xití yaú-án nǐ xini-xi úú espíritú xínú cuèchi núú Yă Ndiǒxí xixíhnu-xi mee-ni dǒó cuixíⁿ xǐndecu-xi núú nǐ cáa yiqui cùñú-gá. Te ìⁿ-xi nùcáo núú nǐ cáa díquí-gă, te ìⁿ-xi nùcáo núú nǐ cáa sáhá-gă. ¹³ Te espíritú-án nǐ xáhaⁿ-xi xì tá Màriá:

—¿Ná cuendá ndàhyú-n? —càchí-xi xáhaⁿ-xi.

Te ní xáhaⁿ tă Màriá:

—Ndàhyú-í chi nèhe-güedé yiqui cùñú Yaá cúú Xítóhó-í cuáhán, te ñá túú xini-í ndèé ní taxi ndecu-güedé —càchí-xi xáhaⁿ-xi xì cue espíritú-án.

¹⁴ Te tnúhu-ni-án nǐ cáháⁿ-xi te ní nchócótó-xí ìⁿ xio, te ní xini-xi Jèsús nútnǐ-gá dico ñá túú ní cùtnuní iní-xi sá díú mèe-gá. ¹⁵ Te ní xáhaⁿ Jèsús xii-xi:

—¿Ná cuendá ndàhyú-n? ¿Yoo nànducu-n? —cachí-gá xáhaⁿ-gă xii-xi.

Te mee-xi nǐ sani iní-xi sá tǎe xìto lahuertá-án cúú tǎe-án, núú ní xáhaⁿ-xi:

—Tăta, te núú yòhó néhé-n yiqui cuñú Jèsús cuáhán, te cáháⁿ-n ndèé ní taxi ndecu-n chi cuendá naqueheⁿ-í canehe-í núhú —càchí-xi xáhaⁿ-xi.

¹⁶ Te ní cáháⁿ díú ñàha-gá xii-xi, te xáhaⁿ-gă:

—¿Màriá! —càchí-gá xáhaⁿ-gă xii-xi.

Te ní ndacoto-xi núú-gă, te ní cáháⁿ-xi tnúhu hèbreú, te xáhaⁿ-xi:

—¿Rabóní! —càchí-xi xáhaⁿ-xi. Te tnúhu-án quée-xí Mèstrú.

¹⁷ Te ní xáhaⁿ Jèsús:

—Daña vá ngání ñàha-n chi vátá ndáá-gă-í núú ndécú Tătà-í. Te núhú-n cǔñaha-n xì cue tée ío váha ní tnahá tnúhu ndíhi-í sá ndàa-í núú ndécú Tătà-í Dútú Ndiǒxí, te diu-gá cúú Tătá-ndó nchàa-ndo, te diu-ni-gá cúú Ndiǒxí-ndó —càchí-gá xáhaⁿ-gă xii-xi.

¹⁸ Te ní natnii tá Màriá Magdalèná ichi cuánuhú-xi cúñaha-xi xii cue téé ní xica cuu ndihi-gá sá nǐ xiní-xi Jèsús, te ní xáhaⁿ-xi xì-güedé nchaa nàcuáa ní xáhaⁿ-gǎ xii-xi.

*Ní quexìo Jesús núú xĩndecu cue téé ní xica cuu ndihi-gá
(Mt. 28:16-20; Mr. 16:14-18; Lc. 24:36-49)*

¹⁹ Te diu-ni ndumìngú sandiquiⁿ ní natacá cue téé ní xica cuu ndihi-gá, te xĩndedí nihnu-güedé vehe sá xiyùhú-güedé cue téé cùnuu núú ñǎyiu isràèl. Te ní quíhu Jèsús ndéé tnuú-güedé ní ngúnutnǐi-gá, te ní xáhaⁿ-gǎ:

—Yá Ndiǒxí chĩndèè ñaha-gá xii-ndo ïo váha cùu iní-ndó ndècu-ndo —cachí-gá xáhaⁿ-gǎ xii-güedé.

²⁰ Te ní dánèhé ñáhá-gǎ ndaha-gá ndihi yiqui naha-gǎ xii-güedé. Te ío ní cudíí ìní-güedé sá díú ndisa-gá ní xiní ñáhá-güedé. ²¹ Te ní xáhaⁿ tùcu Jesús xii-güedé:

—Yá Ndiǒxí chĩndèè ñaha-gá xii-ndo ïo váha cùu iní-ndó ndècu-ndo. Te dàtná ní tendaha ñàha Tátà-í Dútú Ndiǒxí xii-í véxi-í ñuyíú-a, te ducaⁿ tëndaha ñaha-í xii-ndo quíhíⁿ-ndó cǎháⁿ-ndó tnùhu-í núú ñǎyiu —càchí-gá xáhaⁿ-gǎ xii-güedé.

²² Te ní chiyóó-gǎ núú-güedě, te ní xáhaⁿ-gǎ:

—Chí ndúú tàhú Espiritú Yǎ Ndiǒxí cundecu ndihi-ndo.

²³ Te nchaa ñáyiu na quĩndáá iní-xi tnúhu-í te cúñaha-ndo xí-yu sá nǐ quide cǎhnu iní Yǎ Ndiǒxí nchaa cuéchi-yu. Te nchaa ñáyiu vá quĩndáá iní tnúhu-í te cúñaha-ndo xí-yu sá vǎ cǎdá cǎhnu iní-gá cuéchi-yu —càchí-gá xáhaⁿ-gǎ xii-güedé.

Té Mǎxí cǎháⁿ ndihi-dé Jèsús

²⁴ Te núú ùxúú cue téé ní xica cuu ndihi-gá, te ìⁿ-dé nání-dě Mǎxí téé ní xóo danàni-güedé Cuǎchí, te téé-ánⁿ ñà

túu-dě ndécú ndìhi-güedé òré ní sáháⁿ Jèsús. ²⁵ Te dava-gá cue téé ní xica cuu ndìhi-gá ní xáhaⁿ-güedě xii-dé:

—Ní xiní-ndí Jèsús —càchí-güedé xáhaⁿ-güedě.

Te ní xáhaⁿ tẽ Mǎxí:

—Te vá quíndáá iní-í, chi ndéé quíní-í ndaha-gá núú nĩ quée nduyú, te dàquíhu-í díquí ndáhà-í núú nĩ caáⁿ nduyú-áⁿ, te dàquíhu ndàha-í yíquí naha-gǎ núú nĩ caáⁿ, ducaⁿ te quíndáá iní-í —càchí-dé xáhaⁿ-dě xii-güedé.

²⁶ Te núú ùná tucu nduu ní nataká tucu cue téé ní xica cuu ndìhi Jèsús ìⁿ vehe, te nduu-ǎⁿ tnàhá té Mǎxí ndécú ndìhi-güedé. Te cuèi ndèdí nihnu-güedé vehe-áⁿ, te ní quíhu Jèsús ndéé tnuú-güedé, te ní xáhaⁿ-gǎ:

—Yá Ndiǒxí chíndèe ñaha-gá xii-ndo ïo váha cùu iní-ndó ndècu-ndo —cachí-gá xáhaⁿ-gǎ xii-güedé.

²⁷ Te ní xáhaⁿ-gǎ xii té Mǎxí:

—Cundehe ndàha-í te dàquíhu-n díquí ndáhá-n núú nĩ quée nduyú, te dàquíhu-n ndàha-n yíquí naha-í-a cuendá quíndáá iní-n te vá cání ìⁿ cani úú iní-n —càchí-gá xáhaⁿ-gǎ xii-dé.

²⁸ Te ní xáhaⁿ tẽ Mǎxí xii-gá:

—¡Yòhó cúu-n Xìtohó-í! ¡Yòhó cúu-n Ndiǒxì-í! —càchí-dé xáhaⁿ-dě xii-gá.

²⁹ Te ní xáhaⁿ Jèsús:

—Mǎxí, ndéé vitna ní sándáá iní-n chi ndéé ní xiní ñáhá-n xii-í te ní sándáá iní-n, dico cùdí-gǎ iní nchaa ñáiyu ñá túú ní xiní núú ñáhá xii-í, te ní sándáá iní-yu —càchí-gá xáhaⁿ-gǎ xii-dé.

Quíndáá iní-ó tnùhu yòdo tnuní núú tütú-a

³⁰ Te vài-gá sá vǎ yòo tnàhí ndàcu cada ñá túú yòdo tnuní núú tütú-a ní quide Jèsús núú cuè téé ní xica cuu ndìhi-gá. ³¹ Dico dava-gá ní ngódó tnùní núú tütú-a

cuendá sá quìndáá iní-ndó sã Jèsús cúú-gã Crìstú Déhe Dútú Ndiõxí, te naníhí tãhú-ndó te núu na quìndáá iní-ndó-gã.

21

Úsá cue téé ní xica cuu ndihi Jèsús ní xiní ñáhá-güedě xii-gá

¹ Te ingá nduu tucu xĩndecu cue téé ní xica cuu ndihi Jèsús yuhu làgúná ñuú Tìberias, te ní sáháⁿ-gá núu xĩndecu-güedé-áⁿ. Te duha ní cuu ní xiní ñáhá-güedě xii-gá.

² Te ndècu té Xĩmú, àdi Pelú chi úú diu-dé, ndihi té Mǎxí téé ní xóo cúñaha-güedě Cuáchí, ndihi té Natanàél téé ñuú Cànaá, te ñuú-áⁿ yíndèhu-xi distritú Galileá, te tnàhá ndi ndúú déhe té Zebèdeú, ndihi úú-gá tucu cue téé ní xica cuu ndihi-gá. ³ Te ní xáhaⁿ tẽ Pèlú xii-güedé:

—Quíhíⁿ-í quítñii-í chácá —càchí-dé xãhaⁿ-dě xii-güedé.

Te ní xáhaⁿ-güedě:

—Tnàhá nchúhú canchicúⁿ ñáhá-ndĩ xii-n quíhíⁿ tucu —càchí-güedé xãhaⁿ-güedě xii-dé.

Te ní xica-güedé cuáháⁿ-güedé ní sáá-güedé núu ndécú bàrcú, te ní quée-güedé xití bàrcú-áⁿ cuáháⁿ-güedé. Te niú-áⁿ ñã ní ñíhí tnàhí-güedé chácá. ⁴ Te sa ta cùditó-ñã cuáháⁿ ní xiní-güedé Jèsús yuhu làgúná, dico ñã ní cùt-nuní iní-güedé sá díú-gã. ⁵ Te ní xáhaⁿ-gã xii-güedé:

—Cue téé cuechi, ¿ní ñíhí-ndó chácá caxi-o ñã? —càchí-gá xáhaⁿ-gã xii-güedé.

Te ní xáhaⁿ-güedě:

—Vèdana chácá ñà túú ní ñíhí-ndĩ —càchí-güedé xãhaⁿ-güedě xii-gá.

⁶ Te ní xáhaⁿ Jèsús:

—Chí dáquëe ñunu-ndo ndàa xio cuha barcú chi níhí-ndó-dí —càchí-gá xáhaⁿ-gã xii-güedé.

Te ducaⁿ ñí quide-güedé, te òré nátava-güedé ñunu xití ndute, te ñá cündèe-gá-güedé natava-güedé cuendá sá ñí chítú chăcá xití-xi. ⁷ Te téé ní xica cuu ndíhi-gá téé ío cùu iní-gá ní xáhaⁿ-dë xii té Pèlú:

—jDiu Xítóhó Jesucrístú! —càchí-dé xáhaⁿ-dë xii-dé.

Te sá ñí tecú dóho té Pèlú sá dúcáⁿ càháⁿ-dé ñuu ní ndíunuu-dé dóó-dë, chi dóó sã yímàa-ni-dé níhnú-dë ní cùu. Ducaⁿ te ní nuu ndava-dé bàrcú ní ngaunihnu-dé ndute, te cuáháⁿ-dé núú ndute-áⁿ ñí quene-dé ndéé ñuhu yìchí. ⁸ Te dava-gá cue téé ndíhi té Pèlú diu-ni cue téé ní xica cuu ndíhi Jèsús ní quendóo-güedé dàtná ìⁿ ciendú-gá mëtrú te quene-güedé yuhu ndùte. Te tàñuhu-ni-güedé ñunu-güedé chitu chăcá ñí quene-güedé ndéé yuhu ndùte. ⁹ Te òré ní quene-güedé ñuhu yìchí, te ní xiní-güedé càyú ñuhú, te núú ñùhú-áⁿ ñùhú ìⁿ chácá ndíhi ìⁿ pàá. ¹⁰ Te ní xáhaⁿ Jèsús xii-güedé:

—Quíhíⁿ ngueheⁿ-ndo ìⁿ úú chácá quití íchí ñí tñii-ndo —càchí-gá xáhaⁿ-gã xii-güedé.

¹¹ Núú té Pèlú ní sáháⁿ-dé núú ndécú bàrcú, te ní quee-dé xití-xi ní cándéé-dé ñunu ñuhu chácá tàñuhu-dé ní quene ndéé ñuhu yìchí, te chitu chăcá náhnú, te ñuhu ìⁿ ciendú údico úxí úní-dí xití ñunu-áⁿ, te cuëi ducaⁿ vai-dí ñuhu dico ñá ní ndätä ñunu-áⁿ. ¹² Te ní xáhaⁿ Jèsús:

—Chí nèhé cadí iní-ndó —càchí-gá xáhaⁿ-gã xii-güedé.

Dico ni ìⁿ cue téé ní xica cuu ndíhi-gá-áⁿ ñã ní xicáⁿ tnúhú-güedé núú-gã ñuu yoo cùu-gá, chi sa ní cutnùní iní-güedé sá díú Jèsús cúú-gã. ¹³ Te Jèsús ní sáháⁿ-gá ní queheⁿ-gá pàá ní sãñaha-gã xii-güedé caxi-güedé, te dàtnùní ní queheⁿ tucu-gá chácá ñí sãñaha-gã xii-güedé.

¹⁴ Vitna cùu úní xito sá xìní ñáhá cue téé ní xica cuu ndihi-gá sátá ñí ndoto-gá.

Jèsús càháⁿ ndihi-gá té Pèlú

¹⁵ Te sátá ñí túhú cóhó-güedě ní sadí iní-güedé te ní xícáⁿ tnúhú Jèsús núú tě Xímú, àdi Pelú chi úú òu-dé, te xáhaⁿ-gă:

—Xímú, déhe té Jònás, ¿cùu iní-gá-n yǎhú dàcúúxí dàva-gá cue téé-a ñǎ? —càchí-gá xáhaⁿ-gă xii-dé.

Te ní xáhaⁿ tě Pèlú:

—Mèstrú, cùu iní ñáhà-í, yòhó sa nàha-n —cachí-dé xáhaⁿ-dě xii-gá.

Te ní xáhaⁿ Jèsús:

—Te núu ducaⁿ, te dacàxi-n cue mbéé lǎhli-í —càchí-gá xáhaⁿ-gă xii-dé.

Te cue mbéé-áⁿ cúu-güedí ñáyíu cùu cuendá-gá.

¹⁶ Te ní xáhaⁿ tùcu-gá xii té Pèlú:

—Xímú, déhe té Jònás, ¿cùu iní ñáhá-n xii-í-u? —càchí-gá xáhaⁿ-gă xii-dé.

Te ní xáhaⁿ tùcu té Pèlú:

—Mèstrú, cùu iní ñáhà-í, yòhó sa nàha-n —cachí-dé xáhaⁿ-dě xii-gá.

Te ní xáhaⁿ-gă:

—Te núu ducaⁿ, te coto-n cuè mbéè-í —càchí-gá xáhaⁿ-gă xii-dé.

¹⁷ Te xito cùu úní ní xáhaⁿ tùcu-gá xii té Pèlú:

—Xímú, déhe té Jònás, ¿cùu iní ñáhá-n-ǎⁿ? —càchí-gá xáhaⁿ-gă xii-dé.

Te té Pèlú ío ní cundìyí-dé sá dúcáⁿ ñí cuu úní xito xìcáⁿ tnúhú-gă núú-dě nǎu ndisa sá cúu ìní ñáhá-dě xii-gá, te ní xáhaⁿ-dě:

—Mèstrú, yòhó nchaa sa xìní-n, te sa cùtnuní iní-n sǎ cúu ìní ñáhà-í xii-n —càchí-dé xáhaⁿ-dě xii-gá.

Te ní xáhaⁿ Jèsús:

—Te núu ducaⁿ, te dacàxi-n cue mbèè-í. ¹⁸ Te na cächí tnúhu ndáá-í xii-n sã cŭtnàhá cuechi-gã-n nĩ xóo ndécuihnu mee-n dđó-n, te ní xóo quíhíⁿ-n ndëni ní xóo cachí iní-n, dico na yíi-n te dacàá-n ndàha-n, te ingá tée dacuihnu ñaha xii-n dóó-n te cada yica-dě candeca ñaha-dě xii-n quíhíⁿ ìⁿ núu ñà túú tnàhá iní-n —cächí-gá xáhaⁿ-gã xii-dé.

¹⁹ Te sá dúcáⁿ nĩ cáháⁿ Jèsús cúú-xí sã nĩ dátécú tnúhu ñaha-gã xii té Pèlú nàcuáa cada-xi cuú-dé, te ducaⁿ càda cahnu-dé Yã Ndiöxí, te ní xáhaⁿ-gã xii-dé:

—¡Canchicúⁿ ñáhá-n xì-í! —cächí-gá xáhaⁿ-gã xii-dé.

Tée ío cùu iní-gá

²⁰ Te ní nchócótó tẽ Pèlú ndàa sátá-dě, te ní xiní-dé sá nchìcúⁿ ñáhá ìngá tée xica cuu ndihi-gá cuáháⁿ, tée ío cùu iní-gá tée ní xínucóo dìñi-gá òré ní cudìni ndihi ñaha-gá xii-güedé, te diu-ni tée-áⁿ nĩ xícáⁿ tnúhú-dě núú-gã dává-áⁿ nũu nděda càa tée cuáha cuendá ñáhá xì-gá núú cuè tée cùu úhú iní ñáhá. ²¹ Te òré ní xiní té Pèlú sá nchìcúⁿ ñáhá tẽe-áⁿ, te ní xícáⁿ tnúhú-dě núú Jèsús, te xáhaⁿ-dě:

—Mèstrú, te tée-áⁿ, ¿ná cúú sã yáha-dé-i? —cächí-dé xáhaⁿ-dě xii-gá.

²² Te ní xáhaⁿ Jèsús:

—Te núu yúhú cuiní-í sá cündècu-ni-dé ndéé ná quixi tucu-í ñuyíú-a, ¿te yòhó ná cuendá-n nũu xicáⁿ tnúhú-n? Yòhó canchicúⁿ ñáhá-ni xì-í —cächí-gá xáhaⁿ-gã xii-dé.

²³ Te ní xinu tnúhu núú nchàa ñáyiú sàndáá iní tnúhu-gá sá tẽe-áⁿ vã cùú-dé. Dico Jèsús ñá túú dùcaⁿ ní xáhaⁿ-gã sá vã cùú-dé, chi ní xáhaⁿ-gã: “Núu yúhú cuiní-í sá tẽe-áⁿ cundecu-ni-dé ndéé ná quixi tucu-í ñuyíú-a, ¿te yòhó ná cuendá-n?”, duha ní xáhaⁿ-gã xii té Pèlú.

²⁴ Te ðiu-ni yúhú té Juàá téé ní sani iní-yu sá vǎ cùú cǎháⁿ ndáá-í nchaá nàcuáa ní cuu, te ducaⁿ ñǎ tee-í núú tütú-a, te cùtnuní iní-ndó sǎ tñǎhu ndáá cúú-xí.

²⁵ Te ndècu vai-gá núú sǎ ñǎ quide Jèsús. Te núú ðicó ní ngǎndee nchaandi túhú ñǎ, te váa ni te ñihí ñuyíú te vá tñàhá núú-xi cundecu lìbrú, te núú ðicó ní ngǎndee nchaá. Te ducaⁿ na cùnduu. Te ío chí cádá ndèe iní-ñǎ vitna.

Tnúhu ní cáháⁿ yă ndiöxí xito cùu uú

New Testament in Mixtec, Peñoles (MX:mil:Mixtec, Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Updates

eBible.org

